

# WAN . UN



Namba 1726  
Wan Wik, Ogas 23 - 29, 2007

Niuspepa Bilong Yumi Ol PNG stret!

K1 tasol  
long olgeta hap



Promotim Seif na Strongpela Sosaiti bilong yumi olgeta!



# Orait tasol

## ... Rot i ken kam long NCD: Parkop

Paul Zuvani i raitim

**MEKIM rot i kam long Nesenel Kapitel Distrik (NCD) bai daunim planti hevi i stap nau insait long siti na kantri.**

Moa yet dispela bai bringim sampela gutpela sevis i go long ol pipel.

NCD Gavana Powes Parkop i mekim ol dispela toktok taim em i amamas na bekim toktok bilong Gavman long pulim rot long Hailans na Momase rijen i kam long Pot Mosbi siti.

Tasol em i tok em i laik gavman i mekim reilrot bilong tren moa long mekim rot bilong kar.


Em i tok i gat tupela samting em i mas toktok long ol na olsem em i mas toktok long wanpela pastaim na bihain narapela.

"Olsem Gavana bilong kapitel siti bilong kantri bilong yumi sapos Mosbi tru tru i kapitel siti bilong yumi, yumi i mas opim i go aut long sait bilong rot bilong kar, tren, sip o balus," Mista Parkop i tok.

Taim yumi opim planti ol manmeri husat i no laik long stap bai lusim Mosbi na go, em i tok.

Na husat manmeri i kam wok bisnis long mekim long siti taim i pinis i isi long go bek, em i tok.

**Moa stori long pes 3**



Lukim ol arapela bikpela developmen nius:

**PES 26:**  
Nesenel  
Developmen  
Beng redi  
long lukautim  
Pasifik  
bung

**PES 27:**  
Gavman  
mas  
luksave  
long  
enimal  
trenspot


**TOK PROMIS LONG RAUSIM PASIN KORAPSEN:** Mista Parkop i bin mekim tok promis long holim opis las wik. Bikpela tingting bilong em nau em long rausim pasin korapsen long NCD na strongim wok bilong givim sevis long pipel bilong biksiti Mosbi. **Poto: Andrew Molen**



Brian Bell Kampani igat ol kain kain masin blong wok didiman long Papua Niugini. Mipela igat fetilaisa marasin tu na ol seeds blong ol kaikai na kumu long gaden olsem kebis, letis, anian, brocoli, tomato na planti arapela moa.

Brian Bell Kampani luksave olsem wok didiman em bun blong ol bikpela lain pipol long asples PNG. Mipela helpim na strongim dispela wok didiman longpela taim tru ikam inap nau tu.

Mipla sapotim wok didiman long Papua Niugini long gro bikpela



PLAZA 325 5411 HOME CENTRE CITY-GORDONS 325 8469 HOME CENTRE CITY-LAE 472 3200 TOPTOWN 479 1918  
GOROKA 732 1622 KOKOPO 982 9027 MT HAGEN 542 1999 MADANG 852 1899 Email: bbsales@brianbell.com.pg

**Brian Bell**  
Shop with a friend

# Nupela pablik sevis mas kamapim gutpela wok

Paul Zuvani i raitim

NUPELA Pablis Sevis i mas kamapim gutpela wok na i no slek, keateka Minista bilong Pablik Sevis Don Polye i tok.

Em i tok slek na no mekim wok gut i pablik sevis bilong bipo na i no ken stap moa.

"Long pinis bilong olgeta samting mipela i laik lukim efektivnes na efisensi," Minista Polye i tok.

Mipela i laik bai ol as tingting bilong mipela long kamapim polisi na kari-maut i karim kaikai, em i tok taim em i tok daunsaising i gutpela wei long toktok tasol moa gutpela long tok olsem raitsaing.

Long dispela mipela i no ken lukim mipela i rausim ol pablik sevis bikos polisi i tok tasol moa bikos mipela i laik lukim gutpela wok i kamap, em i tok.

Mista Polye i tok dispela i min gavman bai daunim namba o i hapim namba bihainim tasol mak bilong namba bilong ol wok.

Em i tok wanpela samting i rong long ol pablik seven i no wok gut em

bikos long oltaim i gat senis long hetman bilong Dipatmen o Minista.

"Oltaim senis long Ministri o long Hetman bilong Dipatmen i save holim bek developmen long kamap.

"Samting mi laik lukim em rifom pablik sevis," em i tok.

Gen em i tok dispela i go wantaim tingting bilong Gavman long Mideim Tem Dvelopmen Streteji (MTDS).

"Em long lukim Pablik Sevis we i kirapim na skelim gut wok bilong ol bai mipela i ken lukim kaikai bilong ol as tingting bilong mipela," em i tok.

Em i givim piksa long Trensport Dipatmen we em i tok bipo long rifom i kamap ol samting i no stret tasol nau i wok long kamap gut gen.

Em i tok rifom long Trensport Dipatmen i lukim bruk long ol hap namel long ol wok bilong nambis na solwara (maritaim) na graun (rot).

Mista Polye i tok Woks Dipatmen bai yusim tu PNG Difens Fos Sivil Enjiniring Dipatmen long wokim na stretim ol rot na bris.

Narapela samting em long trenim gut ol Pablis Sevis bilong mipela.

# Pasifik Tuna Bung kisim helpim

YUMI i mas helpim yumi yet long developim lokol fiseris indastri bilong Papua Niugini (PNG).

Dispela em toktok bilong Terry Ward, Fainensal Kontrol o man husat i bosim mani paus bilong Nesenel Fiseris Atoriti (NFA).

Mista Ward i bin makim maus bilong Menesing Dairekta bilong NFA, Sylvester Pokajam, long tok tenkyu long Menesing Dairekta bilong Wamomo Sifud Ekspotas Ltd (Wamomo Seafood Exporters Ltd), Mabisa Landu, long K5000 helpim bilong em i go long NFA long sapotim Pasifik Tuna Forum o bung we bai

kamap long PNG long Septemba long dispela yia.

Mista Landu i tok Wamomo Sifud Ekspotas i no stap long tuna bisnis tasol ol i amamas long sapotim NFA.

Mipela i wanpela PNG kampani husat i stap long bisnis bilong salim i go ovasis ol si kukamba na sakfin. Mipela i amamas long sapot NFA i save givim mipela, em i tok.

Dispela Pasifik Tuna Bung i namba wan bikpela bung bilong Rijenal Tuna Indastri na Tred Konprens long kamap long Pasifik na bai kamap long Septemba 12 i go inap 13, 2007, long Mosbi.

# Mi redi long senis

GAVANA bilong Nesenel Kapitel Distrik (NCD) Powes Parkop i tok ol lida husat bin sapotim Gren Sief Sir Michael Somare long kamap Praim Minista gen em ol i no redi yet long senis. Ol i wok long bihainim yet lek bilong Somare.

Mista Parkop i tok em i bin redi tru long kamapim senis long Gavman na lidasip bilong dispela kantri tasol ol memba i no bin redi long dispela.

Mista Parkop i tok Somare nau em 71 krismas pinis na em mas go kisim malolo na larim ol nupela yangpela lida long go pas long kantri na pinisim gut driman bilong Somare.

Olsem na em tok sanap bilong em i no pinis yet long lukim na kamapim senis long kantri na em bai statim wantaim opis bilong em long NCD olsem Gavana.

Namba wan samting em laik lukim em long Lo bilong NCDC mas kamap klia aninit long Ogenik Lo i no ken stap yet olsem bipo. Bikos dispela bai soim olsem NCD i no kapitel siti bilong Papua Niugini (PNG).


Sapos Gavman i no givim dispela senis bilong mekim NCD olsem kapitel siti orait karim kaptiol siti wantaim Nesenel Palamen na Suprim Kot haus bilong PNG go long Aiyura Veli long Goroka, Isten Hailans Provins, we i namel hap na senta long olgeta provins ken go long hap.

Em i tokaut olsem long opis bilong NCDC em bai stopim pasin bilong NCDC givim aut mani nating long ol manmeri o kontrak we i nogat trupela wok i stap long en.

Olgeta kontrak bai stap long pepa na ol wokman bai sekim wok pastaim long NCDC i peim ol. Na tu ol manmeri laik kisim wok bai ol mas soim pepa bilong ol na NCDC bai skelim sapos ol i save long mekim wok.

Mista Parkop i tok tu olsem bai ol pasin bilong giaman na mekim hait pepa o giaman wok bai pinis bikos olgeta pepa bai kam ples klia stret long fran opis na i no long baksait o windua nabaut.

Em i tok olsem ol dispela pasin mas kamap long lukim wok i kamap gut bilong sevim pipel na sindaun bilong ol insait long siti. Ol kontrak bai i stap yet tasol bai yumi skelim gut wok bilong ol.



EM TAIM: Mista Parkop taim em i sainim pepa long kisim opis.

Yumi no inap peim ol kontrol long klinim arere long haus o banis bilong ol yet. Yumi mas peim ol kontrak long mekim ol wok bilong developim siti. Em tok ol bikpela wok olsem klinim siti na ol flawa gen long rot na ol gutpela hap insait long siti, stretim gut ol rot long olgeta kompaun na setelmen, stretim wara saplai long ol setelmen, stretim gut klinim long ol autpesen, stretim gut ol skul na arapela moa.

Mista Parkop tok ol marasin long klinik mas fri long yumi kisim na tu i mas gat dokta i wok long ol klinik. Ol skul pikinini mas gat gutpela klasrum, ol buk na des bilong sindaun na rait long en, ol pikinini i feil long gret 8 na 12 mas gat sans gen long skul. Em tok yumi mas givim ol skolaspip bai ol ken traim na pusim edukesen bilong ol go moa na noken stap raun nating long rot na smokim spak brus na kamap raskol long komyniti.

Em i tok NCDC mas gat mani long peim wara saplai go long olgeta setelmen na putim gut kolta long ol setelmen rot na

komyniti.

Narapela bikpela senis em laik lukim tu em long NCDC mas stretim gut ol maket ples wantaim gutpela hap bilong ol asples Motu Koitabu o Papua lain long salim ol kaikai bilong ol yet. Ol Papua bai gat maket bilong ol yet stret we nogat man nabaut bai go insait, em tok.

Em laik lukim tu Ela Bis mas kamap gut bai ol manmeri ken amamas long go waswas na kisim win long hap. Antap long dispela em laik lukim ol bikpela pilai graun mas kamap long lukautim ol bikpela ovasis gems na so.

Em i kolim Sir Hubert Murray Stadium na wanpela nupela soka stedum long Gerehu na tu Mosbi soka fil long kamap bikpela na gutpela long lukautim ol ovasis gems tu.

Em i tok sampela bilong ol dispela projek em ol ausait lain i redi long putim mani long kamapim na ranim na bihain ol kisim bek mani bilong ol orait bai NCDC kamap papa long ol dispela pilai graun.

# Ol papagraun tok lukaut long pasim prosek

Michael Novingu i raitim

SINGAUT i go long menesmen bilong Ramu Nickel Prosek, Ramu Nico Menesmen (MCC) Limited long givim ol han bisnis i go long ol papagraun kampani namel long sevenpela de, nogat bai ol i pasim projek na wok bai no inap go het.

Dispela em toktok bilong siaman bilong Kurumbukari (KBK) Papagraun Asosiesen Toby Bare long taim bilong opim bilong Banu sotpela taim bris long Ramu Wara las wik Sarere.

Mista Bare i tok opim bilong dispela sotpela taim bris i bikpela samting long laip bilong mipela we sevis na developmen bai kam long ol pipel.

"I gat bikpela hevi i stap yet mipela i no stretim yet watnaim ol developa em MOA, ol i sainim long yia 2002 i pinis long 2005 tasol ol developa i kari-maut wok yet. I gat nid long sainim nupela MOA o tok orait we mipela i lukim sampela samting long wok bilong dispela prosek i no stret," em i tok.

Mista Bare i tok moa olsem ol papagraun i givim sevenpela de long menesmen bilong Ramu Nickel

Projek, MCC Ltd long givim ol kontrak wok bilong sekyuriti, kukim kaikai, enjiniring na ol arapela wok i go long ol papagraun, sapos nogat, bai ol i pasim wok long go het.

"Pasin bilong salensim, tok kros pait wantaim ol developa (MCC) i mas stop. Wok bung wantaim ol bihainim stretpela rot long kisim kontrak long wok i mas kamap nogut ol i lusim mipela bai taim nogut i kisim mipela. Dispela em long gutpela bilong ol pipel bilong Usino Bundi na PNG tu," Mista Bare i tok.

Long wankain taim, Dairekta i makim maus bilong MCC Grup ov Kampani long Saina, Yang Zhiqing i tok kampani bilong em i amamas long wokbung wantaim gavman na pipel bilong Usino Bundi na PNG long developim dispela nikel main.

Em i tok moa olsem wok bilong nupela pemeren bris long Banu Ramu wara i stat pinis na bai pinis bihain long tupela o tripela mun. Na tu rot i go long main eria i stat pinis we ol ples i stap klostu long main eria bai lusim hauslain bilong ol we MCC yet bai wokim haus slip bilong ol long nupela hap bai ol i stap.

## Tok Sori



Gabbie Yura i laik tok bikpela sori na bel hevi go long mama, papa na famili bilong liklik Grace Husa husat i dai dispela mun.

Mi wari tru long lusim liklik kandre bilong mi na mi stap wantaim yupela long dispela taim bilong sori.

Liklik Grace em i kandre bilong mi na mi save amamas tru long em.

Papa God i ken kisim em i go stap wantaim em.

# Polye redi long kamap praim minista

## ...tasol i no taim yet

Paul Zuvani i raitim

DON Polye, Kandep Memba na deputi lida bilong Nesenel Alaiens Pati (NA) long Hailans rijen i tok em i redi long kamap Praim Minista.

Tasol i tok taim i no yet na em i no inap long pait long kisim dispela namba.

Em bai kamap sapos ol memba bilong em long NA pati, 109 Memba bilong Palamen na ol pipel bilong Papua Niugini i laikim long em i kamap.

"Long nupela sistem bilong Limited Prifensiel Voting sistem mi namba wan man long win long absolut mejoriti.

"Mi no inap long pait wantaim Gren Sief Sir Michael Somare long kamap lida bilong Nesenel Alaiens," Mista Polye i tok.

Em i tok em i no laik kamap olsem ol arapela lida.

"Mi no laik kamap olsem ol arapela lidaman na paitim bros olsem Hami Yawari, Peter Ipatas na Pias Wingti.

"Mi laik larim ol samting i ron olsem ol i ron long em we mipela i mas larim Somare i wok inap long wanem taim na wanem rot em i laik pinis em dispela i mas kamap," em i tok.

Em i tok i luk olsem Sir Michael i wanpela lida long wol we aninit long gutpela rot na votim man i go bek long Palamen em wanpela tasol i win long kam bek na i stap long Palamen long planti yia. Moa yet namel long ol Komenwel kantri.

Long Melanesia we mipela i save soim rispek long Sief. Mi yangpela man tumas. Mi mas rispektim sif bilong mi. Mi gat longpela rot bilong mi i stap bipo long mi ken kisim save na pasin bilong Sief, Mista Polye i tok.

Em i tok Hailans NA kem i bin pusim em long tok strong long Kokopo tasol em i no laik. Nau yet em i laik ol memba i mas putim tingting bilong ol long kirapim na kamapim ol wok.

Em i tok sapos ol i pait kros i go i kam nogat wanpela man bai mekim wok na kantri bai go daun.

Tasol em i tok wanem taim Sir Michael i pinis na sapos em i laik bilong ol pati memba bilong em, 109 Palamen Memba na ol pipel bilong PNG i laikim orait em i ken kisim ples.

Em i tok taim em i mekim olsem em i gat blessing bilong ol manmeri na olsem em i nogat birua.

"Taim mi go long Kandep mi no save tok ol pipel i sindaun. Nogat. Ol yet long laik bilong ol taim ol i lukim i save sindaun tasol na harim tok bilong mi. Mi laikim olsem. Mi mas gat blesing bilong ol pipel," Polye i tok.

Tasol em i tok sapos askim i kamap yes em i redi long kamap lida bilong Nesenel Alaiens pati na sapos nogat praim minista bilong kantri.

# Parkop tok orait long rot i kam

...I kam long pes 1.

"Planti manmeri i kam stap long siti bikos ol i painim hat long go bek bikos pe bilong baim balus tiket antap long ol i kisim mani na baim.

"Na olsem mi amamas na sapotim dispela tingting bilong siti i mas op long ol arapela ples long kantri.

"Tasol mi bai amamas sapos gavman i mekim rot bilong tren na i no rot bilong kar," Mista Parkop i tok.

Long taim em i tok olsem em i no lus tingting long tingting bilong ol asples manmeri husat i gat wari long nogut ol arapela manmeri long ausait i kam pulap nating long Mosbi na pasim ples bilong ol long kisim sevis.

Em i tok dispela i tru tasol i tok dispela i bikpela samting na i no inap long stretim isi. Em i hevi i kamap long olgeta hap bilong wol tasol bikpela samting mipela i mas stretim tingting bilong ol manmeri.

I gat as na olsem Mista Parkop i laik rot i mas kam long Mosbi.

Dispela em olsem:

•POT Mosbi em kapitel siti bilong kantri na olsem em i mas op long ol. Klostu olgeta kapitel siti long wol em rot bilong ol i op long ol pipel bilong ol tasol mipela nogat. Pot Mosbi i siti bilong mipela olgeta;

•MEKIM rot i kam long Mosbi i opim rot bilong ol manmeri husat i stap hia i go aut isi. Planti manmeri husat i stap hia i nogat laik long stap. Ol i stap bikos ol i painim hat long go aut. Lukim Madang na Lae. Nogat planti hevi i kamap. Rot i op na ol pipel i fri long lusim ples na go bek long Hailans. Na sapos rot long Wewak i op ol Sepik bai lusim Madang na Lae isi na go bek long ples bilong ol; na

•OL manmeri i gat sans long mekim wok bisnis na i isi long mekim wok bisnis.

Em i tok planti ol manmeri i kam long Mosbi bikos gavman i putim moa mani long em na i no long ol arapela

hap bilong kantri.

"Sapos yumi ken putim wankain mani long ol arapela senta o ol rurel ples dispela bai mekim ol pipel i stap bek.

"Ol manmeri i tingting Mosbi i gat olgeta gutpela stua, helt sevis, edukesen, entertainmen na olsem ol i kam," Mista Parkop i tok.

Long tingting bilong reilrot bilong tren i mas kamap em i bikos:

•KOS bilong mekim reilrot, mentenim na ripirim i liklik moa long rot bilong kar;

•BRINGIM ol gutpela sevis olsem planti ol pipel bai ron long em. Sotim taim bilong ron i go long narapela ples hariap; na

•BRINGIM pawa bikos em bai yusim pawa long ron na wanem ol ples i stap arere long reilrot bai kisim pawa tu.

BIHAINIM toktok bilong Mista Parkop, Memba bilong Mosbi Not Wes Sir Mekere Morauta i givim sapot long rot i mas op long Mosbi na i tok em i gutpela tu long wanem dispela i lukim mipela i wanpela kantri na wanpela kantri.

Tu yumi i mas promotim wok bisnis insait long kantri yet na helpim long kisim i go i kam, ol pipel na samting bilong ol, Sir Mekere i tok.

Namba tri em long sapos i gat rot dispela bai lukim developmen bai kamap long ol arapela samting olsem agrikalna na bisnis, em i tok.

Tasol em i tok olsem long taim gavman i toktok long opim siti i go long ol arapela hap bilong kantri em i mas tingting tu long stretim ol rot we i stap pinis na olsem em bai stretim yet dispela nupela rot taim em i mekim.

"Mipela i no stretim gut ol rot we mipela i gat long ol pinis na wanem samting moa i stap long pasim mipela long tok olsem mipela bai painim hat long stretim dispela rot taim mipela i kamapim," em i tok.

## Ol manmeri mas gat rot

Paul Zuvani i raitim

DON Polye, Memba bilong Kandep na deputi lida bilong Nesenel Alaiens pati long Hailans rijen i laik lukim sampela bikpela rot i mas kamap namel long dispela 5-pela yia taim bilong dispela Gavman.

Na em i laik lukim olsem Mosbi siti i op long Hailans na Momase rijen, ol Sepik provins i op long Madang na Lae, rot i op long Is na Wes Nu Britan provins, ring rot bilong Bogenvil na Nu Ailan Buluminski Haiwe i stret.

Mista Polye husat i keateka minista bilong Woks, Pablik Sevis na Kalsa na Turisim i tokaut long tingting bilong Gavman long Morauta Haus, Waigani long dispela wik.

Em i tok em i tingting long kisim olsem K500 milien long Novemba Baset we Gavman i lukluk long kamapim K1.2 bilien Saplementari Baset.

"Namel long dispela 5-pela yia mipela i mas lukim Nesenel Kapitol Distrik i op long ol arapela senta long kantri," Mista Polye i tok.

"Narapela rot em long lukim Is Nu Briten i op long Wes Nu Briten.

Dispela inap long kamap tasol bikos long hevi bilong mani na olsem dispela i no kamap," em i tok.

Mipela i laik lukim Lae na Madang i op long Is na Wes Sepik, Polye i tok taim em i tok em i no stret taim mipela opim rot i go long narapela kantri tasol i no inap long opim ol rot insait long banis bilong mipela yet. Bogenvil ring rot i mas kamap.

Em i tok Nu Ailan provins Buluminski Haiwe em AusAID i wok long stretim wantaim K14 milien mani mak.

Em i tok taim Gavman i laik kamapim ol nupela rot em bai stretim yet ol rot we i stap pinis.

Long opim rot long Hailans i kam long Mosbi Polye i tok em i mas stretim rot namel long Malalaua na Kerema long Galp provins pastaim. Bihain em i mekim rot long Gobe i go long Gobe, Samberigi, Pangia, Erave na Kikori.

Long opim rot long Momase na kam long Mosbi em i tok long mekim rot i kam long Wau-Bulolo, Garaina, Tapini na Bereina.

Em i tok rot i bikpela samting long bringim developmen long wanem. Long rot ol manmeri long ples i ken



ROT MAS KAMAP: Mista Polye.

painim rot bilong salim ol samting bilong ol, kisim mani na sapotim laip bilong ol.

Tasol em i tok Gavman yet i no inap long stretim na mekim ol rot na olsem em bai askim na kisim helpim long ol dona ejensi tu.

Em i tok nau yet Esia Developmen Beng (ADB) i wok long stretim Hailans Haiwe, AusAID i stretim Buluminski Haiwe na em bai kisim helpim tu long Saina.

Em i tok tingting bilong stretim na kamapim ol rot i bihainim tasol wanpela as tingting bilong Midium Tem Developmen Streteji (MTDS) bilong Gavman long ol yia namel long 2005 na 2010.

KIPOR

### Kipor Mobile Welding Tower

- 1) Equipped with KIPOR KDE8000T diesel gen-set, max. output is 7.5kW at 60Hz
- 2) 440000 luminous flux
- 3) Three-section electric lifting mast, excellent windproof ability

new

## MOBILE LIGHTING TOWER

### GenSet Mobile Welding Tower

- A) Two wheels site trailer with towing bar
- B) Stabilisers ensure secure operation, on flat surface, even in high winds (max 110 km/h - 70mph)
- C) 5 - 9 m telescopic and tilting mast, made by inox, operated by an hydraulic winch which allows infinite variable height adjustments;
- D) 6 lamps, 1500W each
- E) Long run fuel tank fitted on the lighting trailer

GenSet  
The market leader

new

Made in Italy



BISHOP BROTHERS

everything for industry...

www.bishopbros.com.pg

PORT MORESBY | LAE | MADANG | MT HAGEN | PORGERA | VANIMO | KIMBE | RABAU | HONIARA

All Diesel Engines

# Pis faming ken winim kakaruk

## Senior! Anzu i raitim

PIS faming i ken kamap olsem wanpela gutpela wok long ol komyniti i stap arere long Wara Makam long Morobe provins.

Sampela famili klostu long Makam bris na Postsi na ples Puseka i stat pinis long famim ol pis.

Postsi Pis Famas Asosiesen (PPFA) em wanpela grup we ol fama i statim long las yia i go insait nau long inlen pis faming bilong strongim pis faming long eria.

Grup i go insait long dispela projek bilong strongim ol fama olsem i gat ol planti rot long kisim mani long en na long lukautim pis olsem wanpela rot we i no kostim bikpela mani long baim olsem abus kaikai.

Planti ol famili long eria i gat kontrak long groim ol broila kakaruk long Niugini Tebolbets kampani. Tru, ol i save kisim pis long Wara Makam, inlen faming i odaim narapela sans i go long ol. Amex Abor Jnr bilong Makam

Bris i wanpela long ol liklik lain long ples husat i gat pos fam long ol liklik raunwara. Dispela em antap long lukautim kakaruk na planim vanilla.

Mista Abor Junia i gat 8-pela pos fam raunwara we i gat Supa Talapia pis long ol. Dispela em o, haibril tilapia we DAL na Nesenel Fiseris Atoriti i promotim long en.

Tupela taim nau, em i kisim ol pis long famili i kukim na kaikaim.

Long las Mande, tupela Laipstok opisa bilong NARI Akwakalsa seksen i bin go lukim Mista Abor Jnr na ol fam bilong em long kisim ol tilapia pis pingalings. NARI i bin laik tu long lukim rot we em i save yusim long testim ol akwa teknologi long eria bilong em.

Long dispela raun bilong NARI i go long fam bilong em, Mista Abor Jnr i bin salim 200 talapia long prais bilong 50 toea long wanpela i go long ol woklain bik- ing NARI.

Ol NARO Akwakalsa woklain i



**BILIP LONG PIS FAMING:** Alex (raithan) wantaim sampela ol famili bilong em. *Poto: Senior! Anzu*

bin amamas long wok bilong em na givim em tupela Saut Pasifik Komisn buk long lukautim ol talapia pis.

Mista Abor Jnr i tok em i gat bikpela laik long pos faming na tu, planti lain i laikim Sia pis tilapia na ol liklik pis olsem, em i tok bai em i sanapim moa pis pon o raunwara bilong putim na lukautim ol pis long en we bai em i kisim mani long ol.

# Wari long binatang bagarapim kakau

NOGAT mani long karimaut ol pro- grem na wok long stopim binatang i save bagarapim kakau ol i kolim long "Cocoa Pod Borer (CPB) i ken bagarapim kakau bisnis we i save pulim bikpela mani long planti pipel na kantri tu.

Ol kakau fama long Is Nu Briten, Is na Wes Sepik, Bogenvil, Madang na Morobe provins i harim olsem K60 milien we Nesenel Gavman i bin katim i go long Nesenel Agrikalsa Dvelopmen Program em i pinis tasol wok we ol bin katim mani long em i no kamap.

PNG Groas Asosiesen i wok hat long painim mani bilong helpim wantaim wok long daunim binatang CPB, tasol em i no kam gut yet.

Sief Eksekutyv opisa bilong PNG Groas Asosiesen, David Loh i tok asosiesen bai painim mani long narapela hap bikos gavman i no inap long helpim industri.

Sikspela provins long kantri em Is Nu Briten, Is na Wes Sepik, Bogenvil, Madang na Morobe provins em ol i save kamapim bikpela mak long kakau na pulim bikpela hap mani

bilong ruel ikonomi long em.

Tasol kaukau bisnis we planti tausen fama long ol dispela provins i kisim mani long en na nau, ol i brukim bun long banisim long binatang nogut i bagarapim ol kakau i ken bagarap sapos gavman i no givim mani sapot long industri.

Dispela binatang, CPB, i go insait pinis long Is Nu Briten na Sepik rijen na i wok long bagarapim ol kakau sit.

Ol groa na ol lain long agrikalsa sekta i pret olsem sapos ol i no painim bikpela manimak long kamapim ol program bilong daunim binatang ya hariap, kakau bisnis long kantri bai bagarap.

Dipatmen bilong Agrikalsa na Laipstok (DAL) i tok i nogat mani nau, maski em bin promisim ol groa long stat bilong yia olsem ol i katim K10 milien long mekim wok bilong daunim CPB.

Ol fama long Is Nu Briten na Bogenvil i kisim skul aweanes trening pinis long putim was na menesim dispela binatang bipo em i go na bagarapim ol diwai na sit kakau.

# Hope givim save yet

## Andrew Molen i raitim

OL MANGI nau i mas ridim planti buk sapos ol i laik save moa long planti samting.

Na wanpela ogenaisesen we i save wok strong long lukim dispela i kamap em Hope Worldwide (PNG).

Las wik ol i givim wanpela K20, 000 sek mani go long nesenel laibreri na akaiv long baim moa buk bilong laibreri o haus bilong ol buk.

Dispela mani kam long Nu Silan (New Zealand) gavman aninit long NZAID program bilong en.

"Mipela i givim moa long wan milien i go long ol skul pinis na mipela i raun inap 8-pela provins pinis.

"Mipela i gat bilip olsem dispela ol buk bai helpim laip bilong ol mangi bilong yumi husat ol bai kamap ol lida bilong yumi tumora.

"Na sapos mipela i givim gutpela skul long ol bai mipela inap long



SAPOT: Eking Dairekta-Jenerel bilong Nesenel Laibreri na Akaivs, Jacob Hevelawa, Mista Crozier, Mis Lesley na Asisten Nesenel Laibrerien Karina Sereva i sanap wantaim sek i kam long Hope Worldwide. *Poto: Andrew Molen*

helpim ol i kamap," Dairekta bilong Hope Worldwide long PNG, Jessica Lesley i tok.

Deputi Hai Komisina bilong Nu Silan long PNG, Alistair Crozier i tok wanpela as tingting bilong ol em long strongim wok bilong skulim planti moa manmeri long PNG na long wol long rit na rajit na dispela em i wanpela rot ol i ken helpim.

# Gavana Olga kisim salens

## Paul Zuvani i raitim

WESTEN Hailans Provins Gavana Tom Olga i kisim kot salens long bipo Gavana Paias Wingti long ileksen win bilong em.

Mista Wingti i putim askim bilong em bipo long kot bilong dispiuted ritens long las wik long kot i givim oda long ileksen opisel long ol mas larim ol bokis we i gat tok long ol i stap long kontena inap long taim toktok bilong em long asua i stap long win bilong Olga i kamap bipo long Kot. Na olsem i nogat man i mas tasim dispela ol bokis long dispela taim.

Dispela askim em Wingti i mekim long Nesenel Kot long Waigani bipo long Jastis Mark Sevua long las wik Fraide. Na dispela em Kot i makim aste Trinde long em i mas harim tasol bihain long loya bilong Wingti Alfred Manasseh i tok Wingti i mekim narapela askim tu bipo long Kot na dispela i mekim Jastis Sevua i givim oda na surikim Kot i go long tumora

Fraide long em i ken harim.

Long Oda bilong Jastis Sevua em i tok fes difenden Rogana Mala i mas bihainim ol oda bilong Tunde Ogas 28, 2007.

Dispela kot bilong Paias Wingti long em i sutim tok long Olga long win bilong em i mas kamap long tumora gen.

Kot i surik i go long tumora bikos Manasseh i tok ol i painim hat long kisim ol progresiv tali mak bikos Komisn i no prosesim yet.

Na Mala we ol i mas kisim dispela ol ripot long em i kam long Mosbi na dispela i hat long wanem ol ripot i stap yet long Mt Hagen.

Wingti i kamap wantaim dispela kot bikos em i tok i gat paul pasin i kamap long taim bilong vot na em i makim Provinsel Ritening Opisa Kala Rawali, Provinsel Polis Komanda Winnie Henao na Iektorel Komisn olsem namba wan, namba tu na namba tri difenden.



## MINISTRY OF COMMERCE AND INDUSTRY PNG GARMENT & TEXTILE DEVELOPMENT INSTITUTE

### TOK SAVE IGO LONG PABLIK

Papua Niugini Garment na Textile Development Institute em i gavman skul na resista aninit long National Training Council namba 015, i save ronim ol kos olsem;

- Apparel Sewing (samapim kainkain kolos)
- Screen Printing (wokim kainkain piksa long ol kolos)
- Sewing Machine Repair (rot bilong stretim masin bilong samap)
- Small Business Management (rot bilong kamapim na ronim liklik bisnis)
- Embroidery (samapim kain samting olsem bedge long kolos)

Dispela ol kos i save ron igo inap olsem foapela mun o 16 pela wik olgeta. Igat planti samting moa bilong halivim yu kamap gutpela na save long samap olsem liklik save long komputa, liklik mathematics na tu helt igo insait long ol dispela kos.

Dispela ol kos hia em man o meri wantaim ken kisim. Noken tingting planti sapos yu no go long wanpela bikpela skul o yu istap nating long haus.

Yu ken kam na enrol nau.

Skul bai stat long namba 10 de long Mun Septemba, 2007.

Long kisim moa toksave ringim Wesley Philipilis o Mary Chee long Fon Namba 323 4778, 323 3295 or 323 2933 o kam lukim mipela long opis istap long section 56, allotment 09 long Varaha Rd, Gordons.

# Ilektorel Komisin i noken pulim taim

## Sanapim ston long makim wokbung

**James Kila i raitim**

OL LAIN manmeri husat i bin wok olsem ol kaunim opisal long lsten Hailans Provins i mekim bikpela singaut i go long ilektorel Komisin long stretim ol alawens bilong ol kwik.

Planti bilong ol i singaut strong tru olsem PNG ilektorel Komisin i noken yusim kain pasin bilong surikim taim wankain olsem long 2002 Neneral Ileksen we i bin lukim ol opisal i bin kisim ol alawens bilong ol samting olsem tripela krismas bihain.

Wanpela mausman bilong ol kaunim opisal long Goroka, Robin Ronnie i bin

mekim dispela ol toktok las wik Fraide taim em wantaim ol arapela lain manmeri husat i bin wok olsem ol volentia long taim bilong kaunim.

Wantok Niuspepa i bin stap long las wik Fraide taim planti ol dispela lain kaunim opisal i bin bung ausit long ilektorel Komisin opis long Goroaka. Planti bilong ol dispela lain i wok wet stat long Mande yet i go inap Fraide long kisim sampela kain toksave i kam long ileksen menes long wanem taim tru ol bai kisim alawens bilong ol.

Mista Ronnie i tok planti ol dispela kaunim opisel i bin kisim dinau mani long sampela lain long baim bas na ol samting olsem buai na smuk olsem na ol i laikim ol

opis bilong ilektorel Komisin i mas stretim ol alawens bilong ol hariap.

Dispela hevi bilong alawens bilong ol poling na kaunim opisal i bin bringim planti kros n birua.

Long Aiyura gavman stesin long taim bilong kaunim i bin gat wanpela bagarap i bin kamap taim sampela poling opisal i bin brukim distrik opis bilong Obura-Wonenara distrik administresen. Ol dispela lain poling opisal i bin kamapim dispela hevi bikos long alawens tasol.

Polis long Aiyura i bin holim pasim na lokim 14 man bihain long dispela birua. Tasol bihain ol i stretim ol toktok na ol i rausim ol long rumgat long Kainantu.

**Michael Novingu i raitim**

PASIN bilong luksave long helpim kam long pipel bilong Amerika i bikpela samting long pipel bilong Madang na PGN tu.

Long makim dispela gutpela pasin na poroman wantaim ol pipel bilong Amerika, ol pipel bilong Madang i wokim US Nevi Sip Mercy Memorial Pak na US Nevi sip Peleliu Pasifik Patnasip simen long strongim na makim dispela pasin poroman.

Moa long 200 manmeri na ol bikman bilong US Nevi Sip Peleliu, PNG Difens Fos, Modilon Haus Sik, Madang Provinsel Administresen na bipo Helt Minista Sir Peter Barter i stap long lukim ol i pasim poroman pasin long planim diwai, blesim Memorial pak na US Nevi sip Peleliu simen long strongim dispela pasin las wik Fonde.

Ambeseda bilong US long PNG, Leslie Rowe

i tok amamas long gutpela wokbung tupela kantri i kirapim long helpim ol tarangu manmeri long kisim helpim we ol i no inap long kisim.

Dispela pasin bilong poro i mas i stap strong long gutpela bilong pipel bilong Madang na PNG wantaim pipel bilong Amerika.

Misis Lowe i tok pipel bilong Madang na PNG i gat gutpela pasin we em i laikim tumas long wok wantaim long kisim moa helpim i kam long kantri bilong em.

Misis Lowe i tokim Wantok Niuspepa olsem helpim i kam long US Nevi Sip Peleliu long sait bilong helt na ol arapela wok bai stap olsem, tasol moa helpim bai kam long wok bilong stopim sik AIDS, TB, malaria, rot bilong lukautim ol lain i gat sik AIDS na ol arapela sik nogut. Na tu, mani bilong pait long stopim malaria long wol i redi i stap we pipel bilong ol bai kisim helpim tu.

# Nupela prosek long skruim Lae Bris

NAMBA WAN hap bilong Lae Pot o Bris Taidel Besin Dvelopmen prosek (LPTBDP) i stat pinis na wanpela ovasis konsalting enjinia grup o wokim ol disain na dokumentesen wok.

Ol bai mekim i go bikpela dispela taidel besin bilong kisim ol bikpela sip i winim dispela nau we ol sip i yusim long dispela taim.

Ol bai wokim tu nupela ples long sanapim ol kontena na tu, ples i haus bilong putim ol samting bilong salim i go long ol narapela hap.

Wok long biding ol nupela samting long Lae Bris bai stat klostu long pinis bilong neks yia o long namel bilong 2009. Bikpela bilong besin o hap we ol i laik karimaut ol wok developmen em 500 mita na 400 mita waid na ol bai digim i go insait long mak bilong 13 mita.

Tru, sampela ol bikpela samting i stap long stretim bipo ol bikpela wok i stat, ol i mas pastaim stretim ol skwata setelmen lain i stap long dispela hap. Na ples we ol Labu pipel i save kam sua long kanu bilong ol na putim ol kanu i stap.

Tasol ol arapela wok olsem jioteknikel wok painimaut i stap pinis. Kontrakta, Paradais Driling i kamap pinis na statim



**LUKLUK LONG LAE BRIS:** Poto bilong Lae Bris nau wantaim eria ol setelmen na kanu eria we ol i laik karimaut ol wok long nupela Lae Bris prosek.

wok drilling long namba wan bohul. Bai em i kisim namel long 5 na 6-pela mun long pinisim dispela wok.

Bai ol i mas wokim Prosek Monitaring Yunit (PMU) opis bikos dispela em opis we Prosek Dairekta na ol woklain long prosek bai stat long wok taim PNG PCL menesmen i makim ol.

Long sait bilong sindaun ol setelmen lain husat nau i stap long projek eria, em bai i no nap kamap inap ol i painim nupela eria na Esia Dvelopmen Beng (ADB)hust i givim mani long karimaut wok i glasim ol samting na givim tok orait bilong em.

Tasol Risetelmen opisa, Sakias Gem i lukautim olgeta samting i sut long graun wantaim ol tumbuna papagraun

lain, Morobe Provinsel Administresen na Semba bilong Komes.

Graun we ol i laik mekim wok developmen long Lae Bris aninit long Lae Taidel Besin Dvelopmen Prosek em i stet graun na PNGPCL i kisim pinis lis na taitel long em.

Ol bai wokim ol dispela nupela Lae Bris wok long eria we ol Makam Wara tais na Sodas setelmen lain i stap long en. Bikos em i stet graun, ol dispela setelmen i brukim lo na sindaun long hap.

Ol i karim ol planti aweanes progrem long skulim ol olsem ol bai sindaunim ol long narapela nupela ples bikos long dispela nupela Lae Bris prosek we ol i laik go hetim.

Wok long rausim pipel long ples ol i stap long en bai gat

long em rausim ol haus, ol diwai ol i bin planim na ol gaden bilong ol dispela setelmen lain.

ADB i laikim risetelmen progrem o sindaunim ol setelmen pipel long narapela hap i mas kamap pastaim bipo ol wok bilong sanapim prosek i stat.

Ol i tok orait pinis long nupela ples bilong sindaunim ol setelmen lain tasol ol i no stretim fanding bilong dispela wok wantaim nesenel gavman.

Hap long ol Labu pipel i kam sua na putim ol kanu bilong ol i stap long wes sait bilong nau Lae bris i stap long en.

Ol Labu pipel i yusim tu dispela eria long wokim maket na olsem ples we ol i save stap long en taim ol i laik i go na i kam long taun na ples.

Ol Labu pipel i autim wari olsem longpela taim nau ol i wok long surukim ol nabaut long ples we ol kanu bilong ol i save go sua long en.

Ol i luksave pinis long wanpela eria bilong kanu bilong ol Labu pipel i sua long en, tasol kos i antap tumas. Olsem na long dispela taim, PNGPCL i wok long toktok wantaim gavman long helpim wantaim fanding bilong dispela projek na tu, risetelmen prosek.

## Tok Sori

Menesmen, ol wokmanmeri na olgeta famili bilong Word Publishing Company Ltd na Wantok Niuspepa i laik salim bikpela tok sori bilong ol i go long famili bilong Leit Alphonse Pu.



Alphonse i bin wanpela saveman long raitim tok pisin nius insait long Wantok Niuspepa na i bin strongim tru spot taim em i bin wok olsem spot administreta.

Inap Bikpela i givim luksave long yu long laip oltaim.

**Nambawan Super**

"We care for your future"

**Nambawan Super Limited formerly POSF Limited is moving ahead with Superannuation in Papua New Guinea.**

With diverse membership from both the Public and Private sectors, Growing members retirement savings is our priority.

Era Rumana Building, Champion Parade  
P.O. Box 483, Port Moresby  
Papua New Guinea  
Telephone (675) 309 5200  
Facsimile (675) 321 4474

# Yumi ken skulim yumi yet

**Sape Metta i raitim**

BIKPELA toktok na pasin bel kros i stap nau long wanpela sios trening senta long Oliguti stesin insait long Lufa Distrik long Isten Hailans Provins we i stap nating na ol lain husat i go pas long lukautim dispela senta i no yusim gut inap planti yia i go pinis.

Dispela senta i gat olgeta fasiliti olsem klasrum, haus slip bilong ol sumatin na ol trena (tisa), woksop, administresen opis na ol arapela samting moa i stap pinis long en we ol manmeri bai ken yusim long kisim trening. Tasol dispela i no kamap na dispela senta i stap nating.

"Nau em i taim we yumi mas yusim dispela senta long givim trening long ol yangpela manmeri bai ol i ken strongim wok bilong sios namel long ol hauslain na viles komyuniti, distrik, rijen na provins na long kantri tu. Bilong wanem na dispela senta i stap nating olsem?"

Dispela em sampela strongpela toktok lokal viles komyuniti lida na mausman bilong Yagara

hauslain, Barnabas Yanepa, i bin mekim long wik i go pinis.

Senta em Felosip bilong Nesenel Baibel Sios (FNBC) i go pas long lukautim. FNBC em i wanpela han sios bilong New Tribes Misin.

Mista Yanepa i tok Nu Traibs Misin (New Tribes Mission) em i wanpela bikpela ogenaisesen we i kam long Amerika na sindaun long Papua Niugini (PNG) na mekim wok misin.

Sapos Nu Traibs Misin i ken i go pas long lukautim FNBC orait mi laik salensim ol tu long i go pas long trenim ol trena na woklain na ol tisa tu long kamap na kirapim gen dispela Felosip bilong Nesenel Baibel Sevises Trening Senta na kamapim tu ol trening progrem we ol i ken trenim ol yangpela manmeri na ol sios wokman tu long strongim ol sios wok long PNG, Mista Yanepa i tokim *Wantok Niuspepa*.

Em i tok planti yangpela manmeri na yut long Lufa na ol arapela distrik long Isten Hailans i soim sampela laik long kisim

trening long dispela senta.

Ol i redi, tasol ol i no inap kisim ol trening long wanem nau yet i nogat ol tisa, trena na ol woklain long givim tising na trening sevis long ol.

Mista Yanepa i tok em i gat bikpela laik tru long lukim wanpela trening senta i ms kirap na ron gen.

Nau yet, bihain long kisim dispela ripot, *Wantok Niuspepa* i kamap long Jim Turner husat em wanpela elda i go pas long wok misin wantaim Nu Traibs Misin na i kisim ripot long em we em i tok, long lukautim dispela trening senta em i hat tru long wanem em bai kos bikpela mani tru bilong mitim kos bilong ol skul samting na tu long peim ol wokmanmeri ol potnait pe na planti ol arapela samting long i go het long ranim dispela trening senta.

Mipela i luksave long nid bilong ol yangpela long kisim trening, na mipela i gat bikpela tingting long givim sapot long ol we mipela i ken trenim ol gut. Tasol long painim mani long ronim dispela senta em i hat, Mista Turner i tok.

# Isten Hailans tok tenkyu long ol sekyuriti fos

**James Kila i raitim**

PLANTI ol manmeri na ol memba bilong pablik long Goroka na ol distrik long Isten Hailans Provins i bin sori las wik Fonde na Fraide taim ol sekyuriti fos i bin lusim Goroka.

Long las wik Fonde moning, planti ol yut na ol yangpela i bin sanap arere long rot na tok gutbai long ol Platun namba 8 bilong Igam Ami Bareks long Lae, Morobe Provins.

Ol dispela soldia i bin putim strongpela was tru long ples bilong kaunim vo long Nesenel Spot Institut (NSI) long Goroka.

Planti ol pipel long Goroka taun na tu long provins i tok stap stap bilong ol dispela ami na tu ol polis mobail skwat namba 8 bilong Kerowagi na Skwat 12 bilong Laiagam i bin mekim na nogat trabel na hevi i bin kamap long taim bilong poling na kaunim long ol distrik na Goroka taun.

Isten Hailans Polis Komanda Supaintenden Philip Solala i bin redim mumu kaikai long Fonde bilong ol lain soldia na long Fraide apinun em i mekim wankain taim em i bung na serim mumu kaikai wantaim ol lain polis man bilong mobail skwat 8

bilong Kerowagi.

Mista Solala i makim maus bilong olgeta pipel bilong Isten Hailans long tok tenkyu tru i go long ol polisman na ol soldia husat i mekim gutpela wok tru long kamapim strongpela sekyuriti long taim bilong ileksen long Isten Hailans.

"Mi givim tok tenkyu tu i go long ol famili bilong ol wan wan polisman na soldia.

"Ol meri na pikinini bilong ol dispela polisman meri na ol ami i bin sakrifais tru long lusim ol papa o mama bilong ol i go long mekim wok bilong gavman long narapela provins," em i tok.

Mista Solala i tok ol polis i mas karim tok tenkyu bilong em olsem Komanda long Isten Hailans na tu ol pipel bilong EHP i go long ol meri na pikinini bilong ol.

Planti ol lain long Seigu Yunaited Sios we ol ami i bin stap i sori tru long ol bikos taim ol i stap long hap ol i bin mekim gutpela pasin long serim buai na smuk wantaim ol lain long hap. Wankain tu em ol lain long Mambu na FAniufa i bin sori tru taim ol lain bilong Skwat 8 bilong Kerowagi i lusim Goroka long las wiken.

# MP Silupa laik karim sevis go long Lufa

**Sape Metta i raitim**

MEMBA bilong Lufa, Yawa Silupa em ol pipel long ilektoret bilong em i votim em i go bek long palamen long narapela 5-pela yia i gat bikpela laik long lukim rurel ilektrifikesen o pawa na tu mekim inap gutpela rot we wok i stat pinis long en long distrik na i go olgeta long Lufa stesin bipo long 2012.

"Olsem memba, mi bai go het na wok hat long pusim ol gavman ejensi na opis bilong mi bai mekim komitmen long lukim wok bilong pawa na rot projek i mas i go het. Dispela tupela prosek i bikpela samting we bai i ken givim helpim na gutpela sevis long ol pipel bilong Lufa Distrik," Mista Silupa i tok.

Em i tok mentenens o wok stretim long ol arapela liklik han rot na ol bris tu bai ken kisim helpim na fanding long opis bilong em.

Na em i mekim komitmen o tok promis long givim 10 pesen (%) long olgeta ilektoret mani bilong em i mas go long ol sios insait long distrik.

Mista Silupa i tok James Yanepa Memoriel hai skul, ol praimer na elementeri skul na Gotomi vokesenel skul bai kisim helpim tu bikos em i wanpela polisi bilong em long humen risos developmen.

Em i tok opis bilong em bai givim helpim tu i go long helt sevis we em i gat bikpela tingting nau long baim ol marasin na tu ol kar, na donetim i go long ol distrik helt wokas we ol i ken yusim long givim sevis long ol pipel long Lufa.

# Wenge tromoi spia long midia

**James Kila i raitim**

GAVANA bilong Morobe, Luther Wenge i sutim spia i go long midia o niuslain long noken wansait na givim stretpela ripot olgeta taim.

Mista Wenge i bin sutim tok long midia olsem ol i no mekim gut wok long ripot bilong ol long namba bilong ol memba husat i stap long Kokopo long sapotim Nesenel Alaiens (NA) kem na Praim Minista Gren Sief Sir Michael Somare.

Planti ol manmeri insait long Papua Niugini (PNG) husat i lukluk long TV bilong ol long Mande i bin lukim long TV na harim Mista Wenge i toktok strong tru long wok bilong ol nius o midia. Em i givim strongpela salens

tru long lokol midia.

Em i tokaut strong tru olsem ol riuslain i mas mekim gutpela na stretpela ripot bilong ol. Dispela em bikos olgeta manmeri long kantri bai harim ol ripot ol midia i givim.

Mista Wenge i bin givim dispela ol toktok long salensim midia long kantri taim em i bin sanap long kirap bilong namba 8 Nesenel Palamen long Mande long givim tok amamas bilong em na pipel bilong Morobe i go long Spika Jeffrey Nape na Sir Michael.

Mista Wenge i tokaut strong tru olsem gavman i mas kamapim wanpela televisen stesin bilong em yet. Taim dispela i kamap, em bai givim fea ripot long wok bilong gavman, we ol pipel bilong kantri i mas save.



**Nambawan Super**  
LIMITED

Kam na painimaut rot we yu ken bihainim long kamap memba bilong namba wan Suparenuesen Fan long Papua Niugini na ol gutpela samting yu ken kisim taim yu stap olsem wanpela memba.

Nambawan Super, em bipo POSF, i singautim ol bisnis, bosman, wokmanmeri, na ol lain i save kontribut nau na tu long jeneral pablik, long kam stap long wanpela



Bank South Pacific

**OPEN DE**

long

Holiday Inn Pot Mosbi long

Fraide Ogas 24, 2007.

8 kilok moning i go inap

4 kilok apinun.



Post PNG  
GOING PLACES



KINA

Long kisim moa toksave, ringim

Employer Relations Officer long

telepon 309 5270, o

Misis Tambua Kariko long

telepon

309 5270, feks 321 4474 o salim

email i go long

[flokalyo@nambawansuper.com.pg](mailto:flokalyo@nambawansuper.com.pg)



PSTC



KINA



AIDF

We care for your future

**Sape Metta i raitim**

MEMBA bilong Lufa, Yawa Silupa em ol pipel long ilektoret bilong em i votim em i go bek long palamen long narapela 5-pela yia i gat bikpela laik long lukim rurel ilektrifikesen o pawa na tu mekim inap gutpela rot we wok i stat pinis long en long distrik na i go olgeta long Lufa stesin bipo long 2012.

"Olsem memba, mi bai go het na wok hat long pusim ol gavman ejensi na opis bilong mi bai mekim komitmen long lukim wok bilong pawa na rot projek i mas i go het. Dispela tupela prosek i bikpela samting we bai i ken givim helpim na gutpela sevis long ol pipel bilong Lufa Distrik," Mista Silupa i tok.

**James Kila i raitim**

GAVANA bilong Morobe, Luther Wenge i sutim spia i go long midia o niuslain long noken wansait na givim stretpela ripot olgeta taim.

Mista Wenge i bin sutim tok long midia olsem ol i no mekim gut wok long ripot bilong ol long namba bilong ol memba husat i stap long Kokopo long sapotim Nesenel Alaiens (NA) kem na Praim Minista Gren Sief Sir Michael Somare.

Planti ol manmeri insait long Papua Niugini (PNG) husat i lukluk long TV bilong ol long Mande i bin lukim long TV na harim Mista Wenge i toktok strong tru long wok bilong ol nius o midia. Em i givim strongpela salens



**YUMI  
na  
HIV  
wantaim**



**Fr Jude Ronayne Forde OFM**

**Bagarapim meri na HIV**

I gat planti stori long man i bagarapim ol meri nau. Tupela bikpela stori yumi i bin ritim na toktok long en long dispela mun em long sait bilong politisen na long sait bilong spot. Long 2007 Nesenel lleksen ol pipel i makim pinis wanpela man bilong kamap memba bilong ol, tasol dispela man i kalabus pinis bikos em i bagarapim wanpela yangpela meri. Na las wik tasol sampela ol ragbi lig pilaia husat i save pilai long SP Kap i kalabus wetim kot i kamap bikos wanpela meri i sutim tok long ol olsem ol i reipim wanpela meri. Dispela samting i tru o nogat? Long olgeta wik i gat stori long sampela lain man i bagarapim meri. Mi harim wanpela yangpela boi i stori long em i save raun nating wantaim ol poroman bilong em bilong painim na reipim ol meri. Em pilai bilong ol!

Reip i olsem, man i mekim pasin pamuk wantaim meri na meri i bin tok em i no laik. Em i olsem, man i fosim meri na bagarapim em. Meri i gat rait long bosim bodi bilong em na sapos em i tok nogat - em nogat nau. Na sapos man i go het na mekim samting long laik bilong em yet - sori, em reip nau.

I gat lo i was long dispela na wanpela i mekim dispela pasin nogut long narapela bai kamap long kot bilong kantri na go kalabus. Na tu, man i mekim olsem em brukim lo bilong God. Dispela em i bikpela sin tru, na man i mekim dispela pekato bai kamap long kot bilong God.

Yupela ol meri, sapos dispela pasin nogut i painim yupela - kwiktai yu mas go lukim dokta. Sapos HIV, binatang bilong sik AIDS i stap, i gat marasin i ken banisim HIV long go insait tru long bodi long taim bilong reip. Tasol yu mas dring dispela marasin hariap - insait long wanpela o tupela de.

I gat stori long 4-pela man i repim wanpela meri long POM. Ol i wokim pasin nogat pinis na meri i tokim ol: "Tenkyu tru! Mi amamas long serim sik AIDS bilong mi wantaim yupela." I no longtaim wanpela bilong ol 4-pela i dai.

**UPNG kisim ol buk**

**Veronica Hatutasi  
i raitim**

ASKIM i go long ol Earth Science Dipatmen sumatin o sumatin i stadim Jioloji long Yunivesiti bilong Papua Niugini (UPNG) long Mosbi long yusim gut ol refrens buk long helpim ol long skul na wok bilong ol, na long ol i rit planti bikos man i rit bai lainim planti samting.

Mick McWalter, Seketari bilong Ameriken Asosiesen bilong Petroleum Jiolojis (AAPG) i tok olsem taim em i donetim ol refrens jioloji buk i go long ol Earth Science Dipatmen sumatin las wik Tunde insait long wanpela liklik seremoni long UPNG yet.

AAPG em i wanpela intanesenel profesenel ogenaesen bilong ol jiolojis i gat samting olsem 34,000 memba long Amerika na wol husat i laik promotim wok long petroleum jiolojis. Wanpela bikpela samting we dispela Asosiesen i sapotim em long helpim ol yangpela profesenel na sumatin. Aninit long edukesenel program bilong em, APPG i gat visiting leksara program we em i save salim ol profesenel leksara bilong givim ol spesel leksa long ol yunivesiti. Em i gat sumatin sapta program we ol sumatin i ken kamap ol memba na i gat grent program we ol sumatin i ken wokim pos greduet

risets na buk donesen program.

Mista McWalter i tok planti ol jiolojis i bin kamap memba long APPG long yangpela bilong ol i wok long taim bilong eksploresen long 1970's na 1980's i wok long go lapun nau tasol nogat planti yangpela i wok long kamap ol memba long petroleum binis o long AAPG. Olsem na taim ol lapun ol i stap nating na ol dispela buk em ol i givim olsem donesen long ol yunivesiti insait long ol

tet wol kantri olsem PNG we ol i bungim hevi long mani long baim ol refrens buk we i kos bikpela mani tumas.

"Tude, mi amamas long makim APPG na donetim ol dispela buk i go long yupela ol Jiosains sumatin bilong UPNG.

"Ol buk i olsem ki bilong lainim na kisim save na mi amamas olsem AAPG i wok long helpim OPNG na Earth Science Dipatmen long UPNG," Mista McWalter i tok.

Mista McWalter i tok amamas long olgeta lain husat i bin wok wantaim AAPG long kisim ol buk i kam long PNG. Vais Sansela bilong UPNG, Profesa Ross Hynes i tok tenkyu long Mista McWalters na APPG long ol buk i tok Earth Science Dipatmen na ol sumatin i laki tru long kisim dispela buk donesen we i bikpela mani tru, na dispela ol buk bai helpim gut ol sumatin long skul bilong ol.

**Givim long lewa**

OPEN Hat 2007 operesen i bin pinis long las Fraide wantaim ol dokta i karimaut 53 operesen long ol pikinini na liklik lain bikpela manmeri.

Olgeta operesen i bin go gut na ol dokta bilong Australia i go bek long Sande.

Nau yet, fanresing wok i go het na bikpela samting we Open Hatt Fanresing Komiti i laikim em long baim ol mesin we Pot Mosbi Jenerel Haus Sik bai papa long em na ol dokta i ken kam na wokim operesen long ol.

Long dispela taim, ol dokta long Australia i save karim sampela ol bikpela mesin i kam na dispela i kostim bikpela mani long baim kago long balus long en.

Long helpim fanresing wok Ela Motors kar kampani long las Fraide i bin donetim tupela nupela Hailax i go long Operesen Hat komiti long Mosbi. Tupela kar we prais bilong ol em K55,000 na K63,000 em Boroko Motors i givim long diskaun prais long ol.

Komiti i putim tupela kar long rafel i go long pablik. Ol i salim wanpela rafel tiket long K100 tasol man husat i win bai autim tupela kar wantaim. Ol i gat 4,000 rafel tiket long salim.

Sidni Ewentis Hopitel i bin statim Operesen Hat long PNG long yia 1995. Long Australia, wanpela operesen bai kostim namel long K70,000-K80,000 tasol long PNG, ol dokta i volunfia long mekim wok wantaim nogat pe long en.



Whatever your education or work experience, CIC has Training for YOU

**TRAIN FOR SUCCESS IN 2007!**

Gain accredited awards and skills to secure a good job, high pay, security, respect. CIC Training includes easy-to-master Study Materials, expert Guidance, Tests & Model Answers, Exams, Award, Registered Despatch, CIC Members' website.

**International Diplomas (£170 or US\$350)**

- \*Accounting, Hotels, Travel & Tourism, Computers & IT, Economics
- \*Sales & Marketing, Global Marketing, Advertising, Public Relations
- \*Business, Management, Human Resource/Personnel, Administration
- \*Insurance, Secretary, Purchasing, Project Management, Banking
- \*Leadership, Employee Development, Business Start-Up, Strategy
- \*Business English, Office, Communication, International Business
- \*Advanced Management, Organisational Behaviour, Stores & Stock

BA Programmes: BBA, BFA, BMA, BCom, BA Eng; MBA

- \*Business, Finance, Human Resources, Marketing, English
- \*Commerce, Administration, Organization, Development

Write, fax or email for a FREE Prospectus to:  
**CAMBRIDGE INTERNATIONAL COLLEGE**  
PO Box 1378, Southampton, SO17 3WX, Britain  
website: [www.cambridgecollege.co.uk](http://www.cambridgecollege.co.uk)  
email: [info@cambridgetraining.com](mailto:info@cambridgetraining.com) Fax: 00 44 1534 485071

Papua New Guinea National Training Council Approved Training Provider



**TOYOTA LAND CRUISER**

**SERVICE SPECIALS**



PICKUP - 79 MODEL Heavy Duty 4x4 Pickup 2 DOOR - 78 MODEL 4x4 Troop Carrier 3 DOOR - 76 MODEL 10 Seater 6x4

"C" Service includes replacement of:

- ✓ OIL FILTER
- ✓ AIR FILTER
- ✓ FUEL FILTER
- ✓ ENGINE OIL
- ✓ TRANSMISSION OIL
- ✓ DIFFERENTIAL OIL
- ✓ TRANSFER CASE OIL
- ✓ CLUTCH FLUID

**ONE PRICE NATIONWIDE**

**A SERVICE K319**    **B SERVICE K749**    **C SERVICE K1699**

Plus, FREE 40 Point Inspection Check!  
**BOOK NOW!**

CALL YOUR FIRST CHOICE SERVICE DEPARTMENT TODAY OR BOOK ON-LINE : [www.elamotors.com.pg](http://www.elamotors.com.pg)

**NATIONWIDE**

Offer Expires : 31/08/2007



**Ela Motors SERVICE & PARTS**  
Your First Choice



# STORI TASOL



wantaim

**FR. PAUL LIWUN. SVD**

## SAYA ANAK INDONESIA

Dispela het tok em i tok ples Bahasa Indonesia. Long Tok Pisin yumi tok, MI PIKININI BILONG INDONESIA. Mi bin lukim na ridim dispela tok long Sande, Ogas 12, 2007, taim mi bung wantaim ol pikinini bilong Indonesia long amamasim Nesenel De bilong Pikinini long Korobosea, Haus bilong Ambaseda bilong Indonesia, Bom Soerjanto.

Planti pikinini bilong Wes Papua tu i bin kamap na amamasim dispela de tu. Olgeta i bin putim ol t-siot we long baksait i bin I gat dispeal tok, SAYA ANAK INDONESIA. I luk olsem olgeta i praud na tok mi amamas olsem mi Pikinini bilong Indonesia.

Em I wanpela bikpela de tru, bikos klostu 500 pikinini i bin bung wantaim ol papamama bilong ol. Ol i bin statim wantaim asembli long fran bilong Haus bilong Ambaseda. Insait long asembli ol i bin singsing planti singsing long Bahasa Indonesia. Ambaseda Soerjanto i bin tok amamas na welkamim olgeta pikinini i kam long ples bilong em. Em i tok: "Tude long Indonesia, olgeta pikinini stat long Sabang long Not Sumatra Ailan, long wes hap bilong Indonesia, i go inap long Merauke, long Irian Jaya, Wes Papua, long Is hap bilong Indonesia, i selebretim nesenel de bilong pikinini. I gat kankain ektiviti ol i wokim tude long wan wan ples bilong ol yet. Sampela i singsing, danis, wokim kem, kalapim maunten, pilai sport na kankain moa."

Wankain samting i bin kamap long Korobosea tu. Bihain long Asembli, olgeta pikinini wantaim sapot bilong ol papamama bilong ol i bin pilai kankain gem, kwis na narapela ektiviti inap long 5 kilok long apinun.

Ol i amamas moa yet taim ol i harim Ambaseda i tok olsem olgeta pikinini bilong Wes Papua, long dispela Nesenel De bilong Pikinini bilong Indonesia, em i welkamim olgeta husat i laik go bek long Wes Papua na bungim yangpela jeneresen long hap na wokim kamap Wes Papua kamap naispela olsem wanpela provins bilong Indonesia.

Ambaseda i tokim ol pikinini bilong Wes Papua olsem i gat planti gutpela sans bilong ol long kisim gutpela edukesen bilong helpim ol long kamapim gutpela laip bilong ol bihain na tu long kamap gutpela sitisen bilong Indonesia.

# Gutnius long Yagaria

Sape Metta i raitim

*Moa long stori long wok-abaut na wok bilong Carol Kaptain, meri i bin tanim Baibel i go long tokples Yagaria long Isten Hailans Provins we ol i bin makim autim bilong en las wik. Namba wan hap long stori i bin kamap long las wik.*

**L**ONG 1966, Carol i mekim lukluk raun i go long ples Haga long Lufa distrik yet na i luk save olsem ol ples lain long hap na ol arapela wanpisin ples na hauslain i gat nid tru long ridim Baibel long tok ples bilong ol stret.

Tupela yia bihain long karimaut wok stadi long tok ples Yagaria, Carol i stat long tanim tok ples long 1968.

Taim em i bin stat long wokim ol trenslesen wok, tupela asples man long Oliguti i joinim em long karimaut dispela wok.

Long 1977, wok long tanim tok i pinis na ol i kamapim na prininim 1,100 Baibel na ol bin salim olgeta i go aut.

Long wankain pasin long 1985 ol i kamapim na printim narapela 500 na ol manmeri i baim na i pinis. Orait long 1990 ol i prininim 1,000 na dispela tu em i pinis.

Bihain long dispela Carol i bin kisim tingting long kamapim tupela tok ples long wanpela buk. Tok ples Yagaria na Tok Inglis.

Dispela tingting bilong em i karim kaikai bihain long planti hat wok we em yet na 6-pela arapela asples lain man long Oliguti i bin sindaun wantaim



Tanim Tok: Carol (namba 4 long raitan, insait) na ol trensleta i soim ol buk Baibel em ol i bin tanim long tok ples Yagaria.

na wok inap narapela 14 krismas. Long 2004, olgeta wok long Tok Inglis na tok ples Yagaria em ol i tanim na i pinis.

Dispela i bin kamap wantaim helpim bilong Sama Institut bilong Lingwistiks (Summer Institute of Linguistics o SIL) long Ukarumpa. Bihain long narapela tripela krismas long wok stretim gut na prininim long ovasis, dispela nupela vesen buk Baibel i kamap na ol i karim i kam long Oliguti na amamasim pinis bilong em long wanpela seremoni we i pulim planti lain manmeri husat ol i bin kamap na selebret long lukim buk Baibel long tok ples Yagaria.

Nupela buk Baibel em ol lain

Korean Baibel Sosaiti i prininim.

Carol i tok em i amamas long lukim olsem olgeta wok em i bin gat tingting long mekim kamap long Yagaria na Lufa distrik em i pinis.

"Mi bin kamap long PNG na wok bilong mi long tanim Baibel i go long tok ples Yagaria em i pinis. Mi bin statim dispela wok taim mi bin gat 20 krismas. Nau krismas bilong mi i abrúsim mak bilong 60 olsem na mi mas ritaia na go bek long Indiana long Amerika. Tasol mi no inap lusim tingting long Yagaria," Carol i tok.

Em i tok amamas long FNBC lida, Iteve Amole na ol kongregesen bilong em na ol

arapela ges olsem Pasto Kumuro Vira bilong Nesenel Foskwea sios na sinia klejiman - Jim Turner na Kada Bugave (PNG Baibel Society) representativ na 80 intanesenel ges husat i bin kamap na stap long lukim na selebret long dispela seremoni.

*Kos bilong wan wan long dispela Nupela Testamen buk Baibel long Tok Inglis na tok ples Yagaria vesen em K15.00. Sapos yu i laik baim yu i ken i go long FNBC misinari trening senta long Oliguti na lukim Amole Iteve long baim na kisim Baibel bilong yu. O yu i ken ringim em long mobail telipon namba, 696 9792 na mekim oda bilong yu.*

# APPA pulim ol bikpela gavman lida

Veronica Hatutasi i raitim

**SAMPELA** bikpela gavman lida bilong Pasifik bai kam long All Pasifik Preia Asembli (APPA) bung we bai kamap long Mosbi neks wik.

Deputi Praim Minista bilong Vanuatu, Ombudsmen bilong Vanuatu na Kuk Ailans em tripela long ol bikman we tok i stret pinis olsem ol bai kam, PNG kantri kodineta bilong APPA, Reveren Robert Sanasi i tok.

Em i tok PNG i kolim em yet i wanpela

Kristen kantri na i gutpela sapos ol lida bilong yumi i tingim olsem dispela bikpela sios bung i stap.

Em i tok wantaim nupela gavman i kam insait nau tasol, em i moabeta long ol lida long mekim ol wok na disisen long kliapela rot na i no long hait pasin we bai sevim pipel.

Reveren Sanasi i askim strong ol yut long kam insait long ol wok na program bilong dispela bikpela preia bung.

Em i amamas olsem 140 yut bilong Lae bai lusim hap long sip i kam long

Popondetta na wokabaut i kam bihainim Kokoda rot i kam olsem long Mosbi long stap insait long APPA.

Long wankain taim, Pasifik Kodineta bilong APPA muvmen, Pasto Emmanuel Fave i tok ol yut em ol bikpela eksport (export) bilong kantri bilong yumi.

"PNG em i narakain kantri tru na ol yangpela pipel i ken kamapim senis na gutpela piksa long ai bilong wol," Pasto Emmanuel i tok.

Em i tok olsem taim ol yangpela i pulap long Holi Spirit, senis bai kamap na ol bai



TELIKOM PNG LIMITED  
"your communication company"

## OL GUTPELA SEVIS OFF-PEAK

**Seivim 50% lon ol fon bills inap 14hrs lon wan wan dei na ful dei lon Sandei lon ol mobile na telefon lain!**

Off-Peak Rates Monday to Saturday 5:30pm to 7:30am & All day Sunday.

BAND 1 KANTRI  
NA DOMESTIK KOLS  
TASOL

Email: [hotline@telikompng.com.pg](mailto:hotline@telikompng.com.pg)

KISIM MOA TOKSAVE LON OL TELIKOM BISNIS OPIS STAP KLOSTU LON YU.





# Lik lik prais tru long kol

Sevim inap long 40% long olgeta  
mobail kol wantain Digicel

## Nambawan Veliu!

# Digicel™

Expect More. Get More.

# Stretim trenspot sevis bilong Mosbi siti

# Tok klia long sanap bilong Australia



**WOK MANI:** Wanpela PMV bas 4 pulap wantaim ol pasindia i bihainim rot bilong em i go. Long hapsait, wanpela meri i stopim narapela kain trenspot, teksi. I gat planti bilong dispela kain trenspot sevis long Mosbi tasol i mas i kamap gutpela moa. *Poto: Nicky Bernard*

**Dia Edita,**  
Mi wanpela man i save stap Mosbi siti na mi lukim olsem publik trenspot sistem long siti em i bikpela tumas nau.  
Gavman na NCDC i no mekim wanpela samting long stretim dispela hevi. Ol i save toktok nating na i nogat wanpela man i gat bun long kirap na mekim samting stret.  
Sapos dispela sevis i no stret bai ol manmeri na skul pikinini go leit long wok na skul olgeta de na developmen na ol wok i no inap kamap hariap.  
Las yia gavman i tok long kisim ol 'Jeepney' (jipni) long Filipins (Phillipines) i kam yusim long hia tasol dispela em i no wanem samting ol pipel i singaut long en.  
I nogat samting i rong long ol bas. Mipela i amamas long kalap long ol bas tasol em sevis bilong ol lain husat i save ronim ol dis-

pela bas tasol em mipela i toktok long en.  
Ol draiva i no save pinisim rot bilong ol na ol manmeri save westim planti mani tru long go long wanpela hap i go long narapela. Na tu'em i no gutpela long laip na sefti bilong ol manmeri. Ol i ken go long wanpela ples nogut na bungim hevi we ol i no inap bungim sapos ol i bin stap insait long bas na go stret long ples ol i laik i go long en.  
Ol papa bilong bas i save tok olsem ol i les long pinisim rot bilong wanem ol pasindia i no save baim gut bas, dispela em i no tru. Ol lain husat i no save baim ful bas fea em ol liklik mangi - husat sampela i gat rait long mekim olsem bikos ol i sumatin - na ol lain husat i no laik go longwe hap. Tasol "mani pes" pasin bilong ol bas i mekim ol i save kraik long moa mani na long dispela as ol i no save laik pin-

isim rot bilong ol.  
Hevi stap long ol polis na trefik opisa tu. Ol i no save raun na sasim ol bilong wanem dispela ol pasin ol i mekim em i brukim lo. Save bilong ol em long mekim rot blok tasol na ol i no save raun long ol bas stop na lukluk long rot long ol dispela hevi  
Gavman o Nesenel Kapitel Distrik Komisnin i mas kamapim wanpela trenspot sistem bilong siti yet we ol profesenol draiva na kru i stap long pe rol, i gat yunifom, gutpela trening na i bihainim lo stret long givim gutpela sevis long ol manmeri. Ol i noken givim tok orait long wan wan man i ronim bas sevis, em i mas wanpela grup o kampani.

**PES NOGUT  
GEREHU  
POM**

## Mekim gut wok

**Dia Edita,**  
Ol lida i mas mekim gut wok bilong ol olsem ol tok promis ol i mekim long taim ol i kempen long ol pipel long votim ol.  
Nau yu kisim sia bilong yu olsem wanpela Momba bilong Palamen (MP).  
Yu i gat wok long mekim na wok mas karim kaikai.  
Ol pipel i bilip olsem yu bai kamapim senis na mekim gut wok na harim kraik bilong ol olsem na ol i makim yu olsem lida long stretim ol hevi bilong ol.  
Maski long mani o pawa.

Tingim. Bikos long ol pipel yu stap long we yu stap long en nau. Sapos i no long ol pipel, bai yu i no inap sanap long Palamen.  
Tingim, yu gat maus bilong toktok, iau long harim kraik, bel bilong mekim wok, han na lek long mekim wok senis na wok-abaut wantaim mipela.

**PNG SITISEN**

## Ol trupela lida

**Dia Edita,**  
Mi bilong Simbu Provins na komyuniti lida long 14 mail long Sogeri rot, Sentral Provins.  
Mi laik mekim sampela toktok i go long 18 indipenden Momba bilong Palamen (MP).  
Yupela husat indipenden memba i stap wantaim Gavana bilong Nesenel Kapitel Distrik (NCD), Powes Parkop, yupela ol lida tru tru bilong mipela.

**PAUL BAULIN NINKAMA  
14MAIL, SENTRAL PROVINS**

**Dia Edita,**  
Ol rida bilong *The National* niuspepa inap long paul taim ol i bin ridim komentri bilong las wik Fonde.  
Long wanpela sait, komentri i kirapim bek ol sut toktok i nogat tru as bilong en olsem Australia i traim long suvim het i go insait long ileksen bilong Papua Niugini (PNG). Na bihain em i sutim tok olsem mipela i tok olsem ileksen em i "samting bilong pipel na palamen bilong PNG".  
Na taim *The National* i save go het long sutim tok nating long Australia i save bagarapim nem bilong PNG, em i no amamas tu olsem mipela i tok amamas long kantri long kamapim wanpela 'fri na fe ileksen'.  
*The National* i ken givim tingting bilong em long dispela hevi bilong Moti Afea, tasol mipela i ken mekim wankain tu. Yumi mas klia long wanem samting i bin kamap. Wanpela askim aninit long lo i kam long wanpela poroman kantri long arestim wanpela long ol sitisen bilong en long ol pikinini seks ofens i no kisim luksave aninit long lo bilong PNG.  
Mipela i no wanbel long dispela yet. Mipela i askim long wanpela klia wok painimaut na wok bihainim long

dispela bihain long Moti i bin ronawe, na mipela bai go het long mekim dispela yet.  
Komentri bilong ol las wik Fonde i tok olsem mipela i wok long suvim het nating long pilai politiks, na tok olsem Moti i bin kamap wanpela asua man bihain long em i kisim makim olsem Atoni Jeneral bilong Solomon Ailans.  
Tru tru stori em olsem, ol wok painimaut Australia i karimaut i go insait long keis bilong Moti i bin kirap long mun Janueri 2005, em wanpela yia pastaim long nau Solomon Ailans Gavman i bin kisim opis long Epril 2006.  
Wanpela warena bilong arestim em i bin kamap long Ogas 11, 2006, em pastaim yet long em i bin kamap Atoni Jeneral long Septemba 21, 2006.  
Sanap bilong Australia long ol dispela hevi i bihainim stret ol tru tru stori. Em i krangi tru olsem *The National* i no mekim wankain.

**LEIGH ARNOLD  
PABLIK DIPLOMASI MENESA  
AUSTRALIA HAI KOMISIN  
POT MOSBI**

# Ai sua long Godons buai maket na bas stop pipia

**Dia Edita,**  
MI GAT wari long Godons bas stop na buai maket i stap tasol long bas stop eria na mi laikim ol atoriti long Nesenel Kapitel Distrik Komisnin (NCDC) i lukluk long en.  
Mi no agensim "infomol sekta" bikos dispela em i givim sans long ol grasrut lain long salim ol samting na kisim mani long en.  
Samting mi agensim em pipia bilong buai i bagarapim tru ples, eria na rot bilong wokabaut i go na i kam long Gordons bas stop long kisim ol Bas rut 4, 7, 15 na 17 long en.  
Ol manmeri na pikinini i wokabaut na pipia bilong skin buai, spet buai na moa i pulap i stap. Na taim manmeri i nogat hap bilong wokabaut, ol i traim long kalapim o wokabaut antap long ol dispela pipia. Na dispela i no gutpela bikos ol pipia na spet i karim sik.  
Tingim haijin o lukautim gut bodi long abrusim sik na stap helti em i bikpela samting long laip na sindaun bilong yumi bikos helti populesen i helpim tru kantri long develop long olgeta eria. Na spet nabaut na spetim buai na ol manmeri na pikinini i nogat slipa o su i krugutum, ol i ken kisim sik TB, binatang bilong AIDS sapos manmeri i wokim spet i gat ol dispela sik.  
Taim mi lukim ples i doti olsem, mi save ting long ples na haus bilong ol yet, pipia i save pulap olsem? Ol pipel i save tingim haijin bilong ol tu?  
NCDC i gat lo bilong ol infomol sekta lain long kipim ples we ol i maket long en i klin.  
Tasol i luk olsem ol lain i salim buai

i no bihainim dispela lo.  
Bai wanem samting i kamap nau?  
Sampela samting we NCDC i ken wokim em long putim ol pipia dram na putim strongpela banis toktok long noken yusim ol dram long tanim i go daun na putim ol buai na smok long salim.  
Inap ol NCDC helti opisa i raun i kam long Godons maket na bas stop eria na moa yet, dispela buai maket hap long bas stop tupela de insait long wanpela wik long karimaut inspeksen long eria.  
Mosbi em i ples bilong yumi olgeta na em i dua bilong PNG na i moabeta long yumi wan wan i lukautim gut.  
Planti ovasis visita na ol bikman i save kam long PNG na taim ol i lukim Mosbi siti, tingting bilong ol i kamap pinis olsem PNG i doti kantri olsem we ol manmeri i no save long haijin.  
Inap nupela NCD Gavana. Powes Parkop i lukluk long ol maket na bas stop eria long daunim tu ol hevi we i save kamap long ol dispela eria, moa yet long Mosbi.  
Moa yet, inap ol i rausim dispela maket long Gordons bas stop na putim long narapela hap bilong baim buai tasol?  
Pablik na moa yet, ol mama, ol pikinini meri na ol pikinini i mas gat fridom long wokabaut i go long maket na bas stop.

**AI I PEN  
GODONS  
NCD**

**OL PAS**  
Yu laik autim tingting bilong yu - Salim wanpela pas i kam long Edita long:  
Ol Pas i go long Edita  
P. O. Box 1982 BOROKO-NCD

Sapos yu save long email, yu ken salim pas bilong yu i kam long:  
[editorial@wantok.com.pg](mailto:editorial@wantok.com.pg)  
Yu mas raitim tru tru nem, telepon namba na pos opis bokis bilong yu. Sapos nogat, mipela i no inap putim pas bilong yu insait long pepa.  
Wantok i gat rait long katim o stretim ol pas bai em i bihainim olgeta lo bilong niuspepa.

**WANTOK**  
**KOMENTRI**

**Taim bilong makim ron bilong wok nau**

DISPELA wik yumi lukim planti bikipela hanmak olsem wok nau i wok long ron insait long wan wan lektoret bilong kantri.

Las wik Fraide, ol memba bilong Nesenel Kapitel Distrik (NCD) i bin mekim tok promis bilong ol long ol opis ol i winim.

Nupela Gavana bilong NCD, Powes Parkop tu i bin wanpela long ol. Na bihain long em i mekim tok promis bilong em, em i mekim sampela strongpela toktok i go long ol pipel bilong NCD.

Namba wan bikipela toktok bilong em i sut long pasin korapsen. Planti taim, Nesenel Kapitel Distrik Komisin (NCDC) we em i administresen bilong Siti Hol (City Hall) opis long Mosbi i save lukim planti kain stil na hait pasin i save kamap.

Nau Parkop i tokaut pinis olsem olgeta dispela kain stil pasin bai pinis olgeta.

Dispela em i wanpela gutpela toktok i kam long em olsem gavana. Ating dispela kain luksave em i givim nau long dispela opis bai lukim ol sevis i go long ol pipel bilong Mosbi siti bai ron gut. Wankain olsem luksave em i tok em bai givim long ol tru tu as ples bilong Mosbi, em ol Motu Koitabu.

Long wankain taim tu, Minista bilong Transpot na Sivil Eviesen na Memba bilong Kandep, Don Polye tu i bin tokaut las wik olsem ministri na dipatmen bilong en bai go het long karimaut planti ol bikipela woks plen bilong gavman.

Wanpela long dispela em long opim NCD i go aut long olgeta arapela provins. Long mekim dispela, ol toktok bilong pulim rot long Mosbi i go antap long olgeta arapela provins long bik ples PNG.

Planti ol arapela nupela na olpela lida wantaim tu i wok autim ol tingting bilong ol long mekim wok nau.

Long dispela taim, i mas i gat luksave tu olsem olgeta wok ol i laik mekim, i mas ron long wankain mak na i mas i gat wankain luksave namel long ol dispela bikipela wok.

Sapos Mista Polye i laik opim Mosbi i go long ol arapela provins long bikples PNG, em i mas kisim tingting tu bilong ol memba bilong NCD na Sauten rijen pastaim.

Na long strongim ol dispela wok, i mas i gat luksave long sait bilong ol lo i bosim ron bilong dispela kain wok, na ol lo i ken daunim ol hevi i ken kamap sapos i gat planti ol manmeri i wok lusim ol ples bilong ol long painim ol sevis long ol taun na siti.

Dispela hevi i stap bipo yet na i stap nau tu.

Em i gutpela olsem sapos gavman i mekim ol rot long bungim olgeta ol dispela longwe ples, bai ron bilong wok bisnis na agrikalisa bai kirap moa yet.

Tasol yumi noken lus tingting long ol hevi dispela kain ol progrem i ken kamapim long sindaun bilong ol pipel.

I mas i gat balens o wankain mak long sait bilong mekim mani, na long sait bilong lukautim gutpela sindaun bilong pipel.



Jada 071

**Opim mobail telepon sevis long ples**



PULIM telepon waia i go insait long ol ples em bai bikipela hatwok tru na bai kisim longpela taim tru na bai Telikom i yusim planti masin, ol kar na ol wokman long mekim wok. Olsem na moabeta Telikom i ken tingting long opim dua long mobail telepon long ol asples i ken yusim.

Ating bikipela piksa Papua Niugini (PNG) i mas lukluk long en em rot bilong salim toktok go kam long telepon sevis insait long ol taun na ol ples tu wantaim. Olsem na rot bilong pulim telepon waia go long ol ples em bikipela hatwok tumas. Tasol mobail telepon em yu karim raun long poket na ring isi tasol. Em i isi moa.

Yumi lukim na harim dispela sut toktok namel long Telikom na Dijisel (Digicel) mobail telepon kampani pinis. Dijisel i kam insait long PNG na mekim planti kainkain senis bilong ol na i pulim ai bilong planti manmeri.

Tasol Telikom tu stat long givim aut ol spesel sevis bihain long Dijisel i kamapim resis long dispela mobail telepon sevis.

Tupela nau i traim long kamapim wanbel long Telikom telepon i ken ringim Dijisel telepon. Dispela wanbel i no kamap yet tasol tupela bai paitim toktok yet.

Yumi ken lukim olsem dispela tupela kampani i resis long sait bilong mekim mani na bisnis. Tasol sevis ol pipel mas kisim long en em narapela samting yumi mas sanap na toktok moa antap.

Pipel laikim sevis i mas kamap na kos bilong em mas daun liklik na tu ol laikim bai dua i op long ol ken ringim ol famili bilong ol long ples na taun o ovasis tu.

Las wik wanpela wanwok bilong mi long Mosbi i bin ringim meri pikinini bilong em long Goroka yusim Dijisel mobail telepon na mi ai op tru long em yusim olsem 50 toea tasol. Long yusim Telikom telepon sevis bai dispela wanwok inap tromoi olsem K3.00 samting long toktok wantaim meri pikinini bilong em long Goroka.

I luk olsem Dijisel i daunim tru kos bilong em long mobail telepon sevis bilong em. Tasol yumi noken kalap nogut bikos em pasin bilong ol nupela bisnis husat laik kamap na pulim moa kastoma pastaim. Dijisel i laik mekim moa kastoma i amamas na kam long em olsem na em mas daunim kos na prais bilong em.

Tasol yumi lukim olsem sevis yumi ken yusim em i gutpela moa bikos yu ken ringim famili bilong yu long ples o Australia o wanem hap ovasis kantri ol stap long en.

Ol asples Hula i tokaut las wik olsem nau ol i no inap hatwok long go long Mosbi long lukim famili bilong ol. Ol bai stap tasol long ples na ringim ol.

Em kain sevis olsem mipela tok long en long mekim laip na wokabaut bilong pipel go isi long salim walis o toktok go kam long hevi o ol toktok bilong famili.

Yumi mas tingim PNG olgeta na kamapim kain sevis olsem. I no Mosbi, Lae, Rabaul na Goroka tasol. Sevis olsem mas go insait tru long ol asples long ol mas kisim.

Dispela tu bai daunim sampela hevi gavman bilong yumi laik kamapim olsem rurel komyunikesen sevis. Nau Telikom i no ken hatwok long digim graun na pulim waia go insait long bus. Stap isi tasol long opis na ring tasol bikos telepon stap pinis long han bilong ol manmeri na ol karim raun i stap.

**Sios em i ol manmeri o famili bilong God**

Jisas Kraus em i wanpela tasol em i as o pos tru bilong dispela haus bilong God (1Ko: 10-11). Em i pos tru bilong haus na "Olgeta bun bilong dispela haus i pas long Kraus olsem na olgeta i pas gut wantaim. Na God i wokim yet dispela haus na haus i laik kamap bikipela moa na i stap haus bilong bikipela yet." (Efesus 2:21).

Olgeta Kristen i olsem ston i gat laip. God i save kisim ol na yusim ol bilong wokim naispela haus bilong em (1Pi 2:5; Ef 2:220).

Olgeta sios long ples i mas mekim pasin i Holi na klin na bai ol i stap gutpela ples inap long spirit bilong God i ken i stap long ol (1 Ko 3:16; 6:9).

Sios em i olsem meri i marit long Kraus



Bikipela Jisas Kraus em i laik kamap poroman tru bilong sios olsem man na meri i marit tupela i poroman tru. Efesus 5:25-33 i tok long Kraus em i laikim tumas na lukautim sios bilong en olsem man i laikim tru meri bilong en. Em i dai long diwai kros na blut bilong en i kapsait. Dispela em i olsem. "Pe bilong baim meri" o sios bilong em.

Olsem na olgeta sios i mas mekim wok bilong Kraus na bihainim laik bilong em bilong tok tenkyu long em. (Re 19:7-9; 22:17)

Dispela tok piksa i tok long

sios em i olsem meri na poroman tru bilong Kraus. Olsem na oltaim sios i mas wokabaut olsem meri i marit long Kraus.

Sios em i olsem han bilong diwai wain long gaden bilong God

Long Olpela Testamen (Ais 5:1-7) i gat dispela tok piksa long diwai wain. Long Jon 15:1-11 dispela tok piksa i gat nupela as na toksave long sios. God papa em i olsem gutpela man bilong bosim gaden na em i laikim ol diwai wain i karim kaikai. Olsem na em i save lukautim ol diwai wain. Em i save katim ol han bilong diwai na sapos sampela diwai i dai pinis em i rausim dispela. Jisas Kraus em olsem stik bilong diwai wain. Olgeta Kristen tru i olsem wanpela han i pas insait long Kraus.

Jon 15 i lainim yumi olsem,

ol manmeri insait long sios ol i gat wok bilong karim kaikai. Dispela bai i givim amamas long God, man bilong bosim gaden bilong yumi. Nupela Testamen i tok sapos yumi bringim arapela manmeri i kam long Kraus dispela em i olsem yumi karim kaikai (Jo 4:36). Na taim yumi wokabaut long pasin bilong Kraus dispela em i narapela rot bilong karim kaikai (Ga 5:22-12).

I gat wanpela rot tasol bai yumi ken karim dispela tupela kain kaikai long laip bilong yumi. Yumi mas i stap long Kraus o stap klostu long em long samting yumi mekim.

Sapos sios i pas wantaim Kraus na i mekim wok long strong bilong Kraus bai em i amamas tri na bai i bekim beten bilong em. Na sios bai i karim dispela kaikai olsem God i laik (Jo 15:7-11).

**WANTOK**

Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

<b>Ples:</b>	<b>Air:</b>
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Section 56, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



## CATHOLIC BISHOPS CONFERENCE

bilong

Papua New Guinea na Solomon Islands

Opis bilong Sekretari Jeneral

P.O. Box 398

Waigani, N.C.D

Papua New Guinea

Ph: (675) 325 9577

Fax: (675) 323 2551

Email: cbcgensec@catholic.org.pg

### OPEN LETA IGO LONG OL NUPELA MEMBA BILONG PALAMEN BILONG 2007

Dia ol Palamen Memba,

Ol pipel i makim yupela long lukautim na stiaim kantri bilong yumi, Papua Niugini long faiv yia.

Ol pipel i laik tok amamas long yupela.

Taim bilong ileksen em i spesel taim insait long kantri bikos ol pipel i autim laik bilong ol na i makim yupela long lukautim gut olgeta samting bilong kantri bilong yumi.

Mipela ol Katolik Bisop i hop dispela ileksen em i kamap stret tasol i gat planti toktok long sampela samting i kamap faul stret.

Mipela ol Bisop i laik autim amamas long yupela long dispela ileksen.

Tasol mipela i laik autim sampela wari tu bikos mipela tu i laik bai ol pipel i kisim gutpela sevis long han bilong yupela.

Mipela i no laik skelim pasin bilong gavamen bipo tasol nau mipela i laik autim sampela wari olsem long taim bilong kampain yupela i autim program na promis bilong yupela. Ol pipel bai i tingim yet long toktok bilong yupela na bihain ol i skelim. Nogut planti promis tasol na i nogat kaikai i kamap.

Yupela i kamap lida bilong kantri na yupela i mas lukautim wanem samting kantri i nidim na i noken tingim samting bilong wantok tasol. Lidasip em pasin bilong helpim kantri i go het.

Yupela ol lida i mas lukaut gut bai nogat pasin bilong helpim sampela lain tasol na lusim tingting long narapela.

Long dispela taim bilong tude yupela i mas kamap manmeri bilong stap stret (intergrity). Wok bilong yupela i mas go pas long helpim olgeta rait bilong ol manmeri i mas kamap namba wan wari (commitment) bilong yupela, yupela i mas lukautim gut ol samting bilong kantri na i noken bihainim pasin bilong korapsen. Pasin bilong yupela i mas kamap namba wan long ai bilong ol pipel. Em i tru mipela olgeta i manmeri bilong graun, tasol long yupela, bikos yupela i kisim namba long ai bilong ol pipel, yupela i mas soim namba wan pasin tru long wok bilong rispektim ol narapela manmeri na strongim digniti bilong ol. Na noken abusim na daunim digniti bilong ol.

Ol i makim yupela long lukautim gut ol samting bilong kantri. Tasol planti taim mipela i harim ol pipel i gat namba insait long kantri i sanap long kot bikos ol i no mekim stret wok bilong ol na go insait long pasin korapsen, na i no lukautim na tromoim moni bilong ol pipel. Nau long stat bilong dispela taim bilong palamen yupela i mas skelim gut na wokabaut long gutpela rot bilong helpim kantri bilong yumi.

Mipela ol Bisop, i gat wari long sampela arapela samting.

Mipela i wari long pasin abosen i save kamap long planti hap long kantri na pablik institusen. Yupela i

I kam long pes 12

gat wok (obligation) bilong lukautim laip na noken larim samting bilong kilim na bagarapim laip stap we i painim sapot bilong gavaman.

Yupela i mas helpim planti ol femili. Planti ol femili i painim hevi long lukautim laip bilong ol na long lukautim skul bilong pikinini na fi bilong haus sik. I gat nid long sampela sosel senis (reform). Sampela taim i nogat marasin long haus sik tasol i gat moni long givim long ol lain bilong palamen bilong "amamasim ol" na pikinini i ken dai bikos i nogat gutpela sevis long haus sik.

Mipela i wari long dispela sik nau i kamap bikpela yet, em i HIV-AIDS.

Yupela olsem lida i mas soim namba wan pasin long sanap stret (intergrity), stap hones/gut na i noken bagarapim namba bilong ol meri (olsem mipela i harim na ridim long ol niuspepa na redio).

Kantri i stap helti em i gutpela mak bilong gutpela gavaman.

Yupela lain bilong palamen bai mas mekim disisen long helpim edukesen na helt. Dispela tupela i mas kamap namba wan wari bilong Palamen. Ol arapela tinging i mas kamap bihain. Planti yangpela pipel i no inap long go het long edukesen bilong ol bikos i nogat spes moa long teknikal skul na yunivesiti na i nogat spes long ples long kirapim sampela project long lukautim ol. Yupela mas stop long planti mauswara insait long palamen na mekim wok tru (be serious) long intres bilong kantri.

Sampela gutpela lo i mas kamap long lukautim ol gutpela samting bilong kantri (natural resources & environment). Planti bus na diwai bilong kantri i go long sampela kampani na bihain i gat hevi bikos bus na forest i lus olgeta. Husat tru i kisim profit bilong logging? Ol pipel o sampela pipel tasol? Na husat i givim tok yesa long ol na long wanem skel (condition) na haumas moni i wokabaut i go na kam?

Dia ol memba bilong palamen. Mipela ol Katolik bisop i laik lukim yupela insait long palamen olsem yupela i sanap long gutpela pasin (transparency) na soim olsem yupela i stap namba wan sitisen we i no gat korapsen na pasin faul. Bai olgeta pipel i amamas bikos ol i lukim yupela i kamap manmeri bilong bel isi (peace), bilong lukautim gut ol intres bilong ol pipel, na sanap long pasin jastis.

Mipela bai sapotim yupela long pre na bai wantaim mipela i ken helpim kantri i kamap "Kristen Kantri" olsem mama lo i makim dispela kantri i mas kamap.

*Francesco Sarego, svd*

**Francesco Sarego, svd**

**Bisop Bilong Goroka**

**Presiden bilong Katolik Bisop's Konfrens**



Raun wantaim ol Meri na Pikinini



MI TUPELA YET: Wapela mama i rausim klos bilong pikinini bilong em husat i redi long waswas long bikpela nam-bis long Mosbi, Ela Bis. Long fran, Ailan Manubada slip antap long solwara. Poto: William Natara



ROTSO: Sampela ol Sentral Provins mama i soim ol maket samting ol i salim na kisim mani long en long wapela Siti Madas Bisnis Faundesen bung long Mosbi. Poto: Veronica Hatutasi



BISI: Dispela ol NGI mama i no bin malolo bikos ol i lukautim hap we ol manmeri i baim tiket sapos ol i laik baim ol samting we grup i salim long fanresing bung bilong ol long Mosbi. Poto: Veronica Hatutasi

# Ol mama driman long beng

Veronica Hatutasi i raitim

OL MAMA grup insait long siti na Sentral Provins i gat driman long kirapim namba wan Maikro Fainens beng bilong ol meri.

Siti Madas Bisnis Faundesen (CMBF) em bisnis han bilong Maikro Fainens Skim ol i kirapim las yia.

I kam inap nau, dispela Maikro Fainens Skim bilong ol i gat 2,500 mama memba i rejista long em.

Meri i givim strongpela tingting long ol mama i statim maikro fainens na putim ol liklik seavings bilong ol em Janet Sape husat i wapela bisnis meri, meri lida na kendidet long 2007 Nesenel lleksen.

Felisa Inoino bilong Ples Vei'ifa long Mekeo, Sentral Provins em i wapela mama lida bilong CMBF na em i stap long Godons.

Misis Inoino i tok ol mama nau i kirapim strong tingting long wokim bisnis we bai kam gut na dispela Maikro Fainens skim em i stat bilong em we ol i wok long putim ol seavings bilong ol nau long en.

Na long painim mani long putim long Maikro Fainens akaun, ol mama i mas i gat ol rot long kisim mani long em. Olsem ol i wokim maket long salim ol samting, em i tok.

"Dispela so o rotso (roadshow) ol mama grup i wokim long soim long pablik ol samting ol i wokim long salim na kisim mani long en bilong helpim laip na sindaun we bai lukim ol i putim liklik mani long seavings tu," Misis Inoino i tok.

Em i tok olsem long rotso, ol mama i kam long Rigo, Abau, Vei'ifa long Mekeo na sampela mama grup moa bilong Sentral Provins insait long siti em ol i soim ol kaikai samting bilong gaden, ol henkraf, ol klos na ol arapela samting moa ol i wokim long ples bilong kisim mani long en long 4 Mail olupela PTC Kolis eria.

Bihain taim ol meri i gat inap mani, ol bai baim ol sea long dispela Maikro Fainens Skim. Mak long mani we ol mama i gat long baim sea em K500.00, Misis Inoino i tok.

"Ol mama i laik kamapim namba wan meri beng long sampela taim i kam," em i tok.

Em i tok bikos ol mama i laik bai driman bilong ol i karim kaikai, ol i bin



OL MAIKRO FAINENS OPISA: Mary Nelson (raithan) na Selan Johannes em tupela long ol opisa i wantaim CMBF na opis i stap long 4 Mail, olupela PTC Kolis. Poto: Veronica Hatutasi

wokim maket na bungim mani long baim haia trak wantaim K600 i kam olgeta long Vei'ifa long Mekeo long Mosbi siti.

Misis Inoino i tok olgeta Sande, ol mama grup long Vei'ifa i save bung na tresera i save kisim ol mani na kisim i kam long Mosbi long ol wikde bilong putim long ANZ Beng we maikro fainens akaun bilong ol i stap.

Em i tok rotso i opim ai bilong plan-

ti mama tasol em i bilip olsem wan wan mama i save long lukautim mani bikos em i save long nits o samting we famili na ol pikinini i laikim.

Misis Inoino i tok dispela rotso em i bilong redim ol mama long 4-pela de Pasifik Maikro Fainens So we bai kamap neks wik long Holiday Inn Hotel, stat long Mande, Ogas 27 na pinis long Fonde, Ogas 30.

## "WANTOK BE AIDS FREE" KUPON KOMPETISEN

Stap insait long wan wan mun dro na winim wapela fri riten balus tiket i go long wanem hap insait long PNG long gutpela luksave i kam long AIRLINES PNG. NEKS DRO DE: FRAIDE 31 OGAS, 2007

Raitim ol ansa bilong yu na salim kupon i kam long: WBAF KEMPEN, P.O.Box 961, Boroko, NCD. Tel: 325 4718 Mobail: 692 8417

Kamap wapela fri netwok kempen memba bilong "Friends That Care (FTC) Production. Ringim mipela nau long painimaut moa.



PNG MICRO-FINANCE LTD Helpim Yu Long Lukautim Yu Yet



The Publisher House

Question: Q30: Long sait bilong STI na HIV/AIDS pasin bilong 'Stap Feitful' o stap wantaim wapela patna tasol i minim wanem tru?  
Answer: \_\_\_\_\_  
Name: \_\_\_\_\_ Sex: \_\_\_\_\_ Age: \_\_\_\_\_  
Address: \_\_\_\_\_ Contact: \_\_\_\_\_

# C.A.M.A i kirap



**EM NAU!** I luk olsem ol Krietiv Ats Musik Sumatin bilong Yunivesiti bilong Papua Niugini (UPNG) nau i wok bihainim wok-abaut bilong PNG musik industri na ol memba bilong em wantaim opisal lonsim o opim bilong musik asosiesen bilong ol yet, em ol i kolim C.A.M.A las wiken.

Dispela asosiesen bai lukautim ol musik rait bilong ol musik atis na pait long banisim ol kopirait na intaleksuel propeti rait long ol musik wok bilong ol; na tru tumas, dispela nupela asosiesen i karim sapot bilong UPNG administresen.

Ol sumatin na manmeri i bin pulap kapsait long Yunivesiti Dril Hol (hall) las wik Sarere long lukim lonsim we bilong Krietiv Ats Musik Asosiesen, C.A.M.A, na amamas long lukim wanpela pafomings iven we jazz, ridim na blus, regei ma kontemporari PNG tumbuna musik i bin kamap nambawan tru long han bilong ben bilong ol sumatin yet, Tribal Chants we i bungim PNG tumbuna musik stail wantaim ol musik masin bilong Westen kalsa. Dispela marit i bungim planti ol kainkain stail musik we long taim tru i no bin stap bihainim long taim bilong Sanguma.

C.A.M.A i kam aninit pinis long Spots na Rekriesen Opis bilong yunivesiti, husat i go pas long rejistaim wanem asosiesen ol sumatin yet i laik sanapim.

Asosiesen i sanap nau bihainim long planti mun i lus bihainim ol kros pait namel long ol sumatin na tisa bilong pefoming ats na musik fakulti olsem sanapim bilong wanpela kain asosiesen olsem bai brukim wanem kain bris i sanap pinis namel long pefoming ats o tieta na ol musik sumatin.

Sampela Pefoming Ats sumatin na wokman i bin gat tingting olsem wanpela nupela asosiesen bilong ol musik sumatin i ken bagarapim ron bilong ol Pafoming Ats Prodaksen. Tasol Glasim Musik tu i bin toktok strong long mun Epril olsem dispela kain 'asosiesen' ol musik sumatin i

bin laik kirapim bai go gut wantaim ol plen na wok bilong ol pafoming ats sumatin we em bai banisim ol intaleksual propeti rait bilong ol.

Tasol ol Pefoming Ats sumatin i bekim na tok, "Musik yet i mekim wanem samting tru long gat wanpela asosiesen bilong em yet. Dispela bai gat ol bikpela wok kamap long dispela stren long sait bilong givim mani na long sait bilong 'skul bilong ol sumatin."

Ol Pefoming Ats na Musik sumatin i kam aninit long Melanesian Institut bilong Ats na Komyunikesen (MIAC) i stap insait long Dipatmen bilong Humanitis na Sosol-Saiens we i luk-save olsem Krietiv Ats Program (we ol i bin pasin inap sampela yia bipo) na Jenalisim o nius ripota skul program em ol i bin tok lon gpasim tu tasol ol i bin sanapim bek bihainim luksave aninit long administresen bilong bipo VC, Leslie Eastcott. Tupela bikpela program i bin sanap aninit long Krietiv Ats bihainim na Ats na Disain program na Pefoming Ats program i bin lukim kam bek bilong musik na tieta atis.

Man husat i bin go pas long Sanguma ben bipo, Tony Subam, i tok kamapim bilong Krietiv Ats Musik Asosiesen i wanpela gutpela tingting tru i kam long ol sumatin na ol i mas kisim luksave long sanapim dispela ogenaisesen we bai opim rot bilong ol musik sumatin long soim musik talen bilong ol long PNG na tu long Pasifik na wol.

"C.A.M.A bai opim rot bilong ol musik na tieta atis sumatin insait na ausait long yunivesiti long kam bung na pajitim toktok long ol bikpela luksave wok bilong ol na tru tu as tingting long wanem as na ol i mas sanapim asosiesen," Subam i tok. "C.A.M.A bai pasim ogeta sumatin wantaim bai ogeta i ken pait bihainim wanpela rot tasol long sait bilong musik na dispela i gutpela moa bikos em bai soim olsem hatwok bilong ol krietiv ats na musik sumatin na ol leksera bilong ol i ken karim kaikai."

Subam i tok olsem nambawan pilai musik long de bilong lonsim em kaikai bilong ol krietiv woksop ol i bin mekim bilong ol krietiv ats na musik sumatin long stretim musik save bilong ol bai ol i ken luksave long PNG tumbuna musik na bikpela senis em i ken kamapim long musik krietiviti bilong ol. Dispela em ol i wok kamapim taim ol i bungim PNG tumbuna musik wantaim musik bilong tude na kamapim wanpela nupela PNG musik pairap.

"Ol dispela sumatin i wok bihainim ol wankain as tingting olsem mi-na ol arapela olsem Sabastian Maioni, Paul Kombot, Aaron Murray na ol arapela memba bilong Sanguma i bin bihainim long taim bilong bipo Nesanel Ats Skul, maski planti sumatin i no save pinisim olgeta fopela yia skul bilong musik stadi olsem mipela i save mekim bipo," Subam i tok.

Em i tok olsem em yet i no luksave long ol UPNG stren o skul bikos ol i no save larim ol sumatin long bihainim fultaim skul long musik bikos em i ting ol stren em bilong pulim ai bilong ol sumatin tasol.

Em i tok olsem musik ol sumatin i bin soim long pablik las wik Sarere em ol 'krietiv musik' we i bin kamap long strong na save bilong ol sumatin yet we ol i yusim wanem samting ol i lainim long musik skul bilong ol na bungim wantaim save bilong ol tumbuna musik bilong ol yet.

"Em i wanpela bikpela ekspirians tru na ol sumatin i wok long bihainim ol dispela skul na krietiv musik em ol laki lain tru," wanpela bipo intanesenel musik man i tok.

Presiden bilong C.A.M.A na man i kamapim sumatin ben Tribal Chants, Jack Kelly i tokim mi olsem asosiesen bai kisim ol sumatin i go aut long klasrum na givim ol sumatin sans long save gut long ol praktikel sait bilong lainim musik.

"Bikpela tingting bilong mipela em long tokim ol pipel bilong yumi olsem ol musik mipela ol sumatin i save

skul long en long UPNG em i tru tru PNG musik we em i nupela musik wantaim spit na stail bilong em yet. Dispela em i wanpela nupela musik we i save stap insait long kantri bilong yumi tasol na nau mipela i redi long givim long wol olsem Sanguma i bin mekim bipo long 80s," bipo musik tisa Jack Kelly i tok. "Dispela em kain musik wol i laik harim bikos em i narakain tru long rep na hip hop musik bilong tude."

Kelly i tok em i bilip olsem i gat inap strong bilong salim dispela kain musik i go long ovasis maket we bai inap mekim mani bilong ol musik sumatin.

Sapos yu tingim, nogat wanpela studio long PNG, na ol ben i save rekodim dispela kain musik bilong salim long komesel maket na dispela em olsem yumi wok givim baksait long musik tru tru bilong yumi we i ken go aut long rijen na wol.

George Telek i soim pinis olsem kain musik stail bilong yumi i gat namba long wol tu na em i pulim planti bikpela nem olsem Peter Gabriel long rekod wantaim em long Real World lebol bilong en long Inglan.

Sanguma yet i bin stat long pilaim ol tumbuna musik bilong yumi long wol longpela taim bipo Paul Simon i bin kamaut wantaim kain tumbuna musik bilong em long Graceland albam bilong en.

Maski ol wol musik manmeri i no inap makim kain stail musik bilong yumi aninit long wanpela nem, inap taim Paul Simon i bin haiarim sampela Saut Afrika man long pilai wantaim em long Graceland albam bilong em. Bihainim long laiv promosen bilong albam long Saut Afrika, ol i makim dispela kain musik em wankain olsem ol i save luksave long jazz, R&B na regei.

Subam nau em i wanpela fultaim musik leksera long UPNG na i tok olsem Sanguma i bin kamapim saun bilong em yet we em i kisim long ol PNG tumbuna na bungim wantaim musik stail bilong ausait.

Kelly yet i holim wanpela diploma long musik na i nau yet i wok mekim. BA bilong em long UPNG. em i tok olsem Presiden bilong C.A.M.A bel bilong em i kirap bihainim long em i lukim Helen Samilo i save pilaim musik long EMTV long Helens Stori program.

"Mi bin ai op tru long stori bilong dispela meri na mi askim em long kam long lonsim we em i pilaim tupela singsing i toktok long seif seks, abstinens o noken koap na yusim kondom. Em i kisim tu sampela ol pablik awenes posta. Em i bin nambawan tru."

"C.A.M.A bai gro bikos mipela i gat namba wan gred musik na nambawan saun na mipela bai lukautim na strongim na salim i go aut long wol," Kelly i tok. "Mi tokim pinis VC olsem C.A.M.A bai was olsem wanem ol musik wok ol sumatin yet i mekim i mas gat banis bilong em aninit long ol lo bilong kopirait bai ol sumatin i ken kisim pe long ol taim ol i salim musik bilong ol i go ovasis."

Kelly i tok VC, Profesa Ross Hynes i bin givim olgeta sapot bilong em long dispela nupela asosiesen na em i wanbel long ol sumatin yet i kamapim.

Profesa Hynes i tokim ol manmeri na sumatin olsem C.A.M.A em i wanpela asosiesen we i save givim wanpela kain 'rot bilong bihainim' na bai makim gut maus bilong ol musik sumatin long ol rait bilong ol long kopirait na ol intaleksual propeti rait.

VC i luksave olsem ol musik sumatin bilong em bai nidim helpim long sait bilong lo na tu sapot i kam long bisnis komyniti bai ol i ken luksave long driman bilong ol na C.A.M.A em i namba wan rot ol i ken yusim long bungim dispela sapot.

**Yu ken ridim ol stori bilong Musik olgeta Mande insait tasol long The National.**

# Tok pilai wantaim Kanage olgeta wik!



**M**isis bilong Kanage i paul wantaim wanpela man na Kanage i kisim em i go long kot.

Long kot haus, majistret i askim Kanage sapos em i lukim meri bilong em i paul wantaim wanpela man. Na Kanage i tok: "Bos, mi no lukim long ai bilong mi na holim long han bilong mi. Tasol ol poro bilong mi tokim mi na mi kotim meri bilong mi". Majistret kirap na pasim kot. Tasol taim Kanage i laik lusim kot, em i kapupu na majistret i kotim em long em i no rispektim kot haus. Long arapela de, Kanage i go long kot na majistret i tok klia long em long sas bilong em. Kanage harim sas bilong em pinis na kirap tokim majistret: "Bos, ating wankain olsem misis bilong mi. I tru olsem yu harim mi kapupu, tasol, yu no lukim long ai

bilong yu na holim long han bilong yu. Olsem na askim yu long pasim dispela kot". Majistret i lap nogut tru na salim Kanage i go long haus.

**Kandamaik Root Wewak**

Belo na Kanage wok long tokpilai wantaim wanpela wanwok meri long opis. Tupela tokpilai i go na dispela meri i askim em: "Kanage, yu save kaikai sosis tu o nogat?" Kanage lap na askim meri wanwok bilong em: "Wanem kain sosis yu toktok long em?" Dispela meri i lukluk strong long Kanage na tok: "Wanem kain gen, dispela ol i save salim long ol stua." Kanage lap na lukluk i go antap long skai na tok: "Mi askim bikos long nau yet ol waitman i save wokim kain kain sosis. Sosis ol i wokim long mit, kau, pik na tu sosis bilong ol meri na sosis yet bilong ol man."

**JMan Mosbi**

Wanpela meri Hagen i save belhat nogut tru long Kanage. Taim em i save lukim Kanage long wanpela hap kona long taun, em i save tromoi kainkain toktok long Kanage. Wanpela Sarere, Kanage i go lukim soka long Bisini graun i stap. Kanage sindaun i stap na em i lukim dispela meri Hagen sindaun longwe liklik long em na wok long mekimsave

long kaikai buai istap. Em nau Kanage i tok ples Hagen i go olsem: "Amba yo, na kondia re." Meri Hagen harim olsem na tanim long sekim husat i tokples long em. Taim em i lukim Kanage, em kirap na tok: "Yu man tru weya!" Kanage lap na tokim em: "Toktok bilong yu mi skelim na i no stet liklik. Sapos mi holim yu, bai yu tok olsem wantok sistem na mi kisim setifiket na klas 12 bilong mi."

**JLlimit Madang**

Tupela yangpela meri pait long wanpela man. Tupela i no isi. Tupela mekimsave stret. Kanage sanap na lukim dispela tupela meri wok long pait. Kanage sanap i go na bikpela belhet kisim em na em kirap na tok: "Yupela, dispela tupela meri pait long wanpela hap mit bilong pik o wanepla plet kaikai." Wanpela meri husat sanap arere long Kanage lap na tokim Kanage: "Kain samting olsem. Ating i nogat moa i stap. I mas wanpela tasol olsem na tupela i resis long kisim prais." Kanage putim rol mutrus bilong em long maus na tok: "Na mipela sampela i karim raun long em i smel mutrus o tinpis."

**Yu karim ya Lae**

Kanage i laik save moa long sik AIDS na em i go long bikpela haus sik long 3 mail. Em i stori wantaim wanpela nes meri i go na em askim em: "Susa, sik AIDS em i wanem kain sik tru ya?" Nes meri tokim Kanage: "Bras, dispela sik em wanpela sik nogut stret."

I nogat marasin long pinisim dispela sik sapos yu kisim." Kanage sindaun harim pinis na em askim nes gen: "Long wanem rot stret bai mi kisim sik AIDS?" Nes tokim Kanage olsem: "Taim yu slip wantaim wanpela meri husat i gat sik AIDS o binatang bilong dispela sik. Na yu tupela wokim pekato." Kanage tingting i go na askim nes: "Na pekato em i wanem samting o wanem kain wok?" Nes meri painim hat long askim bilong Kanage na em tokim em: "Wok bilong bung wantaim na kamapim pikinini." Bekim bilong nes wokim na Kanage pinis long dispela hap wok bilong bung wantaim.

**Operaisen Bungwantaim Manus**

Kanage i go painim buai long Tokarara buai maket. Em i save laikim stret buai na daka bilong PS Kantri. Taim em i go kamap long maket, em i wokabout raun isi isi na wok long glasim ol buai. Mekim i go na em i go kamap long wanpela meri Kerema. Dispela meri salim buai bilong PS Kantri. Kanage luksave long buai

na askim dispela meri: "Wantok, em buai bilong PS o Saki Kantri?" Meri Kerema tokim Kanage: "Hapkas ya, tupela wantaim!" Kanage lap na askim em gen: "Em olsem na hapkas buai?" Meri Kerema smail na tok isi long Kanage: "Yu save o nogat, kol nangu bilong Sepik i wankain olsem kol nangu bilong Kerema. Swit bilong tupela wankain. Olsem na olgeta samting long PS Kantri na Saki Kantri wankain na kaikai bilong tupela nangu em hapkas tu wantaim."

**Mista Kanage Wewak**

Kanage em bilong Wabag. Wanpela nait, Kanage wantaim ol poro bilong em sindaun toktok stori long heven na hel. Ol i stori go na tambu man bilong em i tok Baibel i gat sampela hap tok olsem planti manmeri bai no inap go long heven. Olsem na olgeta lain i wok long strongim sait bilong ol long go long heven. Kanage harim ol toktok i go na em i pret bikos em no gutpela man tumas. Kanage kirap nau na tokim tambu man bilong em: "Tambu, yupela ol Tolai orait. Peter ToRot stretim rot bilong yupela pinis. Mipela sampela bai wokim setelmen ausait long heven na putim was sapos i gat spes insait long heven."

**Wakop 9 Maket**



### PNG polis i holim 9-pela kalabus long kisim hait drag long baim gan

Papua Niugini (PNG) polis i holim kalabus 9-pela man, em ol i sutim tok olsem ol i bin stap insait long wanpela international hait wok blong salim ol drug long kisim ol gun insait long Westen Provins bilong kantri.

Oi PNG atoriti i bilip dispela provins i stap klostu long boda wantaim Australia na Indonesia olsem na em i mekim isi long salim hait ol hait drag na gan i go kam.

Wok painim blong PNG Nesanel Drags Skwad i bin kisim ol wanpela mun samting long holim kalabus dispela 9-pela lokol man long hap.

Oi i kisim 6-pela bilong ol i go pinis long Mosbi long sanap long kot.

### Solomon Ailans MP i sutim tok long oposisen

Memba bilong Palamen (MP) bilong Is Honiara, Charles Dausabea, i sutim tok long Solomon Ailans Oposisen long pulim ol 'ex-militant' o ol bipo paitman long kamapim ol kriminol keis agensim em na Prait Minista.

Prait Minista Manasseh Sogavare i bin kisim wok long namba wan taim long 2000 bihain long rausim bilong gavman bilong Prait Minista Bartholomew Ulufa'alu taim Dausabea i bin kamap lida blong pati.

Mista Dausabea insait long Palament aste moning i bin sutim tok long Oposisen long kamapim dispela kain giaman pasin long kisim ol polis komplek agensim Prait Minista na em long statim 'ethnic pait' long 2000.

Mista Dausabea i tok dispela pasin i hap plen blong oposisen long daunim sapot blong gavman bihain long vot bilong tupela wik i go pinis nogat bilip long gavman.

Spika bilong Palamen i givim oda long salim kopi bilong pas i go long olgeta MP.

### Bangladesh kot i givim mekimsave long Muslim paitman

Wanpela kot long Bangladesh i salim i go kalabus wanpela Muslim paitman long dai long kilim wanpela Kristen man 4-pela yia i go pinis.

Mohammad Salauddin, wanpela lida blong wanpela bikhet Islamic grup, ol i kolim Jamayetul Mujahideen Bangladesh, long ol bom pairap na kilim dai blong Ridoy Roy insait long 2005.

Salauddin i bin tokim kot em i rong long dispela ol sas blong kilim man.

Dispela 'death sentence' i namba tu sas i go long Salauddin. Long yia i go pinis kot i bin givim wankain mekimsave long kilim dai bilong wanpela Kristen man, husat i kamap wanpela Muslim insait long Jamalpur taun long not bilong kantri.

### Oi Tonga stap long narapela kantri ken holim Tonga sitisensip bilong ol

Oi Tonga pipel husat i stap long narapela kantri i ken holim sitisensip blong Tonga bihain long ol i kamap sitisen blong ol narapela kantri.

King George Tupou V, i bin givim orait long wanpela bil i opim rot long tupela sitisen-sip bilong ol Tonga pipel i stap long narapela kantri.

**TOK PISIN NEWS**  
from Radio Australia  
radioaustralia.net.au

Harim TOK PISIN long Radio Australia  
**101.9FM**  
Port Moresby

Tok Pisin Service  
6am - 7am (6080; 7240(KHZ))  
7pm - 9pm (5995; 6020; 9710; 1280(KHZ))


### Resis

**INDIPENDENS DE BILONG INDONESIA:** Sampela ol man Indonesia i resis long go antap long ol diwai long wanpela bilong ol kompetisen long amamasim Indipendens De bilong Indonesia, long Jakarta, Indonesia long Ogas 17, 2007. Indonesia i bin tingim na makim namba 62 aniversari o bonde long olgeta hap bilong kantri.  
*Poto: EPA/BAGUS INDAHONO/ kam long AAP Images*

**Pacific BEAT** Listen to Radio Australia 101.9FM Port Moresby

4. 5, 6am & 4pm, 5pm including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Coverage


**We are reaching OUT TO THE REMOTE PARTS**

AND IT'S YOUR BROTHER, MOTHER AND RELATIVES THAT WE THOUGHT ABOUT IN THE VILLAGE.

Always PNG, Always TELIKOM, Always there

**TELIKOM PNG LIMITED**  
"our communication company"





**NEM:** Tomex Smas  
**KRISMAS:** 18 (man)  
**ADRES:** Kanabea Code Centre,  
 P.O Box 220, Kerema, Gulf Province  
**SAVE LAIKIM:** Stori, mekim pani, pilai spots, go piknik na raitim pas.

**NEM:** Salome Willie  
**KRISMAS:** 16 (meri)  
**ADRES:** Mercy Secondary School,  
 P.O Box 580, Wewak, East Sepik Province  
**SAVE LAIKIM:** Ritim buk, swim, mekim pani, go skul, harim musik, pilai spots, danis, na lukim TV.

**NEM:** Ben Homake  
**KRISMAS:** 20 (man)  
**ADRES:** Obelgen Specialised Training Centre, P.O Box 1157, Mt Hagen, WHP  
**SAVE LAIKIM:** Pilai tas, harim stori, mekim pani, go lotu, na ritim na harim nius.

**NEM:** Tella Clement  
**KRISMAS:** 17 (man)  
**ADRES:** Bema High School, PMB, Bema, Morobe Province  
**SAVE LAIKIM:** Skul, pilai soka, harim musik, stori, painim abus na raitim pas.

**NEM:** Mathew Wesley  
**KRISMAS:** 18 (man)  
**ADRES:** Guyata Elementary,  
 P.O Box 386, Eriku, Morobe Province  
**SAVE LAIKIM:** Pilai soka, ragbi, harim musik na go lotu.

**NEM:** Paul Maneo  
**KRISMAS:** 17 (man)  
**ADRES:** Bema High School, PMG, Bema, Morobe Province  
**SAVE LAIKIM:** Pilai soka, pilai musik, go skul, mekim pren na painim abus.

**NEM:** Dannie Elson  
**KRISMAS:** 16 (meri)  
**ADRES:** Mawan Primary School,  
 P.O Box 270, Madang Province  
**SAVE LAIKIM:** Raun long bus, huk na waswas long wara.

# Boi winim ol masalai



**L**ONG wanpela ples ol i save kolim Waragan, planti manmeri i stap. Wanpela masalai i kam long dispela ples na olgeta taim em i save kilim ol manmeri na kaikaim ol. Mekim i go i go na klostu ol man i pinis olgeta.

Ol manmeri i stap long bus i gat maunten, tasol bikos long dispela masalai wan wan i stap i lusim dispela ples na i laik go long nambis. Ol i bihainim rot i go na brukim wanpela bikpela

maunten.

Wanpela meri i gat bel. Klostu taim bilong em long karim pikinini. Man bilong em i no wari long em taim ol i wokabaut, na meri i ting olsem, maski mi pinis long dispela graun. Na em i go bek long ples we ol i lusim pinis.

Klostu em i karim pikinini na em i lukim wanpela ston i gat hul na em i go insait na em i lukim gutpela ples tru. Na em i go insait na kisim paiawut na kaikai samting bilong em. Em i go insait gen na mekim bikpela paia tru. Na em i go ausait na lukim smok na smok i no go ausait. Olsem na em i go bek na stap long hap. I no longtaim em karim pikinini man.

Em i amamas tru na i lukautim i stap na em i kamap bikpela liklik. Na mama i sapim giaman bunara na givim em.

Dispela liklik boi i kamap bikpela pinis na sampela man i

bin lusim bunara na i go long nambis. Dispela boi i kisim olgeta na sutim kapul na kainkain pisin. Mama bilong em i tokim em, "yu no ken i go long ples longwe na long maunten. Bipo wanpela masalai i kilim na kaikaim planti ol manmeri tru. Na ol i pret na i go long nambis na mi wanpela tasol i stap. Yu stap long bel bilong mi na mi hevi tru na ol i lusim mi i go."

Tasol pikinini i no tingim dispela toktok bilong mama bilong em long masalai.

Em i go ausait na wokim wanpela bikpela haus long ples klia tru. Em banisim haus bilong em wantaim tripela banis olgeta. Em sapim bunara, spia olgeta inap pinis, orait em i pulim mama i kam insait na i go putim em long gutpela haus.

Na em i mekim bikpela smok giaman long pulim ol masalai na

kilim ol i dai.

Ol i lukim smok na i kam nau. Orait ol i pait i go, i go na man i strong na kilim ol i dai. Lain namba tu i kam olsem yet, namba tri i kam olsem yet.

Em i pinisim ol masalai. Na mama i amamas tru na i go sekanim em. Na em i salim tok i go long nambis na ol man i kam na mama i stori long ol.

Ol i amamas tru long em na sekanim em. Ol i karim em i go na singsing. Ol i givim pik, spia na planti samting. Na bihain ol i givim gutpela naispela meri long em. Na ol stap gut i go i go inap Gutnius i kam long ol na nau tu ol i stap gut tru long dispela ples Waragan.


*Stori i kam long Finsafen, Morobe Provins*

## Mitupela laikim mitupela yet o nogat?

### Dia Laiplain,

Mi save long dispela man long longpela taim liklik. Namba wan taim mitupela i statim dispela pren pasin mi bin i gat bel na mitupela wantaim i bin wanbel long mi rausim dispela bebi. Bihain long dispela em i tok olsem em i no laik lukim mi gen. Tasol sampela mun i pinis na em i ringim mi gen na askim mi long go lukim em. Taim mi bin i go lukim em, mitupela i bin statim gen dispela prensip bilong mitupela. Sampela taim mi save tingting long mi yet sapos mitupela i gat pilings bilong laikim wanpela na arapela namel long mitupela. Em i save ring na tok long lukim mi na wanpela taim mi bin tokim em long noken ringim mi moa.

Bihain long sampela mun i go pinis gen em i ring na askim bilong wanem na mi les long lukim em, na mi givim em wanpela giaman toktok, na mitupela i pren gen. Em i bin tokim mi olsem sampela taim em i save tingting long as em i save ringim mi na mi save tok yes long em. Em i tok em i save lukim planti meri bikos em i ting ol meri i save yusim em tasol na askim sapos mi tu save yusim em. Dispela i mekim mi paul olgeta bikos mitupela no bin tok 'mi lavim yu' long wanpela na arapela. Sampela taim mi save laik tokim em dispela tok tasol mi



save stop gen. Mi yet i no save ringim em tasol em yet i save laik ringim mi na toktok wantaim mi. Long dispela rilesensip bilong mipela yu ting i gat laik i stap namel long mitupela o em i yusim mi tasol?

### LOST

### Dia Pren,

Yu wok long askim yu yet, 'trutru em i laikim mi o nogat?' Na 'mi laikim em tu o nogat?' Dispela i ken paulim tru tingting bilong yu.

Ating sapos yumi lukluk long ol samting we i tru bai inap long helpim. Yu bin bungim dispela man na yu bin i gat bel. Dispela man i bin tok wanem long dispela? Yu bin laik rausim dispela pikinini o em i tingting bilong man? Long pas bilong yu mipela i no inap long save sapos yu bin wari o yu no bin wari long rausim dispela pikinini. Yu no tokaut tu long we yu pilim taim em i tok em i no laik lukim yu moa long dispela namba wan taim. Yu pilim olsem wanem long dispela?

Yu no bin harim long em long sampela mun na bihain em i ringim yu gen. Yu tok yu tupela stat pren gen long dispela taim tasol yu no tok sapos yupela i save lukim yupela yet planti taim o nogat. Long pas bilong yu i luk olsem yu tupela i no save bung planti taim. Yu bin tokim em long noken ringim yu tasol em i ring na yu i go lukim em. Yu statim rilesensip gen taim em i mekim klia olsem bai i nogat kaikai bilong dispela rilesensip tasol em i laik lukim yu klostu klostu. Em i tok gen olsem em i no laikim wanpela stedi rilesensip na i laik stap olsem pren tasol. Em i ringim yu taim em i laikim tasol yu tok olsem yupela i wok long kam klostu long yu tupela yet.

Long go klostu long wanpela man i min olsem yu save gut long em. Tingting long wanpela man o meri husat i klostu long yu olsem wanpela sista o brata o pren o tupela lain yu save husat yu ken tok i klostu long wanpela na arapela. Ating dispela ol lain bai save gut long pasin bilong arapela inap long trastim ol? Sapos wanpela bilong ol i gat hevi yu ting bai ol inap sindaun toktok wantaim na stretim na ol i bai save long we narapela bai i pilim.

Long tok 'mi lavim yu' i no min olsem dispela rilesensip bai i kamap strong kwiktaim.

Long gutpela rilesensip i kamap yu mas wok long en na wanpela we bilong wokim dispela i bilong soim pasin laikim bilong yu long samting yu mekim long ol.

Wanem samting dispela man i mekim i soim yu olsem em i laikim yu? Na yu save laikim em tu? Yu gat intres long wanem samting em i mekim? Ating yu laikim wanpela patna tasol na dispela man i save stap olgeta taim we yu ken go'bek long em? Ating yu mas stat long wokim pren wantaim ol arapela manmeri. Tingim ol wanwok o ol lain husat i stap long haus klostu long yu o famili bilong yu. Tingim we yu inap long kamapim gutpela rilesensip wantaim ol. I gutpela sapos yu soim moa intres long ol, ol tingting o hevi bilong ol taim ol i autim. Sapos yu soim intres long ol pipel ol bai wokim wankain long yu.

### LAIPLAIN

Sapos yu'gat wari o hevi, rait i kam long Lifeline, P O Box 6047, Boroko, NCD. Yu ken ringim mipela tu long telipon namba 326 0011. Raitim trupela nem na adres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu. Laipplain

Don't be limited to your calls...

Coverage



TELKOM PNG LIMITED  
 "our communication company"

WE HAVE MORE MOBILE COVERAGE AREAS

Think about it... buy a Start-up kit with a K10.00 free call credit

Port Moresby	Wewak	Kavieng	Goroka	Angoram	Mt Turu	Yangoru
Kerema	Madang	Lorengau	Tari	Ambunti	Tabubil	Aitape
Rabaul	Kimbe	Mendi	Maprik	Lae	Kokopo	Mt Hagen
Alotau	Kiunga	Vanimo	Wau	Bulolo	Ramu	Wapenamanda
Popondetta	Bialla	Lihir	Ialibu	Buka	Arawa	Central province

**K25**  
 start-up kit

Plus K10.00  
 Free call credit

Always there!

# TELEKOMYUNIKESEN

Wanpela spesol long namba wan indastri bilong Papua Niugini we gro bilong em i winim olgeta arapela.



## Bikpela nupela teknoloji ekspso so

### Ol nupela tingting bai kamap

**W**anpela brukim graun teknoloji Ekspo so we bai bungim olgeta teknoloji o save na masin bilong sanap strong insait long PNG maket. Olgeta ol dispela nupela samting bai stap bilong soim ol Pot Mosbi opis bosman na wokmanmeri na ol lain bilong pablik inap tupela de stat long Oktoba 12.

Ol saplaia bai sanapim ol ples bilong kisim skul na luksave long rot bilong yusim ol masin bilong olgeta teknolojikal samting stat long kompyuta masin bilong haus i go inap long setelait.

Datec yet bai go pas long en na dispela Ekspo so bai bungim olgeta teknikal samting insait long infomesen na komyunikesen bisnis, long kamapim nambawan bikpela infomesen teknoloji ekspso.

Bai gat planti rot bilong wok bisnis.

Ol lain husat i raun i go lukim dispela so i ken bungim na stori wantaim ol bosmanmeri bilong ol bisnis, ol dairekta na ol bikmanmeri.

Ol bisnis i ken opim dua long ol nupela kastoma, ol manmeri i raun i go lukim ekspso husat i wok painim ol nupela aidia o tingting na ol rot bilong mekim wok bisnis.

Bisnis bai inap op long ol nupela maket, ol baiya, ol patna na ol rot bilong tilim ol samting na sevis.

Wan wan manmeri i stap insait long dispela ekspso so bai gat sans long painim ol nupela rot bilong salim ol samting, painimaut sindaun bilong ol nupela tingting na opim ol nupela prodak na strongim luksave long wan wan bisnis bilong ol insait

long dispela indastri.

Ol lain bilong ol arapela kantri tu bai kam stap long dispela ekspso so na sampela long ol em bai namba wan taim bilong ol long kam long PNG na lukim gro bilong dispela nupela teknoloji maket ples bilong PNG.

Crowne Plaza hotel bai ples we dispela ekspso so bai kamap na bai gat inap sans bilong bungim ol arapela wanwok na kirapim wok bung wantaim ol.

Wanpela bikpela samting long dispela Datec Ekspo bai ol brekaut sesen we bikpela progrem bilong ekspso bai stap pastaim na bai gat sans bilong ol lain i stap soim ol sevis bilong ol long bekim ol askim bilong pablik o ol arapela bisnis.

"Wanpela eksibisen em i wanpela long ol strongpela wok bilong maketing tude, em bilong ol liklik bisnis i wok gro kwik i go inap wanpela bikpela bisnis i holim bikpela hap bilong maket," Sels na Maketing Menesa bilong Datec, Des Kearse i tok.

"Long Datec, mipela i bilip olsem wanpela long ol bikpela wok bilong mipela em long bringim nupela teknoloji na tingting i kam long Papua Niugini, taim mipela i bung wantaim ol bikpela wol teknoloji ogenaisesen.

"Taim mipela i yusim save bilong mipela yet long klia na painimaut ol nupela masin na tingting, mipela i bilip olsem mipela i ken givim ol kastoma bilong mipela ol gutpela rot bilong yusim teknoloji long strongim sanap na ron bilong bisnis bilong ol na long daunim ol kos bilong mekim



**GO PNG**  
**TELIKOM SUPPORTS YOU**

Always Supporting, Always helping,  
 Always there

Pacific Games


bisnis.

"Bikpela as tingting bilong mipela wantaim ol patna pasin poroman bilong mipela em long painim ol nambawan teknoloji o masin na ol nambawan bisnis

patna bilong PNG maket yet.

"Planti long dispela samting nau bai stap aninit long wanpela ruf tasol nau," Des Kearse i tok.

**Oktoba 12-13**



## TELEKOMYUNIKESAN

# GET YOUR MOBILE PHONE AND BUY A START-UP KIT AT

We have extended our "B" Mobile coverage to 35 areas in PNG the latest includes Lombrum, Tokua, Toleap, Kerevat & Warongoi

## K25 Only

Plus K10.00  
Free call credit

## Solap bilong ol kastoma namba i opim rot bilong senis

**L**ONG ol bilbod, televisen, redio na insait long ol nius-pepa, Telikom i wok long autim ol nupela piksa na toksave we bai sut i go tru long ol kastoma bilong em, na i singautim ol long senisim luksave bilong ol long dispela kampani.

Dispela ekksesais o wok nau planti i luksave long en olsem senisim sanap bilong Telikom taim em i wok muv i go insait long wanpela nupela posisen insait long maket ples.

"Dispela em bai ol kastoma bilong mipela i ken lukim mipela gut long wanem samting mipela i save mekim tude, na i no bilong piksa ol i bin gat bipo," Ekting CEO Peter Loko i tok.

Wankain tasol olsem ol arapela senisim sanap wok, bilong Telikom yet, em ol i bihainim ron bilong maket, we ol i bin inap bihainim bikos i gat solap long namba bilong ol kastoma bilong em.

"Telikom i ken makim ron bilong em yet, bikos Telikom i no olsem ol arapela wan bisnis bilong en. Telikom em i wanpela tasol.

"Tingim olsem Telikom em i wanpela kampani tasol i saves givim wanpela nesenel telekomyunikesen netwok, na wanpela jeneral keria tasol i gat laisens na rot bilong givim ol fiks lain sevis, intanet get na planti ol arapela bikipela rot bilong komyunikesen bilong ol pipel bilong PNG, na wanpela mobail kampani tasol we i ken givim ol kastoma rot bilong kisim moa long 300,000 fiks na mobail telepon kastoma insait long kantri.

"Na mipela i dispela na mipela em ol arapela samting tu," Peter Loko i tok.

"I tru olsem mipela i stap long olgeta hap bilong kantri pinis...mipela i wok givim sevis long Aitape i go inap Alotau, long Buka i go inap Daru na olgeta hap ples namel.

"Mipela i luksave long komyuniti wok bilong mipela, we mipela i givim ol sevis long ol komyuniti i nidim rot bilong yusim telepon, tasol we i nogat rot bilong kisim telepon sevis.

"Mipela i strong yet long lukautim ol maunten ripita tawa na ol waia bilong telepon, maski i gat ol kain kain bagarap i save kamap long taim bilong bikipela ren na win, na maski ol bikheth man i save go bagarap netwok bilong mipela, ol wokmanmeri bilong mipela i save wok long kain kain taim nogut bilong strongim netwok we em i bikipela samting tru long wok bisnis na gutpela sindaun insait long komyuniti, na tu long lukautim wan wan na kantri wantaim.

"Mipela i bosim na yusim ol setelait na ol kebol i ron aninit long solwara we i opim rot long mipela long toktok wantaim wol ausait, na mipela i gat luksave olsem wanpela memba insait long ol intanesenel telekomyunikesen patnasip o wokbung.

"Mipela i wok painimaut moa yet long ol nupela sevis olsem intanet i go long olgeta skul insait long kantri, akademik o skul netwok na telemedesin o stia tok long sait bilong marasin."

### Wanem samting i nupela?

Sapos Telikom i wok long pilaim dispela nesenel wok bilong em inap long faivpela ten tu o fifti tu (52) krismas, long wanem kain ol rot bai dispela bisnis i laik gat nupela piksa?

"Mipela i laik kisim luksave olsem mipela i gat nupela pasin, na nupela luksave bilong mipela long ol kastoma bilong mipela.

"Sapos mipela i bin save lukluk moa long wok enjiniering long givim sevis, mipela nau i lukluk moa long ol kastoma.

"Em i kastoma bes we i wok long gro kwik tru, na dispela solap o gro i larim mipela long senis, long ol samting mipela i ken givim na rot mipela i save mekim wok bisnis."

### Na pablik bai lukim wanem kain ol nupela samting?

"Sampela long ol toksave nau i wok long strongim bilip bilong ol kastoma bilong mipela, long nau yet na long taim bihain, long lukim mipela long rot em nau tasol mi tok klia long en...olsem famili, stap wantaim yu oltaim, gro na senis bihainim laik na ol nid bilong ol kastoma.

"Ol arapela toksave bilong mipela i sut moa long ol kastoma...em bilong ol i kisim ol SIM kad bilong ol sapos ol i no wanbel long sevis bilong wan resis bilong mipela, na mipela bai opim rot bilong yu long netwok fri."

Peter Loko i tok ol rabisim toktok bai kamap sapos kampani i stap

long gutpela taim.

I gat ol lain mipela long bipo husat i no bin amamas long Telikom i save isi isi tumas long bihainim ol nupela senis.

"Mipela em ol man tu...i no olgeta samting i gutpela tasol.

"Sampela i mas les pinis long wok bilong mipela, na dispela pasin les i stap ples klia insait long midia na yumi olgeta i lukim.

"Tasol em BIPO, na dispela em NAU, na i nogat wanpela samting i les nau long ol wok pasin bilong mipela nau long sait bilong salim ol mobail.

"Olgeta arapela eria bilong bisnis i kamap gut nau na i wok lukim ol gutpela moa namba bilong kastoma sevis na opim bilong netwok bilong mipela.

"Na mipela hia long Telikom i pilim luksave bilong pablik, olsem mipela i gat namba yet na luksave i stap olsem mipela i stap insait long nesenel na bisnis famili bilong PNG.

"Ol prodak bilong mipela na netwok bilong mipela em planti Papua Niugini manmeri i tok em i namba wan, na mipela i wok kisim planti ol nupela kastoma.

"Nau mipela bai go het long givim sevis long ol yet, na i no bilong bagarapim laik bilong ol.

"Mipela bai harim ol samting ol i nidim o laikim na ol askim bilong ol bai go long stretim sevis bilong mipela tu.

"Na mipela olgeta bai kamap ol selsman na selsmeri bilong bisnis bilong yumi," Peter Loko i tok.

## TELEKOMYUNIKESAN

# NetCo na ServCo? Em wanem ol samting?

**D**ISPELA NetCo na ServCo em wanpela telekomyunikesen straksa we planti kantri long wol i bihainim i stap na PNG Gavman nau i wok lukluk moa long sanapim wankain olsem insait long kantri we Stet na Enteprais Minista, Arthur Somare i ting em i nambawan rot bilong stretim telekomyunikesen hevi bilong Papua Niugini.

NetCo/ServCo i luksave olsem wok resis long bisnis i ken kamapim sampela gutpela samting olsem i kamapim ol nupela teknologi na prodak, na givim bikpela namba bilong ol manmeri inap rot long kisim telekomyunikesen sevis, na moa yet ol mobail telepon sevis na intanet.

Em i save luksave tu olsem ol wok resis long bisnis we i nogat tok orait long en i no gutpela rot bilong givim

kantri wanpela gutpela na strongpela telekomyunikesen netwok.

Modol i tok olsem kantri i nidim wanpela netwok kampani, we i ken bosim na ronim olgeta besik infrastraksa bilong telekomyunikesen olsem ol telepon senis opis na ol kebol na waiates link o bris namel long ol insait long kantri na tu long ovasis.

Em bai givim moa sevis i go long ol bus ples na ples we i no gutpela long wok bisnis insait long kantri na givim rot long PNG long tok-tok wantaim ol intanesenel telekomyunikesen lo grup.

Wanpela netwok kampani, olsem insait long hap praive-taisesen bilong Telstra Australia, i save givim strongpela komyunikesen sevis bihainim laik bilong gavman, tasol em i save givim sevis long kisim pei tu.

Em i save mekim winmani

bilong em, na i save peim opim na apgredim bilong ol opis bilong en taim em salim ol rot i go insait long netwok bilong en i go arapela wansevis kampani, husat i save givim telekomyunikesen prodak na sevis i go long pablik.

Sampela taim tok piksa i save stap olsem ol gavman i nambawan long sanapim wanpela nesenel rot netwok, na praivet bisnis i mobeta long givim ol bas na trak i save ron bihainim rot long givim trenspot sevis long pablik.

PNG Gavman i gat wanpela gutpela infomesen na komyunikesen teknologi polisi we i klostu pinis.

Givim bilong ol mobail telepon laisens i go long tupela ausait kampani em Nesenel Eksekutiv Kaunsil (NEC) yet i bin lukim olsem em i no bihainim dispela polisi, na i bin kirapim kros

pait namel long tupela gavman ejensi em ICCC na Pangtel.

Dispela i mekim gavman i tok klia olsem em bai karimaut ICT polisi bilong en yet, we bai em i luksave long wok resis long bisnis na tu long rait bilong kantri long sanapim wanpela indipenden na strongpela nesenel komyunikesen sevis.

Wanpela kaikai bilong olgeta dispela toktok i go kam em Telikom, we i bin wanpela kampani tasol i holim laisens long karimaut olgeta kain telekomyunikesen sevis long kantri bai bruk i go kamap tupela bisnis.

Wanpela bai gavman yet i lukautim, na hap bai go aut long praivet bisnis o netwok kampani.

Narapela Telikom bisnis bai kamap wanpela ritel sevis provaida we bai resis bilong pulim kastoma long open maket.

Em nau bai dispela modol i kamap wanpela NetCo o ServCo straksa we i ken givim kantri telekomyunikesen sekyuriti na bai nogat baim bilong ol bikpela gavman sevis, wantaim ol arapela gutpela samting i save kamap taim i gat fri maket resis insait long dispela wol bilong dijital komyunikesen na kisim infomesen.

Sampela kastoma, na moa yet ol lain i save yusim ol data links o bris olsem ol benk na ol bisnis i gat stua long olgeta hap bilong kantri, i save pret olsem Telikom tasol i wok holim bisnis bilong givim olgeta bikpela

sevis bai no inap larim wok bisnis long PNG i gro, na dispela i save kamap wantaim tingting olsem bipo, Telikom i save isi tumas long bungim laik bilong ol bisnis tude.

Ol arapela manmeri husat i save tok strongim wanpela wok resis long bisnis we i op moa i save bilip olsem ol ausait binis bilong ol mobail sevis tasol bai givim olgeta marasin bilong stretim ICT sekta bilong PNG.

Stia tok bilong gavman yet, we i kam long ol praivet konsalten bilong en, Ethan, i tok olsem diregulesen bilong PNG mobail telepon maket bai lukim pasin bilong kisim olgeta gutpela samting tasol bai mekim moa mani na bai gat planti salim bilong olgeta dispela winmani i go aut long kantri na dispela bai bagarapim strong bilong Telikom long mekim wok bisnis bilong em na bikpela netwok bilong em bai bruk daun.

Em nau sapos ol mobail kampani i laik wok bung o wanpela i baim olgeta arapela em bai lukim wanpela kain bisnis olsem Telikom tasol we ol bosman bilong en em ol lain ausait. Dispela nau bai larim PNG i tingting planti olsem wanem tru na em i lusim olgeta gutpela telekomyunikesen sevis we em i gat nau.

Minista Somare i tok klia pinis olsem polisi bilong gavman bai no inap larim dispela i kamap.

## Supa-sais Supa-pawa

TENPELA nupela 'supa stesin' mobail telepon bes transiva i bin pulim planti ai tru taim wanpela traipela Antonov kago balus i lusim long Jacksons ples balus.

Dispela tenpela supastesin em Telikom bai tilim i go aut long lukautim gut nupela askim o laik long mobail netwok bilong em insait long kantri.

Telikom i salim 50,000 nupela SIM kad insait long ol wik i go pinis, we nau em i bringim Telikom fiks an mobail kastoma namba i abrusim mak bilong 300,000 kastoma insait long kantri.

Long de we i save bisi moa, em Fraide long olgeta wik, ol kastoma bilong Telikom i ken mekim 2 milien mobail telepon kol. Dispela namba i save solap i go long 45,000 long bisi awa tru em namel long 11 kilok moning na belo.

Ol dispela supa stesin em ol i save kolim ol tripel siks o tripela sikis, na wan wan i ken salim na kisim mak bilong tripela taim moa long ol standat bes stesin i stap nau.

Faipwela i ron long sip i go long Lae na Hailans, na ol arapela bai go aut long ol hai trefik poin insait long Pot Mosbi netwok.

"Em samting long bungim laik bilong ol kastoma, na daunim mak bilong pulap taim gro i wok long ron strong yet.

"I nogat hanmak long diman o askim i isi," Hetman bilong Telikom Sels na Kastoma Operesens, Wency Noruka i tok.

Dispela sata ron bilong Antonov balus i abrusim mak bilong K300,000 we saplaia Nortel yet i peim bilong bungim laik bilong Telikom long karim kwik i kam long PNG.



Extra mobile base station capacity is flown in, as Telikom mobile customer numbers soar to 243,000 mid-August.

## TELEKOMYUNIKESEN

**Bikpela supamaket kampani bai salim ol Telikom mobail prodak****City Pharmacy na Stop n Shop bai karim B Mobail**

**O**L City Pharmacy stua na Stop n Shop supamaket em ol nupela bisnis bilong bung wantaim Telikom long promotim na salim ol B Mobail sevis insait long kantri.

Olgeta faivpela Stop n Shop supamaket na olgeta eitpela City Pharmacy stua insait long Nesenel Kapitel Distrik bai stat salim ful rens bilong Telikom B Mobail SIM kad, ol top ap kad na ol mobail telepon.

Dispela lain ol prodak bai go aut long 18 moa CPL famesi na treding kampani insait long PNG.

Insait long narapela tu na hap yia, CPL bai opim wok bisnis bilong em i go insait long namba tu na namba tri level taun we bikpela namba bilong ol PNG manmeri i save stap na wok.

Wantaim olgeta wan wan rurel famesi i gat wanpela famesis o saveman bilong wokim na skelim marasin olsem menesa, dispela bikpela CPL sen bilong ol stua bai karim olgeta B Mobail prodak, na ol telepon, i go we ol pipel bilong ol bus ples o ples i stap longwe long ol taun sevis.

Nau taim mobail net bilong Telikom i stat go aut long klostu olgeta pipel bilong PNG, CPL i laik sapatim netwok na givim ol kãin kain prodak bai ol i ken ring i go kam.

"CPL Limited i kirapim wanpela gutpela wok poroman wantaim Telikom PNG husat bai helpim long givim PNG wanpela gutpela mobail telepon sevis.

"CPL Limited na Telikom i go insait long dispela pasin poroman we i sanap antap long klia wok pasin na tupela kampani wantaim i gat bilip long wankain as tingting, na givim sevis i go long olgeta hap bilong PNG," Stratejik Plening na Bisnis Developmen Menesa Richard Guinness i tok.

"Mipela i lukluk i go het long luksave long ol bihain taim sindaun bilong mitupela wantaim."

Bos bilong Sels na Maketing long Telikom, Wency Noruka i tok CPL na Telikom i bin kirapim wanpela wokbung long bisnis we bai sevim ol rurel pipel na tu ol pipel long taun.

"Wankain olsem CPL, Telikom i wok long opim maketing wok bilong em i go insait long sampela ol ples we bipo i no bin gat sevis i go long en.

"Em i stap insait long sata o tok promis bilong kampani olsem nesenel telekomyunikesen provaida, tasol em i mobeta tu olsem i gutpela bisnis bilong go aut long olgeta kona bilong kantri, wantaim gutpela long taim patna bilong en, long givim mobail sevis i go long kirapim bisnis na gutpela sindaun insait long komyniti.

"Mipela i amamas tu long givim bikpela rens o olgeta Telikom konsuma prodak bilong mipela bihainim ol CPL famesi o haus marasin stua na ol arapela stua bilong ol," Mista Noruka i tok.




**A PROUD SPONSOR OF  
TEAM PNG  
SOUTH PACIFIC GAMES**

Always PNG, Always TELIKOM,  
Always there

Pacific Games



**TELIKOM PNG LIMITED**  
"our communication company"



YUMIFM Redio Program

Program bilong Wanwan De - Mande - Fraide

6am - 10am - Sankamap show - Host: Kas.T
6:15am - Komuniti Notis Bod
6:30am - Nius Hetlains / Bondei greetings
STOP & SHOP GES FAIA KOMPETISEN
6:45am - Niuspepa Hetlains
7:00am - Major Nius Bulletin - YUMIFM Nius Senta
7:15am - Powerhaus Hit prediksen
7:30am - STOP & SHOP GES FAIA KOMPETISEN
8:00am - Major Nius Bulletin - YUMIFM Nius Senta
8:15am - YUMIFM Bisnis / Market Ripot
8:30am - STOP & SHOP GES FAIA KOMPETISEN
9:00am - Nius Bulletin - YUMIFM Nius Senta
9:15am - Luksave long Komuniti (Radio Pilai)
9:30am - STOP & SHOP GES FAIA KOMPETISEN
9:45am - YUMI PAINIM WOK Segment
10:00am - Nius - YUMIFM Nius Senta
10am - 2pm - Monin Trek na Belo Pack -
10:10am - Lukatim yu yet - Helt toktok - RH Hyper Mart
10:15am - Powerhaus Hit Prediksen
10:45am - YUMI PAINIM WOK Segment
11:00am - Nius - YUMIFM Nius Senta
11:10am - Cont'd - Lukatim yu yet - Helt toktok
11:30am - Nius Hetlains b'long Belo Taim
12:00pm - Major Nius Bulletin - YUMIFM Nius Senta
12:10pm - ESI COOK RICE Belo taim Dedikesen
12:15pm - Komuniti Notis Bod
12:20pm - cont'd ESI COOK RICE Belo taim dedikesen
1:00pm - Nius - YUMIFM Nius Senta
1:10pm - cont'd ESI COOK RICE Belo taim dedikesen
1:15pm - Powerhaus Hit Prediksen
2:00pm - Major Nius Bulletin - YUMIFM NIUS SENTA
2pm - 6pm - Avinun Draiv Taim - Host: UNCLE ET
2:00pm - 4:00pm (Tunde / Fondei) TOKAUT TOKSTRET
2:45pm - YUMI PAINIM WOK Segment
3:00pm - Nius - YUMIFM Nius Senta
3:10pm - Avinun cruz
4:00pm - NIUS - YUMIFM Senta
4:10pm - SAUT B'long UNCLE ET - foapela singsing
4:30pm - Nius Hetlains
4:45pm - YUMI PANIM WOK Segment
5:00pm - Nius - YUMIFM Nius Senta
5:10pm - 6:00pm - FLAME KULCHA (1 hr)
6:00pm - MAJOR NIUS BULLETIN - YUMIFM NIUS Senta
6pm - 00am - NAIT BEAT - Host: ANGRA KENNEDY
6:10pm - 7:00pm Mon kamap sho
6:15pm - Powerhaus Hit Prediksen
6:45pm - Komuniti Notis Bod (Toksave wantaim Vaviessie)
7:00pm - 9:00pm - COCA COLA GARAMUT
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW
00:00 - Early Monin Taim Cruz (ol lain brukim tulait So)

Dijisel raun long Hula



DIJISEL-SEL-SEL: Betty Novette, Sheba Saplos na Fiona Angere taim Dijisel (Digicel) kamap long Hula, Sentral Provins.



MI SOIM YU: Wanpela bosmeri bilong Dijisel, Rizza Mojica, i soim wanpela meri Hula we long yusim Dijisel mobail telepon.



NA NAU MIPELA SOIM YU: Ol meri Hula, yangpela na lapun wantaim i mekimsave long danis long winim ol Dijisel prais.



LUKLUK TASOL: Dispela tupela i lukluk long ol bikipela bilong ol danis.



Gutbai: Taim bilong i go, na ol manmeri i tok gutbai. Ol foto: Nicky Bernard

RADIO AUSTRALIA TOK PISIN PROGRAM HARIM LONG: 101.9 FM

Radio Australia Tok Pisin Program - MANDE
Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Spots
7.30PM Nius na Karen Afes
8PM Helt
8.15PM Musik
8.30PM NIUS
8.40PM Spots Riplei
8.55PM Musik
9PM Stesen Pas
TUNDE
Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afes
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas
FONDE
Morning - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karen Afes
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas
SARERE
Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas
SANDE
Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femli Blong Serah (Radio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

93 FM YUMIFM WIKLI HIT PARADE

Table with columns: W/B, L/W, T/W, SONG, ARTIST. Saturday: 25/08/07. Includes songs like 'Swit Love', 'Angel on Earth', 'Angorom Boys', etc.

TV GAID

Table with columns: Time, Program Name, Channel. Includes programs like STATION OPEN, JOYCE MEYER, EMTV PRIME TIME LINE UP, SPORT SCENE, etc.



## TORO



## BIABIA



## KANAGE



### Dijisel pawa

Ol lain long Hula long Sentral Provins i resis long baim mobail taim Dijisel (Digicel) i go long hap long wok promosen bilong ol.

Wanpela lapun i sanap long lain long go baim bilong em na Wantok i go askim em wanem as tru em laik baim mobail fon. Lapun bekim, "Mi baim bilong mi na bilong lapun meri tu. Taim mi go long solwara na kanu kapsait bai mi toktok insait long solwara i go long em.

### Tasol pawa bilong batri?

Wanpela mangi Hula i baim mobail bilong em pinis na em i traim ringim ol pren bilong em long ples. I no longtaim na batri bilong em i daun. Em painim hat long sasim bikos pawa i no go yet long Hula. Em tingim wanpela kandre bilong em i gat jenereta na em go na givim em K5 long putim on jenereta na em i ken sasim batiri bilong em. Em tokim kandre bilong em, "em mi na mi givim yu K5, ol narapela kam, putim sevis pe bilong yu i go antap na bai ol kisim taim."

### Laloki mipela bosim

Taim yu go long ples bilong ol longlong man long Laloki yu mas was gut na toktok bilong yu i mas ron gut i go long

yau bilong ol nogut bai yu kisim bikpela gol olsem tupela yangpela sol meri. Tupela i wokabaut long sait bilong banis bilong ol dispela lain na wanpela insait long banis i singaut long tupela olsem "kam tu dedi, kam tu dedi".

### Tumbuna Dylon i kam gut

Liklik 2 yia Dylon husat i stap long Rainbow i save pinis long kamap mekanik. Taim Tumbuna i opim bonet bilong Mazda 626 bilong em long sekim wara bilong redieta, tumbuna Dylon i save pinis. Em ron tasol igo pulumapim kontena bilong Koka Kola na ron i go bek givim tumbuna papa na tok, "Hia dedi, wala bilong kar". Yu kam gut yah son! Neks taim bai yu sekim oil bilong kar.

Tokwin tasol...

## PAINIM NEM INSAIT

K	U	N	A	I	K	K	A	B	I	S	K	I	I	A	U	B
E	T	U	R	A	I	S	A	D	F	H	O	U	S	E	A	M
B	C	A	S	D	P	T	R	K	A	D	K	I	M	K	K	A
A	D	C	P	W	O	A	T	U	A	J	O	I	L	U	M	R
N	H	R	E	I	P	I	I	C	S	O	N	S	O	K	E	I
A	H	Y	A	D	O	Y	O	N	E	R	A	M	F	A	N	T
N	F	H	I	I	D	O	U	L	A	U	S	H	J	M	E	A
A	P	O	B	S	C	B	N	M	K	P	L	I	E	B	K	P
K	O	N	I	P	I	T	P	I	T	Q	E	T	G	A	M	D
B	I	L	K	H	D	S	A	C	N	I	N	R	A	M	A	M
Z	S	C	A	N	I	E	N	I	O	E	R	N	L	M	P	K
N	A	S	D	F	G	H	J	K	L	M	N	O	I	P	I	A
J	K	Y	A	M	B	O	I	E	S	K	A	I	P	A	K	C
D	I	R	T	Y	I	O	M	L	P	O	T	E	T	O	P	
R	P	L	A	U	L	A	U	E	N	C	R	E	A	N	Y	K
I	O	R	F	C	E	W	I	N	M	A	N	G	O	T	O	P
P	K	O	P	R	A	P	K	A	W	A	W	A	R	S	A	M

Painim ol dispela nem bilong ol gras na gaden kaikai:

KUNAI	BANANA	BIN	BUAI MARITA
DAKA	KAPIAK	KABIS	TAPIOK
POPO	KAKAO	KOKONAS	DRAI
KULAU	GALIP	DRIP	KOPRA
KOPI	KON	PAINAP	KUMU
KUKAMBA	PITPIT	KAWAWAR	POTETO
AIBIKA	YAMBO	LAULAU	MANGO
PAMKEN	MELEN	MON	ANIAN
MULI	RAIS		

ANSA BILONG LAS WIK...

	M	M	U	S	M	U	S		L	P		B	I	N	E	N
M	U	M	U	T				N	A							
	R							A	L	U						L
	U		K					T	A	S						E
			K		D	O	N	K	I	N	I					B
								K		A						E
P	U	S	I					O	T		B		I		M	I
									R							K
K	S	I	P	S	I	P			O	N	A					O
A										S	A	P				B
U										T	O	P				K
										A	S	A				A
D	O	K								N	A	U				L
K	A	K	A	R	U	K						R	L			B
																T
																A
A	N	I	S									B	U	L	M	A

ANSA BILONG LAS WIK...

8	3	2	4	9	5	6	7	1
7	9	5	1	6	3	2	8	4
4	1	6	7	2	8	3	9	5
3	5	4	6	8	9	1	2	7
1	2	9	5	3	7	8	4	6
6	7	8	2	4	1	9	5	3
9	4	3	8	5	6	7	1	2
2	8	7	3	1	4	5	6	9
5	6	1	9	7	2	4	3	8

2			3	7		8	5	
	1					8		7
	9	7	5	2	4			
6	5		3					8
	3						6	
7			9			3		5
			6	8	3	7	9	
3			7				2	
	7	9		1	5			3

Ol ansa bai kamaut long neks wik so putim was long neks wik pepal!

## EMTV TV GAID

Football, Hockey, Judo, Lawn Bowls, Netball, Shooting, Softball, Squash, Swimming, Table Tennis, Tennis, Touch Rugby & Weightlifting.  
**1.00PM G RUGBY LEAGUE:**  
 One-hour highlights of the Australian High Schoolboys rugby league competition.  
**2.00PM G SOUTH PACIFIC GAMES UPDATE**  
**2.30PM G ROAR OF THE WILD**  
**3.00PM G THE CAR SHOW**  
**3.30PM G SPEED MACHINE**  
**4.00PM G SUNDAY FOOTBALL:**  
**WESTS TIGERS v SOUTH SYDNEY RABBITOHS**  
**6.00PM G NATIONAL EMTV NEWS**  
**6.30PM G XIII SOUTH PACIFIC GAMES Highlights**  
**7.30PM G 60 MINUTES.**  
**8.30PM M SUNDAY NIGHT MOVIE: THE LAST CASTLE**  
 (2001) Action/Drama/Thriller - when three star General Irwin is transferred to a maximum security military prison, its warden, Colonel Winter, can't hid his admiration towards the highly decorated and experienced soldier.  
**10.30PM G EMTV NEWS REPLAY**

**11.00PM PG KING OF QUEENS**  
**11.30PM Australia Network**

### MANDE 27 OGAS, 2007

**5.29AM STATION OPEN**  
**5.30AM G JOYCE MEYER**  
 Religious programme  
**6.00AM G TODAY**  
**9.00AM G CREFFLO DOLLAR**  
 Religious Program  
**9.30AM CLASSROOM BROADCAST**  
**9.30AM Mathematics**  
**11.00PM G XIII SOUTH PACIFIC GAMES**  
 Live Events: Baseball, Beach Volleyball, Cricket, Football, Hockey, Judo, Lawn Bowls, Netball, Sailing, shooting, Softball, Squash, Surfing, Swimming, Table Tennis, Tennis, Touch Rugby and Weightlifting.  
**2.30AM EMTV PRIME TIME LINE UP**  
**2.59PM STATION RE-OPEN**  
**KIDS KONA**  
**3.00PM G NEW MACDONALD'S FARM**  
**3.30PM G HI-5**  
**4.00PM G LOONEY TOONS**  
**4.30PM G MORTIFIED**  
**4.57PM G EMTV TOK SAVE**

**5.00PM G THE SHAK**  
**5.29PM G EMTV NEWS UPDATE**  
**5.30PM G HOT SOURCE**  
**6.00PM G NATIONAL EMTV NEWS**  
**6.30PM G A CURRENT AFFAIR**  
**7.00PM G TEMPTATION**  
**7.27PM G EMTV TOK SAVE**  
**8.00PM G XII SOUTH PACIFIC GAME**  
 Highlights of Day 1 competition.  
**9.00PM M 24 (special night & time)**  
**10.00PM G PASTOR JOSEPH KINGAL**  
 Ministries: Religious Program  
**10.30PM G EMTV NEWS REPLAY**  
**11.00PM PG WIFE SWAP:**  
 Midnight Australia Network

### TUNDE 28 OGAS, 2007

**7.15AM G TODAY**  
**9.00AM G CREFFLO DOLLAR**  
 Religious Program  
**9.00AM G CREFFLO DOLLAR**  
 Religious Program  
**9.30AM CLASSROOM BROADCAST**  
**9.30AM Mathematics**  
**10.20AM Science - Grade 8**  
**11.00PM G XIII SOUTH PACIFIC GAMES**

**11.30AM EMTV PRIME TIME LINE UP**  
**2.59PM STATION RE-OPEN**  
**KIDS KONA**  
**3.00PM G NEW MACDONALD'S FARM**  
**3.30PM G HI-5**  
**4.00PM G LOONEY TOONS**  
**4.30PM G MORTIFIED**  
**4.57PM G EMTV TOK SAVE**  
**5.00PM G THE SHAK**  
**4.57PM G EMTV TOK SAVE**  
**5.30PM G HOT SOURCE**  
**6.00PM G NATIONAL EMTV NEWS**  
**6.30PM G A CURRENT AFFAIR**  
**7.00PM G TEMPTATION**  
**7.30PM G HAUS & HOME**  
**8.30PM G XII SOUTH PACIFIC GAMES**  
 Highlights of Day 2 competition.  
**9.30PM PG SEA PATROL: "Through The Storm"(special night)**  
**10.30PM G EMTV NEWS REPLAY**  
**11.00PM PG MCLEOD'S DAUGHTERS: "On The Prowl"**  
 Midnight Australia Network

### TRINDE 29 OGAS, 2007

**5.29AM STATION OPEN**

**5.30AM G JOYCE MEYER**  
 Religious programme  
**6.00AM G TODAY**  
**9.30AM CLASSROOM BROADCAST**  
**9.30AM Mathematics**  
**10.20AM Science - Grade 8**  
**11.00PM G XIII SOUTH PACIFIC GAMES**  
**4.57PM G EMTV TOK SAVE**  
**5.00PM G THE SHAK**  
**5.30PM G HOT SOURCE**  
**6.00PM G NATIONAL EMTV NEWS**  
**6.59PM G NEWS UPDATE IN TOK PISIN**  
**7.00PM G TEMPTATION**  
**7.30PM PG MCLEOD'S DAUGHTERS:**  
**8.30PM G XII SOUTH PACIFIC GAMES**  
 Highlights of Day 3 of the competition  
**9.30PM PG WEDNESDAY NIGHT MOVIE: ZOOLANDER (2001) Comedy - At the end of his career, a clueless fashion model is brainwashed to kill the Prime Minister of Malaysia. Stars: Ben Stiller, Owen Wilson, Christine Taylor.**  
**11.30PM G EMTV NEWS REPLAY**  
 \* Australia Network  
**11.30PM G EMTV NEWS REPLAY**  
 Midnight Australia Network

# 2007 NRL GRAND FINAL!

BE THERE OR BEAT IT LIVE

# 25

## MOBILE PHONE GIVE AWAYS!

### HOW TO ENTER

Purchase the following Telikom products, B mobile cards, Telikads, Rajt prepaid cards and SIM cards worth K20 or more.

Write Name, Address, and Contact details on your entry voucher.

Place your entry into entry boxes provided at all participating City Pharmacy shops nationwide or send to P.O. Box1663, Port Moresby.

## ENTER & WIN!

TRIP FOR TWO TO  
THE 2007 NRL  
GRAND FINAL

CONDITIONS APPLY \*

Promotion ends on 7th of September, 2007

A JOINT PROMOTION BY;



**TELIKOM PNG LIMITED**  
*"our communication company"*







TELIKOM PNG LIMITED  
"our communication company"

Start-up kit

With Telikom. . .

You'll have more coverage so

# GET YOUR MOBILE PHONE AND BUY A START-UP KIT AT

We have extended our "B" Mobile coverage to 35 areas in PNG the latest includes Lombrum, Tokua, Toleap, Kerevat & Warongoi

**K25**  
Only

Plus K10.00  
Free call credit

CALL INTO YOUR NEAREST TELIKOM OFFICE OR  
AUTHORISED DEALERS FOR MORE INFORMATION

Always there!



# Dijisel i go long ples i nogat telepon

**Nicky Bernard i raitim**

WANPELA ples insait long Sentral Provins i kisim luksave pinis olsem ol i ken ring nau i go long ples bilong ol yusim Dijisel (Digicel) telepon.

Ol sels na maketing wokmanmeri bilong Dijisel i bin go insait long liklik ples Hula insait long Sentral Provins na salim ol mobail bilong ol long ol ples manmeri na bai em i isi moa long ol i ken ring i kam long taun na ples yusim mobail bilong ol tasol.

Bosman bilong Maketing bilong Dijisel i tok, "Mipela i go insait long ol liklik ples we Telikom i no go insait na traim long wok wantaim ol pipel long ples bai ol i ken kisim isi sevis long ol bai ol ken ringim ol haus-

lain bilong ol yet taim ol i kisim hevi. Dispela em namba wan taim mipela kam aut long ol liklik ples na sapos mipela i lukim olsem dispela sevis mipela givim i orait bai mipela go long narapela ol liklik hap na wokim sampela moa.

*Wantok Niuspepa* i askim wanpela bikman long Hula olsem em i baim mobail bilong wanem samting na em i tok, "Mi baim bilong mi, taim mi go aut long solwara na mi kisim bagarap, bai mi ring tasol i kam long ples long ol lain bilong mi, na bai isi long ol long painim mi."

Dijisel i salim moa long 300 mobail long wiken i go pinis long Hula. Ol pipel long Hula i amamas long ol Sels na Maketing lain bilong Dijisel long kam stret long ples na givim ol sevis.

# NDB holim Pasifik kibung



MIPELA REDI: NDB Menesing Dairekta, Richard Maru (namba tri long raithan werim nektai) i sanap wantaim ol spona bilong dispela ADFIP kibung. *Poto: Paul Zuvani*

## LNG Japan, Petromin PNG Holdings wanbel

**Paul Zuvani i raitim**

LNG Japan Koporesen na Petromin PNG Holdings Ltd i pasim tok long go het long Memorandum bilong Andastending (MOU) we tupela i sainim wanpela pepa long Mandé Ogas 20, long Crowne Plaza Hotel long Mosbi.

Long tok orait bilong tupela long wanpela pepa

Sief Eksekyutiv bilong LNG bilong Japan Mista Kenichi Yonezwa na Menesing Dairekta na Sief Eksekyutiv Opisa bilong Petromin Joshua Kalinoe i tok long stat bilong yia long narapela yia LNG Japan tupela o moa long ol woklain bilong Petromin na ol samting long kamapim na strongim ol seksen bilong Petromin operesen na

bilong givim mani long Petromin long developim ol prosek.

Ol wok redi bai kamap stret taim LNG Japan na Petromin i kamap long tok orait bilong ol long pinis bilong Septemba, 2007.

Mista Kalinoe i tok em i gat bilip dispela mak em LNG Japan bai givim long ol Papua Niugini long wok bilong teknoloji na skil wok long developmen.

## Pret toktok pasim ol Saina stua

**James Kila i raitim**

OLGETA ol liklik na bikipela Saina stua insait long Goroka taun long Isten Hailans Provins i bin pret tru na pasim dua bilong ol long pablik las wik Mandé taim Namba 8 Nesenel Palamen i bin sindaun namba wan taim long makim praim minista.

Planti ol kastoma long Goroka taun i bin guria stret long lukim olsem planti ol stua long Wes Goroka, Kama, Asaroiufa na tu long Goroka taun i bin pas.

Ol sekyuriti gad tasol i bin sanap na was fran long dua bilong ol dispela Saina stua.

Ripot *Wantok Niuspepa* i bin kisim long mande long sampela ol sekyuriti long mande i tok olsem planti ol Saina papa bilong ol dispela stua i pret bikos sampela

lain i bin tokim ol olsem taim Nesenel Alaiens (NA) na lida bilong ol i kamapim gavman, ol bikhet man bai brukim ol stua long taun na kisim ol samting long laik bilong ol.

"Mipela i no save tasol ol lain 'kongkong' bos bilong ol stua i tok olsem stua bai pas na sekyuriti mas putim strongpela was ausait long stua," John Kua, wanpela sekyuriti gad i tokim *Wantok Niuspepa* las wik Mandé.

Tasol long Mandé apinun nogat wanpela samting i kamap na ples i stap isi tru na ol manmeri pikinini na ol sumatin i go het long ol wok bilong ol. Namel bilong Goroka taun i nogat man tru. Wankain ripot i bin kamap bipo long Palamen i sindaun tasol polis i was na nogat samting i kamap.

**Paul Zuvani i raitim**

NESENEL Developmen Beng (NDB) bai holim 22 anuel kibung bilong Developmen Fainens Institusen bilong Pasifik (ADFIP) long Crowne Plaza Hotel long Mosbi long Ogas 27 i go inap long 31, 2007.

Nesenel Developmen Menesing Dairekta Richard Maru i tokaut long dispela long flet opis bilong Beng long Waigani long Tunde dispela wik taim komiti bilong holim dispela kibung i tokaut long wok redi bilong em.

Em i tok ol memba bilong ADFIP em ol Developmen Beng long Pasifik rijen.

Mipela i kisim toksave olsem ol lain husat bai kam em ol opisa bilong ol Developmen Beng long Pasifik em long Fiji, Tonga, Niue, Samoa, Cook Ailans, Tuvalu, Federated States bilong Micronesia, Amerika Samoa na Yuropien Invesmen Beng, Mista Maru i tok.

Mipela bai gat ol mausman i kam long UNICEP, ADFIAP, Standet na Poors. Wantaim ol em ol mausman bilong Saina Beng na Filipino Beng, Mista Maru i tok.

Het tok bilong dispela kibung bai 'Rifomim Developmen Fainens Institusen long Pasifik'.

Ausait long ol Anuel Jenerel Kibung (AGM) ol mausman bai tokaut long ol bikipela samting olsem Risk Menesmen, HIV/AIDS, Lejisletiv Rifom bilong Developmen Fainens

Institut, Maikrofainens and ol arapela toktok i pas long hettok.

Em i tok kibung bai stat long dispela Sande, Ogas 26, 2007 na pinis long Fonde we ol mausman bai go raun long Lae long lukim wanem samting em PNG Nesenel Beng i mekim long kamapim wok developmen.

Keateka Minista bilong Fainens na Tresari, Patrick Pruaitch, bai givim het long opim bilong kibung long Mandé.

Ol bikipela spona bilong dispela kibung em Independen Pablik Bisnis Koporesen, PNG-ADB Maikrofainens Prosek na Pasifik Asurens Grup na ol liklik spona em SDBC, IPA na Nesenel Fiseris Atoriti.

Mista Maru i tok dispela kibung bai wanpela bikipela kibung tru long taim ADFIP i stat.

Na olsem em i givim bikipela tok tenk yu long ol spona long givim sapot bilong ol.

"Dispela bai wanpela gutpela sans long yumi soim kantri bilong mipela," Maru i tok.

Em i tok Invesmen Promosen Atoriti (IPA) bai mekim sampela toktok tu long opim bilong kibung long Sande.

Mista Maru i tok long Sarere NDB bai holim welkam kaikai we Gavana Jeneral Gren Sief Sir Paulias Matane i kisim askim long opim websait bilong Beng.

## Cat 928Gz WHEEL LOADER



**Rugged, dependable Cat components carefully matched to most efficiently get maximum rimpull to the ground and full power to the loader hydraulics.**

The 928Gz delivers fast response and aggressive performance, even in tough applications. The Caterpillar power train makes it possible, featuring a Cat 3056E DIT ATAAC diesel engine and power shift transmission precision-matched to a Cat torque converter and rugged axles. The power train is carefully tested and balanced to provide optimum performance in all operating conditions.

Hastings Deering



PORT MORESBY  
Spring Garden Road, Hohola, PNG  
Ph: (675) 300 8300 - Fax: (675) 325 0141

Product People Commitment.  
We deliver.

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LHIR	986 4105	986 4107
KIMBE	983 5144	983 5144



# Mitio laikim gavman luksave long enimol trenspot

James Kila i raitim

**NESENEL** gavman na Dipatmen bilong Agrikalsa na Laipstok (DAL) i lukiuk gen long bringim ol donki i kam insait long kantri long helpim ol fama long rurel trenspot.

Sief Eksekutiv Opisa bilong Kopi Industri Koporesen, Ricky Mitio i bin bringim gen dispela tingting em nesanel DAL i mas lukluk long en.

Nau yet taim gavman i sanap pinis, dispela em i wanpela bikpela eria bilong ol lain didiman save-man long kantri i mas lukluk i go

insait long en.

Mista Mitio i bin toktok strong long dispela las wik taim Wantok Niuspepa i bungim em.

Em i gat bikpela save long kopi industri long PNG na em i tokaut olsem moa long 85% bilong ol manmeri long kantri i save stap long ol rurel eria o distrik.

Dispela ol manmeri i save groim ol kaikai long gaden long sapotim ol famili bilong ol na moa long en planti i save groim ol kes krop olsem kopi, kakao na kopra na ol arapela kes krop bilong ekspot o salim i go ausait long kantri.

Tasol bikpela hevi em planti ol

rurel fama long kantri i save bungim em trenspot. Dispela em bikos planti ol gaden o ples bilong ol i stap long ol maunten ples o sait bilong ol bikpela wara, o sait bilong maunten.

Mista Mitio i tokaut olsem CIC i bin kamap wantaim dispela tingting tupela yia i go pinis. Ol i bin laik wok klostu wantaim enimal save-man bilong DAL na karim tupela donki i go long Aiyura na trenim ol na bihain taim ol bai kisim moa i kam insait long kantri long ovasis o Australia.

Mista Mitio i tok planti ol rurel kopi fama i save painim hat long

sait bilong trenspot long karim ol kopi bilong ol i go aut bihain rot i save bagarap tru na tu planti taim ol baiya i no save laik go insait long ol bus ples.

Em i tok taim donki trenspot i kamap, em bai givim sans long ol rurel fama long yusim dispela enimal trenspot long karim ol kopi i go long maus rot o ples we kar i ken go long en na ol i ken lodim kopi.

Narapela gutpela samting tu em ol donki i ken wokabaut long ol rot nogut, we kar i no inap go long en. Narapela samting em olsem em bai i no dia tumas bikos ol enimal i no inap yusim disel o petrol na ol

narapela samting we papa bilong ol bai lusim mani long en.

Mista Mitio i tok planti ol kantri long wol husat i save groim kopi olsem Jamaica, Kolombia, Guatemala, Vietnam na tu Peru i save yusim yet donki long sait bilong karim ol kopi na ol gaden kaikai bilong ol.

Mista Mitio i tok em i sapotim tingting bilong memba bilong Angalim Saut Wagi, Jamie Maxtone Graham long bringim intamidiet trenspot o trenspot we i namel long kar na man i wokabaut long sapotim wok bilong agrikalsa insait long ol rurel eria bilong PNG.

## CIC yusim Omokooi drama grup long promotim kopi

James Kila i raitim

**KOPI** Industri Koporesen (CIC) bai yusim wanpela drama grup nem bilong en, 'Omokooi' long promotim ol toksave bilong Kopi industri namel long ol manmeri.

Omokooi Drama Grup em planti manmeri na ol pikinini insait long Goroka, Isten Hailans i save amamas na laikim tru long lukim na harim ol tok pilai o komedi bilong ol.

Tupela man husat i save go ps long Omokooi Komedi o drama grup em Perry Rime na Andrew Humphries.

Dispela tupela komidien o fani man pastaim i save pilai raun wantaim Raun Raun Tieta, wanpela brens bilong Nesanel Kalsarel Komisn (NCC).

Dispela grup Omokooi em tupela man ya i save go pas long en i bin mekim sampela ol edukesen awenes drama o pilai na tu ol wok awenes bilong sik AIDS.

CIC Pablik Rilesens Opisa Tebi Naged i tokaut olsem bikpela as tingting bilong CIC i yusim drama o pilai long promotim kopi industri em bikos nau long dispela taim planti ol manmeri i save lukim na harim ol mining bilong ol toktok o tok-save gut long ol pilai drama.

Mista Naged i tokaut olsem ol i bin laik yusim

Omokooi Drama Grup long promosen sampela taim bipo tasol ileksen i bin kamap na ol i surukim taim i go bihain long ileksen.

Mista Naged i tok Omokooi Komedi Grup i bin soim pinis CIC dispela tupela drama em ol i bin soim long oditorium bilong CIC het opis long Goroka.

Insait long dispela tupela drama pilai bilong ol lain Omokooi, ol i bin stori o soim pasin we sampela gutpela kopi fama i save mekim taim ol i save lukautim gut ol kopi gaden na i save kisim gutpela kaikai bihain long hatwok bilong ol. Narapela drama em Omokooi lain i soim pasin sampela ol lain husat i gat kopi gaden long ples, tasol planti taim ol i save go stap nating long taun na westim taim bilong ol na long taim bilong kopi sisen tasol ol i save go long ples bilong ol na laik pikim kopi, tasol kopi gaden bilong ol em bus i karamapim na kopi diwai tu i no save karim gut ol prut o seri. Dispela em i bikpela asua tru bikos ol dispela fama i no lukautim gut kopi gaden bilong ol.

Mista Naged i tokaut tu olsem CIC bai traun yusim ol lain Omokooi drama grup long ol fil de o awenes long ol seremoni ol lain kopi fama grup i ken kamapim.

Tru tumas ol tok fani insait long ol drama em

ol lain Omokooi Drama grup i save mekim i save soim tru piksa em planti ol manmeri i save bungim insait long ol komyuniti na olsem long Papua Niugini tude.

Mista Naged i tok ol bai yusim Omokooi grup long mekim awenes bilong CIC long sampela ol program o sampela nupela tenis i kamap long wok bilong CIC long bihain.

## Pailot trening kos bilong ol enimal dokta

**OL AGRIKALSA** atoriti i kamapim tingting long putim kamap wanpela pailot trening kos bilong ol "para-veterenian" o ol dokta bilong ol enimal. Dispela trening kos bai staim rot long ol trening kos bilong ol enimal dokta i kam long bihain taim.

Ol "para-veterenian" helt speselis i no kwalifaid enimal dokta tasol ol i trenim ol long givim helt kea na prodaksen etvais o tok stia i go long ol fama.

Ol i save givim sevis we bai kamapim gut helt, kamapim moa enimal, lukautim na givim marasin long ol sik enimal, karimaut ol liklik operesen na seveilens i putim gutpela was long ol sik ol enimal i ken kisim na givim gutpela etvais long gutpela rot long menesim pipia bilong ol enimal na ol plen bilong givim kwik helpim long taim bilong imejensi.

Tingting long givim trening em ol bin toktok long en insait long tupela de woksop i bin kamap long Mosbi i no long taim i go pinis.

Ol sinia woklain bilong Dipatmen of Agrikalsa na Laipstok (DAL) na Nesanel Kwarantn na Inspeksen Atoriti (NARI) i bin stap long dispela bung.

Ol bin tokim ol lain i bin kamap long bung olsem sik i kilim dai ol Laipstok o ol enimal na pret long ol dispela sik i ken kalap i go long ol manmeri em ol bikpela wari na hevi long developmen o wok go het long Laipstok bisnis.

Sot long ol kwalifaid enimal dokta na prodaksen speselis long PNG em i bringim tu moa hevi long Laipstok bisnis.

Dispela hevi bai stap yet inap moa PNG lain i kisim trening long wok olsem ol enimal dokta na speselis long dispela eria.

Insait long las 30 yias, PNG i trenim tasol 5-pela enimal dokta speselis na i kam inap tude, tripela tasol i stap wok long gavman, tupela wantaim NAQIA na wanpela wantaim DAL.

PNG na ol arapela Pasifik Ailan kantri i bungim hevi long

sot long ol enimal dokta na olsem, ol i mas wok hat long trenim moa pipel long dispela eria.

Ripot long ol kain "exotic" sik olsem avien flu o kus nogut bilong ol pisin i kilim dai planti long ol, "swine fever" o sik bilong ol pik na Nu Kasel sik we ol i ripotim long PNG, ol gavman ejensi i lukautim dispela eria olsem NAQIA na DAL i mas wok hat long kisim moa pipel na trenim ol long wok olsem ol enimal dokta.

Ol bai redim wanpela sabmisen ripot long askim long mani a ol risos bilong karimaut dispela pailot trening woksop bilong ol para enimal dokta.

Seketeriet bilong Saut Pasifik Komyuniti (SPC) bai givim ol kos metiriel ma em bai salim tu ol "eksamina" o ol lain bilong glasim trening na wok i kam long PNG olsem hap bilong rijinell trening program sapot bilong em.



### COFFEE INDUSTRY CORPORATION LTD

OL WIKLI MAKET PRAIS - Bilong Wik i pinis long 24/08/07. TINGIM: Olgeta prais i stap long Kina long wan wan kilogram.

	GREEN BEAN (Delivered-In-Store)				PARCHMENT (Factory Door)				
	ARABICA				ROBUSTA	ARABICA		ROBUSTA	CHERRY
	A	X	PSC-X	Y1	Robusta	Class 1	Class 2	Robusta	Cherry
KAINANTU						3.90 to 4.00	3.70 to 3.80		- to 1.00
GOROKA	6.50 to 7.50	6.20 to 7.00	6.00 to 6.35	5.90 to 6.10		3.90 to 4.05	3.50 to 3.95		0.90 to 1.05
KUNDIAWA						NA	NA		NA
MINI/BANZ						- to 3.90	- to 3.55		NA
MT. HAGEN	- to 7.20	- to 7.20	- to 6.20	- to 5.90		3.10 to 3.90	2.90 to 3.80		0.93 to 1.02
LAE	- to 7.00	- to 6.50	- to 6.20	- to 6.00	- to 3.80	- to 3.60	- to 3.40	NA	
WAU/BULOLO						- to 3.60	- to 3.50	NA	
CENTRAL						- to 2.60	- to 2.40		
WEWAK								- to 1.60	
AVERAGE	7.17	6.71	6.21	6.00	3.80	3.57	3.36	1.60	0.98

NQ: I Nogat Prais. NB: I No Baim. NA: I No Gat.

Gutpela ron bilong ol Arabika fiutsas i bin bruk long las wik Fonde, taim ol prais i pundaun i go daunbilo tru long mak bilong em insait long tripela wik. I bin klia olsem ol mani i mas muv i go aut long kopi maket bilong strongim bek ol hap ol i bin lus long en insait long ol arapela maket taim sindaun nogut bilong wol mani maket i bin go insait long ol komoditi maket. Tasol maski i bin i gat pundaun inap long 7.95 cents, ol prais bilong Arabika i bin kalap i go bek antap gen long Fraide long pinisim wik samting olsem 5.15 cents long wanpela paun daunbilo.

**Yumi Lukautim Kopi Na Kopi Bai Lukautim Yumi**

# PNG putim ai long gol

Andrew Molen i raitim

**P**APUA Niugini (PNG) nau i gat bikpela moa sans long winim planti moa gol medol winim namba bilong bipo. Dispela em bilong wanem planti ol spotsmanmeri bilong PNG nau i gat gutpela trening na eskpiriens long ol intanesenel gem na trening na ol i redi gut tru long dispela Saut Pasifik (SP) Gems long Samoa we bai stat dispela Sarere.

I gat planti spots manmeri husat i ken winim gol bilong PNG long dispela SP Gems.

Sekretari Jeneral bilong PNG Spots Federesen (PNGSF), Sir John Dawanicura i tok PNG bai stap insait long 24 spot tasol bilong 33 spot we bai kamap long gems.

"Dispela i min olsem mipela i stap baksait pinis long namba bilong ol medol tasol mipela bai no inap givim sans.

"Mipela bai traim hat tru wantaim olgeta strong na save bilong mipela long apim PNG i go antap," Sir John i tok.

Hia em lukluk long sampela spots we inap winim gol medol bilong Papua Niugini.

**Swimming:** Supa pis bilong PNG, Ryan Pini em olgeta i ken tok olsem em i nambawan swima insait long Pasifik na i nogat tok olsem em bai mekim save stret long swimming pul long Apia taim em i kalap i go insait long wara. Pini husat i kisim 2007 PNG SP "Sports Man of the Year" awod long gol medol bilong em long komonwelt gems las yia bai soim tru kala bilong em long dispela gems gen.

**Etlitiks:** Dispela spot bai gat planti salens i kam long ol arapela Pasifik kantri tasol meri nogut bilong ron, Mae Koime i stap long gutpela fom we i lukim em i winim silva medol long Melanesian sempionsip long Cairns las wik Sande tasol. Narapela em Toea Wisil long 200 mita na Cecilia Kumalamene na Anne Mooney 400 na 800 mita. Long ol man, Mowen Boino i lukautim gut hedols resis na Elias Roboam wantaim ol arapela olsem Sapolai Yao na Nelson Stone i ken lukautim sait bilong ron. Bikpela salens bilong etlitiks i save kam long Fiji tasol PNG long las 4-pela yia i mekim planti gutpela



SPIT MERI: Mae Koime.

trening na i stap insait tu long ol intanesenel kompetisen na dispela ol eskpiriens em inap long putim gol medol long nek bilong ol.

**Boksing:** Boksing i salim 6-pela paitman tasol, na dispela em ol gol medol boksa bilong PNG. Klostu olgeta i kisim wanpela medol pinis long intanesenel level long las tupela yia o moa. Namel long ol em Jack Willie. Willie em lapun bilong dispela spot na i gat gol medol long Arafura gems na Osenia sempionsip dispela yia. Em i karim wanpela strongpela tim tu na i gat bikpela sans long Willie na ol paitman bilong em i ken kisim sampela moa medol bilong kantri.

**Kriket:** Dispela spot ino save daunim nem bilong PNG wanpela taim. Long las 4-pela Saut Pasifik gems ol i go long en, ol i kam bek wantaim gol medol na nau ol i go bek long difenim dispela taitol na bikpela bilip long tim em olsem ol bai no inap painim hat

long kisim dispela gol i kam bek wantaim taitol bilong ol olsem nambawan insait long Pasifik rijen.

**Ragbi sevens:** PNG tim bai bungim bikpela salens long dispela spot bilong wanem ragbi em i wanpela bikpela gem bilong ol Pasifik kantri tasol ol manki bilong PNG tu i save long pilai na wantaim gutpela sapat ol i kisim long mama sponsa bilong ol, Digicel, dispela em inap long strongim tingting bilong ol long mekim save long ol arapela kantri long fainols.

**Hoki:** Long laspela Saut Pasifik Gems long Fiji long 2003, PNG hoki tim bilong ol meri kam namba tu na kisim silva taim ol i lus long Fiji. Tasol dispela em bilong wanem ol i pilai antap long fil we ol i mekim wantaim gumi na ol pilaia bilong PNG ino save gut long ron antap long en tasol long dispela tonamen bai ol i pilai antap long graun olsem ol i save pilaia hia long PNG na dis-

pela bai go gut wantaim save bilong tim bilong PNG na sapos ol i wokbung gut bai ol i ken mekim i go gen long fainol na dispela taim kamap nambawan.

**Sofbol:** Sofbol em narapela gol medol spot we PNG i gat bikpela sans long en. Sofbol i olsem kriket we ino save daunim PNG wanpela taim. Dispela yia bai ol i traim gen long holim strong rekot bilong ol. Ol pilaia olsem Dick Bart Junior na Ezekiel na Daniel Tovia i gat gutpela eskpiriens long ol dispela gem na bai helpim gut tim long dispela taim.

**Pawalifting na wetlifting:** Pawalifting i tok promis long sponsa bilong ol, Telikom dispela wik olsem ol bai kisim 10 o moa gol medol i kam bek long PNG na vais presiden bilong ol, Frank Robby husat i bin winim gol bilong PNG long dispela spot bipo i gat bikpela bilip long skwat bilong em. Long wetlifting, Dika Toua na Rita Kari bia go pas yet long ol arapela yangpela etlit long skwat bilong ol tasol strong bilong dispela tupela meri ken apim ol tu long winim gol bilong ol na kantri bilong ol.

**Netbol:** Netbol tim i winim olgeta arapela intanesenel gem bilong ol dispela yia na bikpela salens bilong ol em long soim stail bilong ol long SP Gems. Kepten bilong tim, Mona Lisa Leka i tok wanpela tim we i save winim olgeta taim em Fiji na nau ol ino laik stap namba tu long Fiji moa. Lua Mavara, Kila Owen na Leka i gat planti eskpiriens namel long ol na ol arapela memba bilong tim na dispela taim bai ol i lukim olsem Fiji na ol arapela kantri no inap kam klostu long gol medol bilong ol.

Dispela ol spot wantaim ol arapela olsem basketbol, boling, bodi bilding na ol arapela i gat gutpela rekot long SP Gems na long las 4-pela yia i kam na ol i kisim dispela gutpela fom wantaim i go long dispela SP Gems olsem na i gat bilip ol inap apim nem bilong kantri.

Tasol em i no min olsem ol arapela bai no inap kisim wanpela samting, kain kain samting i save kamap long kain bikpela tonamen na wanem spotman na meri i redi gut na i kam, i gat strongpela tingting na i traim hat bai kisim dispela gol medol na hangamapim long nek bilong em na go bek long kantri bilong em.



TRAIM PAITIM: Bai hat long winim PNG sofbol tim bilong ol man.

POMRL 2007  
Semi Final 2

Sarere Ogas 25, 2007

PRL 1		
10:00	Dobo Warriors vs Souths/Brothers	anda 19
11:00	Kone Tigers vs Hawks	anda 19
12:00	Defence vs Hawks	B
01:30	Souths vs Puma	B
03:00	Dobo Warriors vs Brothers	B

Sande Ogas 26, 2007

PRL 1		
10:30	Magani vs Tarangau	anda 19
11:30	Dobo Warriors vs Brothers	A
01:00	Magani vs Souths	A
03:00	Tarangau vs Hawks	A

Pot Mosbi ragbi Futbol Yunion  
Gren Fainol

Sarere 25 Ogas, 2007.

1030	Harties vs Diggers	anda 19
1200	Defence vs Kone	B
1345	Uni vs Medics	A
1500	Uni vs Kone / Defence *	Primia

\* wetim apil bilong Defence.



**SOLDA SAS:** Kone Sharks winga, Joseph Stegman i putim solda bilong em stret long stopim senta bilong Defence, Graham Sakora long priliminieri fainol bilong ol long Pot Mosbi ragbi yunion resis las wik Sarere long Bava Park. Refri bin stopim dispela gem 12 minit bipo long ful taim bihain long wanpela sapota i paitim tas jas. Displagem i stpa nau long gem komiti long lukim wanem tim bai bungim University Piggies long gren fainol displea Sarere.



**NOGAT ROT:** Prop fowet bilong Bintagor Lahanis, Junior Ropra i bungim hat taim tru taim e mi pas long bainis bilong Wari Wele Raiders long SP Kap salens bilong ol long Mosbi las wik Sande.



**LONG HAP:** Ol opisal long geit i soim ol manmeri long wanem hap gem i wok long kamap long en long Bava Park long Mosbi we ol i save pilaia ragbi yunion.



**SAPOT:** Ekting CEO bilong telikom, Peter Loko (Ilephan) i soim sapot long PNG Pawa lifting tim taim Telikom i givim ol K17, 500 sponsasip long go long Pasifik gems long Samoa. *Ol poto: Andrew Molen*

# Souths go klostu long fainols



AMAMAS: Ol Rabbitohs pilai i kalap antap long John Sutton bihain long em i skoaim trai we i mekim ol i win. *Poto: AAP Image/Action Photographics, Colin Whelan*

SOUTH Sydney Rabbitohs i go klostu long stap insait long fainols bilong NRL bihain long ol i kam long baksait na winim Manly 24-18 long Telstra stadium long dispela wik Mande nait.

Laspela taim Souths i go long fainols em long 1989 na sapos ol i go insait gen dispela yia em bai namba wantaim bilong ol bihain long 17 yia.

Rabbitohs i kam bek strong bihain long ol i stap 18-6 long winim wanpela strongpela tim insait long kompetisen na kosa Jason Taylor i tok win bilong ol i kam long hat wok na ol ino stop long traime.

Nau Souths i stap namba 8 na i gat tupela moa raun bilong sisen i stap bipo long ol fainols i stat.

"Ol manki wokhat tru na mi amamas bilong wanem dispela em wanpela sating mipela i kam hia long mekim," Taylor i tok.

"Mipela i nap lusim dispela gem tasol mipela i strong na winim na mi amamas tru long ol manki.

"Mipela i holim strong tasol wokhat long ful 80 minit stret na dispela i lukim mipela i kisim win.

"Mipela i go yet na ino giv ap na dispela i karim kaikai long pinis bilong gem, sapos mipela i pilai gut olsem bai mipela inap long wanem olgeta tim," em i tok.

Ol i stap bihain long Manly, 6-0 na long hap taim ol i stap 18-6 tasol ol i putim tupela trai hariap tru insait long 4 minit na dispela i kisim ol i go klostu long wanpela bikpela win bilong ol long dispela yia.

Brett Stuart i skoa pas bilong Manly na wantaim kik bilong Jamie Lyon i kisim ol i go pas 6-0.

Tasol ol Rabbitohs i bekim hariap taim Yileen Gordon i ronim wanpela kik bilong Jeremy Smith na skoa na Joey Williams i kisim tupela moa pouns bilong ol.

Stewart i kikim wanpela gol long trai bilong Chris Hicks na ol i go pas gen 12-6 bihain long 19 minit.

Ino longtaim lapun bilong Manly, Steve Menzies i skoa gen long kisim ol i go 18-6 na olgeta tingting i pas olsem Manly i gat planti pouns tumas na Souths ino inap kam bek.

Bihain long dispela gem ino ron strong moa na tupela tim wantaim i luk olsem ol i painim hat long skoa o mekim wanpela sating.

Em i stap olsem inap Issac Luke i kamaut long dami hap na ron i go skoa long namba 50 minit we Williams ino painim hat long kisim tupela moa pouns.

Na ino long taim Williams yet i salim John Sutton i go long trai lain bilong Sea Eagles.

Skoa i pas nau long 18-18 na 24 minit i stap yet, dispela liklik taim i kamap olsem wanpela bikpela taim stret long ol gem bilong Souths long dispela sisen.

Souths i kisim strong nau na long laspela hap bilong gem ol i pilai stail moa long ol Manly manki na taim Fetuli Talanoa i ronim wanpela kik bilong Ben Rogers i go na skoa long kisim ol i go pas 22-18, dispela 12, 087 sapota i go long longlong wantaim amamas.

"Mipela i wari long hap taim.

"Ol i pretim mipela liklik tasol olgeta sating i kamap orait na mipela i amamas," Taylor i tok.

Manly kosa Des Hasler i tok amamas long strongpela gem bilong Souths.

"Ol Souths i pilai gut tru, ol sapota bilong ol i mas amamas," em i tok.

Tim bilong Souths long dispela wiken agensim Wests Tigers dispela Sande long Leichhardt ovol em; Nathan Merritt, Fetuli Talanoa, Nigel Vagana, Yileen Gordon, Paul Mellor, Joe Williams, Jeremy Smith, Peter Cusack (kepten), Shane Rigon, Roy Asotasi (kepten), John Sutton, David Fa'alogu, Ben Rogers, intasens: Issac Luke, Dean Widders, Luke Stuart, Michael Greenfield, kosa em Jason Taylor.

## Fittler bai kosim Roosters tupela yia



KOSA: Fittler. *AAP Image/Paul Miller*

SYDNEY Roosters long Tunde dispela wik i tokaut olsem Brad Fittler bai stap olsem het kosa bilong Roosters long 2008 na 2009 sisen.

Ol i tokaut tu olsem asisten kosa em Paul Young husat i bin wok wantaim brad Fittler long las 7-pela wik i kam na i helpim long developim planti ol Roosters pilaia i kam long Primia Lig divisen.

Klab i tok amamas tu long kisim Adrian Lam i kam insait olsem asisten kosa na nesenel yut kompetisen kosa bilong 2008 sisen.

Plantil ol pilaia tu i bilip olsem Fittler em i gutpela kosa na ol i amamas taim ol i harim olsem em i kisim wok olsem het kosa.

"Dispela em gutpela tru bilong klab na Freddie (Fittler).

"Mi no bin wari tumas dispela bilong wanem mi save olsem Freddy em i rait man bilong kisim dispela wok.

"Nau mipela i ken pinisim gut sisen aninit long Freddy na mipela i ken redi long 2008 na 2009 sisen aninit long Freddy gen," Braith Anasta i tok.

Ashley Harrison i tok olgeta manki long tim i amamas tru long dispela.

"Mipela olgeta i luksave

olsem Freddy i bin wokhat tru long las tupela mun em i stap olsem kosa.

"Em i soim olsem em i laikim tru dispela wok na klab i luksave long hatwok bilong em," Harrison i tok.

Amos Roberts i tok em i pilim gutpela tru olsem Fittler bai go pas long klab long 2008 na 2009.

"Em i tanim ron bilong dispela klab na mipela i save yet olsem em i rait man bilong dispela wok," em i tok.

Na bipo wanpilai bilong Fittler, Craig Fitzgibbon i tok wankain tu.

"Wok bilong Freddy long las hams wik i kam i mekim olgeta toktok pinis.

"Olgeta pilaia i laikim em na nau mipela i lukluk long pilaia gutpela gem tasol.

"Freddy i gat dispela gutpela spirit i pas wantaim em olsem kosa na mi ting dispela em wanpela sating we bai strongim ol pilaia long narpalea tupela yia i kam," Fitzgibbon i tok.

Long wankain taim Ron Palmer husat em i kosa bilong NSW na Australia long sait bilong fitness na strong bai go pas long dispela eria bilong klab.

Ol arapela em Tony Ayoub na bipo ragbi lig dokta bilong NSW John Orchard.

## Hailans makim skwat, tasol i no amamas long PNGRFL

### Sape Metta na James Kila i raitim

HAILANS Zon i makim skwat bilong ol pinis long redi long ol ragbi lig zon sempionsip dispela yia tasol ol i no wanbel olsem PNG Ragbi Futbol Lig (PNGRFL) i surikim taim bilong pilai go bek long Septemba.

Las wik tasol PNGRFL i senisim det bilong dispela zon salens i go bek long Septemba wan na tu.

Kodineta bilong zon sempionsip, Iffysoe Segeyaro i tokaut las wik long dispela senis taim olgeta zon tim i redi long salens las wik Sarere.

Segeyaro i tok em i toksave long olgeta zon tim pinis long dispela senis.

Em i tok as bilong dispela senis em bilong wanem Ailans zon tim (NGI) i bungim hevi long painim mani bilong salim tim go pilai long Goroka na ol i laik givim sampela moa taim long ol.

Segeyaro i tok em i bin i go lukim seleksen trael gem bilong Ailans zon na em i laikim stail na gem

bilong ol.

"I gat planti gutpela yangpela pilaia long hap na mipela i laikim ol tu i mas i stap insait long zon salens," Segeyaro i tok.

Tasol ol arapela senta olsem Hailans i redim skwad bilong ol pinis.

Kundiawa, Pogerera, Magarima, Kudjip na Goroka i bin bung las wik bipo long Goroka yet we ol i kirapim das long mekim seleksen bilong Hailans zon.

Ol i redim skwat long bungim ol arapela 4-pela zon tim long Lae long Septemba.

Hailans zon skwat em; Thomas Kungi, Kaupa Samson, Kevin Inagafa, Nathan Hoyato, Tarzan Malaguna, Mason Biyango, SK Dable na Joseph Peter (Goroka), Joseph Nere, Vitus Kapo, Joshua Kumut, Tega Kawage, John Arne na Michael Patrick (Kundiawa), Bernard Max, Jeffrey Norman na Junia Bombai (Pogerera), Joseph Kopeyap na Jack Kila (Magarima) na James Gan (Kudjip).



HOLIM EM: Wanpela gem namel long Brian Bell Bulldogs na Goroka Lahanis. *Fall Poto*

# Etletiks soim kala

## ...gutpela sain bilong SP Gems

TWELVEPELA gol medol, 7-pela silva na 9-pela brons medol em prais Papua Niugini (PNG) etletiks tim i winim long Melanesian sempionsip long Cairns, Australia, las wik Sande.

PNG i skoaim 304 points na i kam pas long Fiji (292) na Etletiks Not Kwinnslen (254).

Dispela win i lukim planti rekot i bruk na tu ol etlit i soim gutpela fom na salens long gem we i soim gutpela sain bilong tim long Saut Pasifik (SP) Gems long Samoa.

Bikpela birua bilong ol long dispela salens em Fiji husat ol i kisim 12-pela gol, 8-pela silva na wanpela brons medol na ol bai givim het pen long PNG yet long SP Gems.

Wanpela etlit husat i mekim nem em Poro Gahekave husat i kamap olsem namba wan meri etlit insait long ol Pasifik ailan kantri long resis insait long 3000

mita stipolses.

Gahekave i putim stopim taim long 11 minit, 54 sekens na dispela bai stap olsem namba wan nesanel rekod taim bilong PNG.

"Dispela i givim planti strong na bilip long Gahekave husat i gat 14 krismas tasol long go moa yet long dispela spot.

"Em bai namba wan taim bilong dispela spot i kamap insait long Pasifik gems tu," Presiden bilong PNG etletiks yunion (PNGAU), Tony Green i tok.

Sharon Henry tu em narapela husat i ron gut tru long 400 mita hedols resis.

Dispela em i namba tu taim bilong em long dispela resis tasol em i skoaim 63.24 sekens we i tupela sekens moa spit long olpela taim bilong em long Lae, Morobe Provins, tupela mun i go pinis.

Meri nogut, Mae Koime tu i brukim 200 mita nesanel rekot bilong em yet long 23.77 sekens wantaim nupela taim bilong 23.71.

Tasol Makelesi Bulikiobo bilong Fiji strong tumas long Koime long fainol na i win wantaim 23.36 sekens long fainol.

"Dispela meri Fiji stap long gutpela fom bilong Saut Pasifik Gems na i luk strong tru long 400 mita resis," Green i tok.

Toea Wisil tu i bruim junia rekot bilong long 200 mita wantaim nupela mak long 24.23 sekens na Anne Mooney i abrusim tupela moa sekens long olpela taim bilong em wantaim 2 min, 15 sekens long kisim namba tu ples long Salome Dell long 800 mita resis.

Green i tok Raphaela Baki tu i wok long kam antap na em i gutpela sain bilong 4x100mita resis.

Long ol man, Mowen Boino i soim em i namba wan yet long 400 mita hedols resis we i lukim em i lusim ol narapela long bak-sait long laspela raun.

Nelson Stone tu i wok long putim mak long olgeta resis na nau em i brukim gutpela taim bilong em yet wantaim nupela mak bilong 48.44 sekens long 400 mita resis.

Green i to skwad nau i gat 10-pela day long trening long Brisbane, Australia bipo ol i go long Apia long Ogas 31.

## SPOT RAUN

wantaim



### SCOTT VAVINE ML

## Sampela ragbi lig pilaia bagarapim nem bilong spots

I no longtaim i go pinis i gat sampela ripot i kamap long sampela ol pilaia bilong SP Kap i bikhet long pablik.

Em i tru olsem dispela ol toktok i kamapim planti toktok namel long ol spotsmanmeri insait long kantri.

Dispela kain bikhet pasin em i no bilong ragbi lig tasol, em bilong olgeta spots insait long kantri.

Bikhet bilong ol dispela pilaia i bagarapim nem na kisim sem i kam long ragbi lig tasol ol manmeri na ol sponsa tu i pilim wankain hevi bilong en.

Dispela ol pasin i kamap tupela taim long wanpela klab tasol na dispela em planti tumas. Mi min olsem ol kain bikpela spotsman bilong bikpela kompetisen insait long kantri i mekim dispela kain bikhet pasin moa long wanpela taim em ino gutpela na i noken kamap.

Dispela ol man em ol top spotsman bilong yumi husat ol i gat gutpela gem na rekot long fil. I gat planti arapela long provins bilong ol i stap husat i painim sans long werim dispela yuni-fom ol i kisim o long kamap olsem risev tasol bilong tim tasol ol ino inap na dispela ol bikhet lain i kisim ples bilong ol.

Ol i no tingim dispela na soim rispek long ol yet, spots bilong ol, klab, ol ofisol na ol wanpela long provins bilong ol.

Tingting na pasin bilong sampela pilaia i save senis taim ol i lukim olsem nem bilong ol i stap insait long skwat na ol bai pilai. Dispela kain tingting i save bagarapim het bilong ol gutpela man na ol i save bikhet, apim nem bilong ol yet na ino save wari moa long narapela man o meri.

Mi no save wanem kain tingting tru i save kisim ol, ol i save tingim tu olsem ol i makim provins bilong ol o? Na tu long dispela levul bilong gem em ol i gat sans long i go moa yet na em i sans bilong ol bilong wanem i gat planti moa i stap husat i laik kisim ples bilong ol.

Dispela kain pasin em i no gutpela na mi laikim i mas i gat sampela strongpela lo bilong ol pilaia i mas stap long was long kain ol bikhet pasin olsem long ol long pilaia.

Ol i mas lukim olsem olgeta pilaia i mas bihain gut dispela ol lo insait na outsait long fil wantaim.

Ol opisal bilong dispela klab nau i mas lukluk long dispela hevi na stat long painim ol nupela rot long stretim bai em i noken kamap gen.

Tingim olsem yu ken amamas long sans bilong yu long stap long tim tasol noken bagarapim nem bilong en, bilong yu o bilong spots bilong yu.

## BB Yunaited strong yet long Goroka lig

James Kila i raitim

BB TREDING Yunaited i soim tru olsem ol bai hatpela tim long winim bilong wanem nau yet ol i go pas long points leda bilong SP Goroka ragbi lig resis.

Long mein gem bilong ol las wik Sande agensim Nowek Royals ol i soim kala bilong ol tru taim ol i winim Royals 18-10.

Yunaited kosa, Peter Walok i tok ol i bin malolo liklik taim ol Hailans zon traels i bin kamap olsem na ol pilaia bilong em i lusim sampela fom liklik.

"Tasol neks wik bai gem bilong mipela i go strong moa yet," em i tok.

Presiden bilong Royals, Sajen, David Ume i tok tu olsem klostu bai fainols i kamap na ol gem bai go strong tru.

Yunaited i bin paia lait-stret long namba wan hap bilong gem i lukim senta Kevin Inagapa i soim spit na stail bilong em na i putim tupela trai bilong ol.

Beklain bilong Yunaited i pilai gut tru we i lukim ol i tromoi bal long wansait bilong fil i go long hapsait bilong fil na paolim ol Royals.

Dispela gem tu i lukim kam bek bilong Kusiri Sonyu husat i stap long fulbek na i mekim ol i ron gut tru long hap bilong ol Royals.

Sonyu em wanpela pilaia bilong Yunaited husat i go pilai wantaim

Besta Kunjin Eagles long SP Kap resis.

Namba wan hap bilong gem i ron wansait stret long Yunaited we i lukim ol i ronim bal gut na kepten Nathan Hayato i bung wantaim Inagafa, Bernard Walok, Joshua Ben na Jeff David long brukim banis bilong Royals.

Ol fowet bilong Yunaited husat i bin strong tru em Tags Gaulim, Alison Rodney, Victa David na Lime Moses.

Dispela i lukim ol i go pas long namba wan hap bilong gem, 14-0 tasol long namba tu hap, Royal i kam bek strong wantaim ol bikpela fowet bilong ol olsem Isaac Ilailo, S.K Dable na John Wemin.

Ol i mekim i go na senta Stainer Sam i skoa, ino long taim.


Bihain long Yunaited i skoa gen, Royals fowet Ilailo i brukim difens bilong Yunaited na skoa bilong Royals long namel stret long kisim ol i go 18-10 long fultaim.

Dispela i bin wanpela strongpela gem tru na planti manmeri i skin kirap long lukim we ol tupela tim i bin pilai.

Em i wanpela gem we ol fowet i bin pilai strong tru na ol beklain i bin tromoi bal gut tru long lukim gem i kamap gut tru.

Toktok bilong Walok olsem neks wik bai gem bilong ol i strong moa i mekim ol manmeri i redi long lukim bikpela pairap namel long ol tupela tim long dispela gem.

## Moa mas lainim masol ats



**WE BILONG LAIP:** Kung fu sumatin, Robu David i mekim wanpela stail na bak-sait em Sifu Ngandang (lephan), Eludeme na sinia odita bilong Ane Accountants Pota Heni long taim ol i givim sek. *Poto: Andrew Molen*

Andrew Molen i raitim

STEVEN Ngandang i lainim Shaolin Kung Fu moa long 20 yia pinis na em i laik planti moa manmeri nau i mas lainim dispela kain masol ats o stail bilong pait.

"Em i ken sevim laip bilong yu, bai yu stap fit na strong na bai yu no inap sik," Ngandang i tok.

Em i mekim dispela toktok long Mosbi bihain long skul bilong em, PNG Shaolin Wushu Kung Fu Federesen (PNGSKF) i kisim wanpela sponsasip long Ann Accountants.

Nagandang i singaut long planti moa manmeri mas lainim Kung Fu na moa sapot i mas i kam long komyuniti, pablik na ol bisnis.

"Dispela em kalsa bilong narapela kantri na mi no laik em i dai, ol manmeri mas lainim na holim i stap strong.

"Mi kisim dispela save long han bilong ol Saina stret na mi laik skulim planti moa manmeri bai em i ken helpim laip bilong ol tu," Ngandang i tok.

Nau yet Ngandang na skul bilong em i wok long redi long sampela tonamen dispela yia na sapot (K800) bilong Ane Accountants i helpim ol long redi long dispela ol pait.

Papa bilong Ane Accountants, Philip Eludeme i tok dispela em ol i lukim dispela olsem wanpela gutpela samting bilong helpim ol yangpela i stap gut na em i amamas long givim sapot.

LAE  
BISCUIT CO.



WANTOK

# S P O T S

LAE  
BISCUIT CO.



Isu 1726

Wan wik: Fonde, Ogas 23-29, 2007.



SAMOA AUGUST 2007  
XIII SOUTH PACIFIC GAMES



LIVE ON RADIO AUSTRALIA DAILY

radioaustralia.net.au

# Pawalifting promisim 10-pela gol medol

...ol makim strongpela tim wantaim  
9-pela meri na 10-pela man

Andrew Molen i raitim

LASPELA taim Papua Niugini winim 10-pela gol medol long wanpela spot em long mini Saut Pasifik gems long Tahiti.

"I nogat wanpela spot i apim fleg bilong PNG 10-pela taim long kain bikpela gem bipo.

"PNG Pawalifting tim tasol i bin mekim na nau mi tok mipela bai winim


10-pela o moa gol medol gen," Vais Presiden bilong PNG Pawalifting Federesen, Frank Robby i tok.

Long 2003 ol i bin winim tripela gol medol tasol long Fiji namel long 7-pela husat i go pilai long hap.

Tasol Robby i tok ol i gat bikpela bilip long dispela tim na em i kolim ol

olsem "Dream Team" (drim tim) o wanpela strongpela tim tru we ol i save driman tasol long kamapim.

**Moa long pes 31.  
Lukluk long tim PNG,  
Pes 28.**



PAWA TIM: Kelly Henry (fran) wantaim ol arapela memba bilong PNG Pawalifting tim i sindaun wantaim long Telikom Rumana dispela wik taim ol i kisin sponsasip bilong ol long Telikom PNG.

Wetiks soim gutpela  
man. Pes 31.

Hailans zon i redi long  
zon salens. Pes 31.

Souths klostu long  
fainols. Pes 30.

## TOKSAVE IKAM LONG




Mipela bai lukautim insurens wari bilong

- Haus na samting insait long haus
- Kar na PMV wantaim
- Bisnis (liklik na bikpela wantaim)

Mipela bai stretim olgeta insurens wari bilong yu

Lukim mipela nao



Richard Kassman  
General Manager



Wayne Gembol  
Chief Underwriter

or go lukim  
Insurens Broka bilong yu

Level 3 Pacific Place, Cnr Musgrave Street & Champion Parade  
PO Box 1383, Port Moresby. Telephone: (675) 321 0127 / 321 1263 Fax: (675) 321 1386 Email: r.kassman@inspacpng.com.pg

Publisher of the newspaper operates at Section 58, Allotment 3, Office 2, Waigani Drive



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.